

1 ያኑሲ ዓሶ ሃይሶ ኬኤዛ ማፃኣፖ ዓይያ ካር

ሃይ ያኑሲ ዓሶ ሃይሶ ኬኤዛ ማፃኣፓ ሳሙዔኤሌ ማፃኣፖና ካኣቶ ማፃኣፖናይዳ ኬኤዚንቴ ሃይሶ ዲማ ዲማ ጎይሢና ጊንሣ ለሚ ኬኤዛይ፤ ያኑሲ ዓሶ ሃይሶ ኬኤዛ ማፃኣፖይዳ ዒሰራዔኤሌ ዓጮ ካኣታ ወይሢ ሃይሶ ዛሎኮ ለምዖ ዴኤፐ ዴኤፐ ማለሢ ዓኣሢ ኬኤዚንቴ።

1. ዒሰራዔኤሌንታ ዪሁዳንታኮ ካኣታ ባይሲንታይዳ ኬዴያ ማዔያታቴያ ያኑሲ ዴርም ዒንጌ ሃጊ ማዓንዳ ዎዞ ቃኣሎ ቢያ ሃሽባኣፖ ካፔያ ማዔሢና ዪሁዳይዳ ናንጋ ዓሶ ዛሎና ዒዚ ፔ ዴርም ማላ ማሊያ ማዳይዳ ፔኤሽያ ማዔሢ ዔርዛይ፤ ሃና ማፃኣፖ ያኣፔ ዓሢ ዬይ ሃይሳ ጎኔ ማዔያኮ ዓይሢ ካራ ዒዛም ማዓንዳጉዲ ዳውቴንታ ሴሎሞንታ ማዳ ዴኤፖ ዴኤፖ ማዳ፤ ሃሣ ጊንሣ ዒዮሳፕጂንታ ሂዘቅያሴንታ ዒዮሲያሴንታ ዔኪ ሙኬ፤ ያኑሲና ዎላ ዓኣ ጫኣቁሞ ዓካሲያንታ ያኑሲም ጉሙርቁንታያ ማዔያ ዶዲሺ ዓርቁ ዴር ሃይሶ ባንሢ ማሊያ ዔኪ ዳካ።

2. ዬሩሳላሜይዳ ዓኣ ጌኤዦ ማኣርይዳ ያኑሲ ካኣሽኪሢ ዎይቲ ዓርቁንቴቴያ ዔርዛይኬ፤ ባሼ ሃሣ ካኣዦ ዎጎ ማዲ ከንሣ፤ ቁኤሶንታ ለዊ ዓሶንታኮ ዎላ ፔቴ ማዔ ማዳ ማዳ ዎይቲ ዓርቁንቴቴያ ዔርዛይኬ፤ ጌኤዦ ማኣር ማዦሢ ሴሎሞኔ ማዔቴያ ጌኤዦ ማኣርንታ ካኣዦ ዎጎንታ ማዲንታንዳ ጎይያ ጊኢጊሼሢሢ ዳውቴ ማዔያ ዔርዛይኬ።

ማፃኣፔላ ዲማ ዲማ ዓርቁ ባኮ

- ዓዳኣሜ ዜርዎኮ ዴንዲ ካኣቲ ሳኣዎኦሌ ሃላንዳኣና (1:1—9:44)
- ሳኣዎኦሌና ናኣቶናኮ ሃይሶ (10:1-14)
- ዳውቴኮ ካኣታዲያ፤ ሃሣ ዬሩሳላሜ ዒዚ ዓርቁሢ (11:1-9)
- ዳውቴኮ ዔርቲ ፖኦሊሶ (11:10—12:40)
- ጫኣቁሞ ሳኣፂኖኮ ዬሩሳላሜ ዔውቴያ (13:1—16:43)
- ጌኤዦ ማኣር ሴሎሞኔ ማዦንዳያ ማዔሢ (17:1-27)
- ዳውቴ ያሎና ባሼ ባሺያ (18:1—20:8)
- ዳውቴ ዴር ፓይዴሢር ያኑሲ ዳጋዴሢ (21:1-30)
- ጌኤዦ ማኣር ማዦኒ ጊኢጊንቶና ጊኢጊንቲ (22:1—28:21)
- ጌኤዦ ማኣር ማዦኒ ዴራ ዒንጌ ባኮ (29:1-20)

ሴሎሞን ካኣታዳሢ (29:21-25)
ዳውቴኮ ሃይሶ (29:26-30)

ዓዳአሚይዳፓ ዳንዲ ዓብራሃሚ ሄለንዳኣና ሾይንቴ ዓሶ ዜርዖ
(ማዢ. ማፃ 5:1-32፤ 10:1-32፤ 11:10-26)

1 ዓዳአሚ፡- ሴቴ፣ ሴቴ ሄኖሴ፣ ሄኖሴ ቃይናኔ ሾዔኔ፤ 2 ቃይናኔ ሚላሊዔኤሌ፣ ሚላሊዔኤሌ ያሬዳ ሾዔኔ፤ ዬያታ ፔ ሱንሢና ሱንሢና ዔኤሊንታ ዳሮኮ ቤርታሳ ማዖንሢኬ። 3 ያሬዳ፡- ሄኖኬ፣ ሄኖኬ ማቶሳላ፣ ማቶሳላ ላሚሄ ሾዔኔ፤ 4 ላሚሄ ኖሄ፤ ኖሄ ሴኤሚንታ ካኣሚንታ ያኣፔቴንታ ሾዔኔ።

5 ያኣፔቴያ ጎሜሬ፣ ማጎጌ፣ ማዳያ፣ ያዋኔ፣ ቴባሌ፣ ሚሼኬንታ ቴራሴ ጌይንታ ዓቲንቁ ናይ ሾዔኔ፤ ዬያታ ፔኤኮ ሱንዖና ሱንዖና ዔኤሊንታ ዳሮኮ ቤርታሳ ማዖንሢኬ። 6 ጎሜሬ ናኣታ ዓሽኬናዜ፣ ሪፖቴንታ ቶጋርማንታኬ። 7 ያዋኔ ናኣታ፡- ዔሊሻ፣ ዒሰፔኔ፣ ቆጵሮሴንታ ሮዳ ዳሮንታኬ።

8 ካኣሚኮ ዓቲንቆ ናኣታ ኩሼ፣ ሚዒራይሚ፣ ፑኤግንታ ካኣናንታ ማዓዛ ዬያታ ፔኤኮ ሱንዖና ሱንዖና ዔኤሊንታ ዳሮኮ ቤርታሳ ማዖንሢኬ፤ 9 ኩሼ ዜርዖ፡- ሳባ፣ ሃዋላ፣ ሳቢታ፣ ራዒማንታ ሳቢቴካ ጌይንታ ዳሮኬ፤ ራዒማኮ ዓቲንቆ ናኣታ፡- ሳባና ዳዳኔናኬ። 10 ኩሼ ናምሩዳ ሾዔኔ፤ ዬይ ናምሩዳ ዓጪዳ ቤርታዲ ዖልዚና ዔርቴ ዓሲ ማዒ ኬሰኬኔ። 11 ገብጻ ዜርዖ፡- ሉዲሚ፣ ዓናሚሚ፣ ለሃቢሚ፣ ናፕቱሄሚ፣ 12 ፔትሩሰሚ፣ ካሰሉሂሚና ፒሊሰጻኤሚ ዓሶኮ ቤርታሳ ዓደንሢ ማዔ ቁርጻሴ ዳሮኬ። 13 ካኣናኔ ናኣቶኮ ቶይዳሢ፡- ዒዶኔ፤ ጌኤዛሢ ሄቴ ማዓዛ ዬያታ ፔኤኮ ሱንዖና ሱንዖና ዔኤሊንታ ዳሮኮ ቤርታሳ ዓደንሢኬ። 14 ዬያጉዲ ሃሣ ዒዚ፣ ዬይ፣ ካኣናኔ፡- ዒያቡሳ ዓሶ፣ ዓምራ ዓሶ፣ ጌርጌሳ ዓሶ፣ 15 ሂዋዌ ዓሶ፣ ዓርቃ ዓሶ፣ ሲናዌ ዓሶ፣ 16 ዓርዋዳ ዓሶ፣ ጃማራ ዓሶንታ ሃማታዌ ዓሶኮ ቤርታሳ ዓዳሢኬ።

17 ሴኤሚ ናኣታ፡- ዔላኣሚ፣ ዓሶኦሬ፣ ዓርፓክሳዳ፣ ሉዳ፣ ዓራሚ፣ ዑፃ፣ ሁሌ፣ ጌቴሬንታ ሚሼኬንታ ማዓዛ ዬያታ ፔኤኮ ሱንዖና ሱንዖና ዔኤሊንታ ፃጶኮ ማዖንሢኬ። 18 ዓርፓክሳዳ ሼላሄ ሾዔኔ፤ ሼላሄ ዔቦሬ፣ 19 ዔቦሬ ሃሣ ላምዖ ዓቲንቁ ናይ ሾዔኔ፤ ዒዛ ዎዶና ዓጮ ዳራ ፓቁንቴሢሮ ዒዛኮ ቶይዶ ናዓሢኮ ሱንዖ ፔሌጌ ጌይንቴ ጌሢንቴኔ፤ ጌኤዛሢ ሱንዖ ዮቅፃኔ ጌይንቴኔ። 20 ዮቅፃኔ ዜርዖ፡- ዓልሞዳዳ፣ ሼሌፔ፣ ሃፃርማዌቴ፣ ዬራሄ፣ 21 ሃዶራሚ፣ ዑዛሌ፣

ደቅላ፥ 22 ዔባሌ፥ ዓቢማዔሌ፥ ሳባ፥ 23 ያፕሬ፥ ሃዊላንታ ዮባቤ ጌይንታ ደርንታኩ።

24 ሴኤሜፓ ዴንዲ ዓብራሃሜ ሄላንዳኦና ዓኣ ሾይንቶ ዜርፃ፡- ሴኤሜ፥ ዓርፓክሳዴ፥ ሹላሄ፥ 25 ዔቦሬ፥ ፔሌጌ፥ ሬዑኔ፥ 26 ሴሩጌ፥ ናኮሬ፥ ታራንታ 27 ጊንፃፓ ሱንፃ ዓብራሃሜ ጌይንቲ ላኣሚንቲ ዓብራሜንታ ቢያሢኩ።

ዒሰማዔኤሌ ዜርፃ
(ማኸ. ማፃ 25:12-16)

28 ዓብራሃሜ፡- ዪሳኣቄና ዒሰማዔኤሌና ሾዔኔ፤ 29 ዒሰማዔኤሌ ናኣታ ታጳ ላምዖ ፃጲኮ ሱኡጌ ማዔኔ፤ ዬያታ ፃጳ ዒሰማዔኤሌኮ ቶይዶ ናዓሢ ሱንፃና ዔኤሊንታ ኔባዮቴ፥ ቁፃሬ፥ ዓድቤዔሌ፥ ሚብሳሚ፥ 30 ሚሸማዔ፥ ደማ፥ ማሳ፥ ሃዳዴ፥ ቲማ፥ 31 ዪፀሬ፥ ናፕሹንታ ቁድማ ጌይንታ ፃጳኩ።

32 ዓብራሃሜም ኬፀራ ጌይንታ ዒዛኮ ጊንፃ ማቕሰኬና ዚምራኔ፥ ዮቅሻኔ፥ ሜዳኔ፥ ሚዲያሜ፥ ዮሸባቄና ሹሃ ጌይንታ ላሆ ዓቲንቁ ናይ ሾዔኔ። ዮቅሻኔያ ሳባና ዴዳኔ ጌይንታ ላምዖ ዓቲንቁ ናይ ሾዔኔ፤ 33 ሚዲያሜ ሃሣ ዔፓ፥ ዔፔሬ፥ ሃኖኬ፥ ዓቢዳዔና ዔልዳዔ ጌይንታ ደንሳ ዓቲንቁ ናይ ሾዔኔ።

ዔኤሳዎ ዜርፃ
(ማኸ. ማፃ 36:1-19)

34 ዓብራሃሜ ናኣዚ ዪሳኣቄ ዔኤሳዎና ያይቆኦቤና ሾዔኔ፤ 35 ዔኤሳዎ፡- ዔሊፓዜ፥ ሬዑዔኤሌ፥ ዪዑሹ፥ ያዕላሜንታ ቆራሂንታ ሾዔኔ፤ 36 ዔሊፓዜ፡- ቲማኔ፥ ያማሬ፥ ጂፔ፥ ጋዕታሚ፥ ቁናዜ፥ ቲምናዔንታ ዓማሌቁ ጌይንታ ላምዖ ፃጳኮ ቤርታሳ ዓዶ ማዔኔ። 37 ሬዑዔኤሌያ፡- ናሃቴ፥ ዛራሄ፥ ሻማናንታ ሚዛ ጌይንታ ፃጳኮ ቤርታሳ ማዓሢ ማዔኔ።

ቤርታዲ ዔደኣሚ ዓጮይዳ ናንጋ ዓሶ
(ማኸ. ማፃ 36:20-30)

38-42 ቤርታዲ ዔደኣሚይዳ ናንጋ ዓሳ ሴዒሬ ናኣቶ ዜርፃ ማዓዛ ዔያታ፡- ሎፃኔ፥ ሹባል ጃባዖኔ፥ ዓና፥ ዲሾኔ፥ ዔጃሬና ዲሻኔናኩ። ሎፃኔ ናኣታ፡- ሆሬና ሆማሚና ማዓዛ ቲሚና ሎፃኔኮ ጌርኩ። ሹባል ናኣታ፡- ዓልዎኔ፥ ማናሃቴ፥ ዔባል ሹፒና ያናሚናኩ። ጃባዖኔ ናኣታ፡- ዓያና ዓናናኩ። ዓና ናኣዚ ዲሾኔኩ። ዲሾኔ ናኣታ፡- ሄሚዳኔ፥ ዔሸባኔ፥ ዒትራኔና ኪራኔናኩ።

ዔፅሬ ናኣታ፡- ቢልሃኔ፥ ዛዕዋኔና ዓቃኔናኬ።

ዲሾኔ ናኣታ፡- ዑጻና ዓራኔናኬ።

ዔደኦሚ ዓጮ ካኣቶ
(ማዢ. ማፃ 36:31-43)

43 ዒሰራዔኤሌ ዓጮይዳ ካኣታ ካኣታዲዋንቴ ዔደኦሚ ዓጮ ሃይካፓ ዴማ ፓይዲንታ ካኣቶንሢ ዋሊ ሄሊ ሄሊ ካኣታዳኔ፤ ዬንሢያ፡- ዲንሃባ ጌይንታ ካታማ ሾይንቴ ቤዖሬ ናኣዚ ቤላዔ ካኣታዳኔ፤ 44 ቤላዔ ሃይቃዛ ዒዛ ቤዛ ባሶሬ ዓጮ ዓሢ ዛራ ናኣዚ ዮባቤ ካኣታዳኔ። 45 ዮባቤ ሃይቃዛ ቴማኔ ዓጮ ዓሢ ሁሻሚ ካኣታዳኔ፤ 46 ሁሻሚ ሃይቁሰካፓ ሞዓኣቤ ዓጮይዳ ሚዲያሚ ዓሶ ያሎና ባሼ ቤዳዳ ናኣዚ፥ ሃዳዳ ካኣታዳኔ፤ ዒዚ ካኣታዲ ዴዔ ካታሚላ ዓዋ ጌይንታ፤ 47 ሄሊሳዖ ሃዳዳ ሃይቃዛ ማሰሬቃ ዓጮ ዓሢ ሳሚላ ካኣታዳኔ። 48 ሳሚላ ሃይቁሰካፓ ዔፕራዲቤ ዋሮ ዓጮ ዓኣ ሬሃቦቴይዳ ሾይንቴ ሻዑሌ ካኣታዳኔ። 49 ሻዑሌ ሃይቃዛ ዓክቦሬ ናኣዚ፥ ቤዓልሃናኔ ካኣታዳኔ፤ 50 ቤዓልሃናኔ ሃይቁሰካፓ ፓዑ ካታሞ ዓሢ፥ ሃዳዳ ካኣታዳኔ፤ ሃዳዳኮ ማቻ፥ ሚሃፃቤሎ ጌይንታዖ ዛሃቤኮ ናኣዚ ናዖ ማዔሢ ማናሬንዴ ናይኬ።

51 ሃዳዳያኣ ሃይቁኔ፤ ዬካፓ ሃሢ ዔደኦሚ ዓሶኮ ሱኡጎ ማዔዘንሢ፡- ተሞናዒ፥ ዓልዋ፥ ዬቴቴ፥ 52 ያሆሊባማ፥ ዔላ፥ ፒኖኔ፥ 53 ቁናዜ፥ ቴማኔ፥ ሚብሳሬ፥ 54 ሚግድዔሌና ዒራሚ ጌይንታዘንሢ።

2

ዪሁዳ ዜርዖ

1 ዒሰራዔኤሌ ታጳ ላምዖ ዓተንቁ ናይ ሾዔኔ፤ ዔያታ፡- ሮኦቤኤሌ፥ ሲሞኦኔ፥ ለዋ፥ ዪሁዳ፥ ዪሳኮኦሬ፥ ዛብሎኦኔ፥ 2 ዳኣኔ፥ ዮሱፔ፥ ቢኢኒያሚ፥ ኒፕታኣሌኤሚ፥ ጋኣዳንታ ዓሴኤሬንታኬ።

3 ዪሁዳ ፔኤኮ ማቾ ካኣናኔ ዓጮ ላኣሌሎ፥ ባትሹዖይዳፓ ሃይሃ ዓተንቁ ናይ ሾዔኔ፤ ዬንሢያ፡- ዔሬ፥ ያናኔና ሼላ ጌይንታያኬ፤ ዒዛኮ ቶይዶ ናዓሢ ዔሬ ናንጊና ናንጋ ጎዴሞ ዓይሢንቴዋ ሚርጌና ፑርታታሢር ናንጊና ናንጋ ጎዳ ዒዛ ዋዳኔ፤ 4 ዪሁዳ ፔኤኮ ናኣዚ ማቾ ተዕማሮፓ ፓርሴና ዛራሄ ጌይንታ ላምዖ ዓተንቁ ናይ ሾዔኔ፤ ዪሁዳኮ ዋሊ ዑፃ ደንጎ ናይ ዓኣኔ።

5 ፓርሴያ ሄጻርኔና ሃሙሌ ጎዖ ላምዖ ዓተንቁ ናይ ሾዔኔ፤ 6 ዒዛኮ ጌርሲ ዛራሄ ደንጎ ዓተንቁ ናይ፡- ዘምራ፥ ዔታኔ፥ ሄማኔ ካልኮሌና ዳርዳዔ ጎዖዘንሢ ሾዔኔ፤ ዒዛኮ ዋሊ ዑፃ ደንጎ ናይ ዓኣኔ። 7 ዛራሄ

ዘርፃፓ ፔቴይ ካርሚ ናዓሢ፡ ዓካኔ ያሎና ባሺ ዲዒ ዔኪ ናንገና ናንጋ ጎዳም ዲማሶና ባኮ ዉኡቂ ዔኪ ዓኣቼሢር ናንገና ናንጋ ጎዳ ዒሰራዔኤሌ ዳርይዳ ሜቶ ዓገኔ።

8 ዓታኔ ዓዛሪያ ጌይነታ ፔቴ ዓቲንቄ ናይ ሾዔኔ።

ካኣቲ ዳውቲ ማኣር ዓሶ

9 ሃዲርኔ ጎዖሢ ሃይሃ ዓቲንቄ ናይ፡- ዪራህሜዔሌ፥ ራማና ካኣሌቤ ጎዖዘንሢ ሾዔኔ፤ 10 ዓራሜ ዓምናኣዳኣቤኮ ዓዶኪ፤ ዓምናኣዳኣቤያ ዪሁዳ ናኣቶኮ ሱኡጌ ማዔ፥ ኔዓሶኔ ሾዔኔ። 11 ዩካፓ ኔዓሶኔ ሳልሞኔ፤ ሳልሞኔ ቦዔዜ ሾዔኔ። 12 ሄሊሳዖ ቦዔዜ ዒዮቤዴ ሾዓዛ፥ ዒዮቤዴ ዒሴዬ ሾዔኔ፤ 13 ዒሴዬ ለንካይ ዓቲንቄ ናይ ሾዔኔ፤ ዔያታ ዋሊ ሄሊ ሄሊ ሾይነቲ ጎይዖ ሃካፓ ሊካ ፓይዲንቲ፡- ዔለዓቤ፥ ዓቢናዳኣቤ፥ ሻማ፥ 14 ናትናዔሌ ራዳዬ፥ 15 ዓፄሚና ዳውቲናኪ። 16 ዒማና ዒሴዬ ፃሩያና ዓቢጋይሎ ጌይነታ ላምዖ ዉዳር ናይሰከንሢያ ሾዔኔ፤

ዒሴዬ ናኣ፥ ፃሩያ ሃይሃ ዓቲንቄ ናይ፡- ዓቢሻዬ፥ ዒዮዓቤና ዓሳሄሌ ጎዖዘንሢ ሾዔኔ። 17 ሃንጎ ሃሃ ዒሴዬኮ ናኣ፥ ዓቢጋይላ ዒሰራማዔሌ ዘርፃሢ ሄቴሬም ሎዓዖ ዓማሳ ጌይነታ ዓቲንቄ ናይ ሾዔኔ።

ሄዲርኔ ዘርፃ

18 ሄዲርኔ ናኣዚ ካኣሌቤ፡- ዓዙባ ጌይነታ ላኣሊሰኬኖ ዔኪ ዪሪዖቲ ጎዖ ዉዳር ናይ ሾዔኔ፤ ዪሪዖቲ፡- ዩሼሬ፥ ሾባቤና ዓርዶኔ ጌይነታ ሃይሃ ዓቲንቄ ናይ ሾዔኔ። 19 ዓዙባ ሃይቄሰካፓ ካኣሌቤ ዔፕራታ ጌይነታ ላኣሊሰኬኖ ዔኪ ሁሬ ጌይነታ ዓቲንቄ ናይ ሾዔኔ፤ 20 ዩካፓ ሁሬ ዑሬ፤ ዑሬ ገንሣ ባፂዔሌ ጌይነታ ዓቲንቄ ናይ ሾዔኔ፤

21 ሄዲርኔኮ ለዓ ላሂታሚ ማዓዛ ጌሌዓዴ ጎዖሢኮ ጌር ማኪሪኖ ዔካዖ ሱጉቤ ጌይነታ ዓቲንቄ ናይ ሾዔኔ፤ 22 ዩካፓ ሱጉቤ ያዒሬ ሾዔኔ፤ ዩይ፥ ያዒሬ ጌሌዓዴ ዓጮይዳ ዓኣ ላማታሚ ሃይሃ ካታማ ዬኖ ዋዶና ዋይሃያኪ፤ 23 ጋዓንቲ ጌሹሬና ዓራሜ ዓጮ ካኣቶና ላሂታሚ ማዓ ዳኮ ዳኮ ካታሞ ዩያ፥ ጌሌዓዴይዳፓ ያሎና ባሺ ዓርቄኔ፤ ዩያታ፡- ያዒሬነታ ቄናቲነታ ጉርዶ፤ ዩያጉዲ ዔያቶኮ ኮይላ ዓኣ ዳኮ ዳኮ ካታሞንሢያ ቃሲ ዓርቃያኪ፤ ዒኣካ ናንጋ ዳራ ቢያ ጌሌዓዴኮ ዓዶ ማኪሬ ዘርሢኪ፤ 24 ሄዲርኔ ካኣሌቤ ጌይነታ ዓጮ፥ ዔፕራታይዳ ሃይቄሰካፓ ዓቢያ ጌይነታ ዒዛ ማቻ ዓሽሁሬ ጌይነታ ዓቲንቄ ናይ ሾዔኔ፤ ዓሽሁሬ ቲቆዓ ጌይነታ ካታማ ማኸኔ።

2:7 2:7 ዒያ. 7:1።

ዪራህሜዔሌ ዜርዖ

25 ሄፃሮኮኮ ናኣዚ ቶይዲ፡ ዪራህሜዔሌ ዶንጎ ዓቲንቁ ናይ ሾዔኔ፤ ዔያታ፡- ቤርታሳ ቶይዲሢ ራሜ፡ ሄሊሴሢ ቡና፡ ሃይሣሳሢ ዖሬኔ፡ ዖይዳሳሢ ዓፃሜ፡ ዶንጋሳሢ ዓሂያ ጌይንታያኩ። 26-27 ራሜ ሃይሣ ዓቲንቁ ናይ፡- ማዓፃ፡ ያሚኔና ዔቁሬ ጌይንታስኬንሢ ሾዔኔ፤ ዲማና ዪራህሜዔሌ ዓታራ ጌይንታ ፔቲ ሜሌ ላኣሊሰኬኖ ዔኪ ዖናሜ ጌይንታ ዓቲንቁ ናይ ሾዔኔ፤ 28 ዪያጉዲ ሃሣ ዖናሜ ሻማያና ያዳዔ ጌይንታ ላምዖ ዓቲንቁ ናይ ሾዔኔ፤ ሻማያኣ ናኣዳኣቤና ዓቢሹሬ ጌይንታ ላምዖ ዓቲንቁ ናይ ሾዔኔ።

29 ዓቢሹሬ ዲማና ዓቢሃይሎ ጌይንታ ፔቲ ላኣሊሰኬኖ ዔኪ ዓህባኔና ሞሊዳ ጌይንታ ላምዖ ዓቲንቁ ናይ ሾዔኔ፤ 30 ዓቢሹሬኮ ጌርሲ ናኣዳኣቤ ሴሌዳና ዓፓይሜ ጌይንታ ላምዖ ዓቲንቁ ናይ ሾዔኔ፤ ሴሌዳ ጋዓንቴ ፔቲታዖ ዓቲንቁ ናይ ሾዑዋዖ ሃይቁኔ። 31 ዓፓይሜ ዪሺዒ ጌይንታ ዓቲንቁ ናይ ሾዔኔ፤ ዪካፓ ዪሺዒያ ሺሻኔ ጌይንታ ዓቲንቁ ናይ፡- ሺሻኔ ዓህላዩ ጌይንታ ዓቲንቁ ናይ ሾዔኔ።

32 ሻማዩኮ ጌርሲ ያዳዔ ዩቴሬና ዮናታኣኔ ጌይንታ ላምዖ ዓቲንቁ ናይ ሾዔኔ፤ ዩቴሬ ጋዓንቴ ዓቲንቁ ናይ ሾዑዋዖ ሃይቁኔ፤ 33 ዮናታኣኔ ፔሌቴና ዛዛ ጌይንታ ላምዖ ዓቲንቁ ናይስኬንሢ ሾዔኔ፤ ዪንሢ ቢያ ዪራህሜዔሌ ዜርዖኩ።

34 ዔሻኔኮ ዉዲሮ ናይዳፓ ዓታዛ ዓቲንቁ ናይ ባኣሴ፤ ዲዛኮ ያሬሃዔ ጌይንታ ፔቲ ጌብፃ ዓሲታዖ ማዶ ማዳሰኬይ ዓኣኔ፤ 35 ዪያ ማዳሢም ዒዚ ፔኤኮ ዉዲሮ ናኣቶይዳፓ ፔቲዛ ማቾ ማሂ ዒንጌኔ፤ ዪካፓ ያሬሃዔ ዓታዩ ጌይንታ ዓቲንቁ ናይ ሾዔኔ፤ 36 ዓታዩይዳፓ ዳንዲ ዔልሻማዔ ሄላንዳኣና ዋሊ ሄሊ ሄሊ ኬስኬ ሾይንታ፡- ዒታዩ፡ ናኣታኣኔ፡ ዛባዳ፡ 37 ዔፕላሌ፡ ዖቤዳ፡ 38 ዪሁ፡ ዓዛሪያ፡ 39 ሄሌፃ፡ ዔልዓሳ፡ 40 ሲሰማዩ፡ ሻሎሜ፡ 41 ዪቃምያንታ ዔሊሻማዔንታኩ።

ዓቲ ሃሣ ካኣሌቤ ዜርዖ

42 ዪራህሜዔሌኮ ጌርሲ ማዔ ካኣሌቤኮ ቶይዶ ናዓሢኮ ሱንፃ ሜሻዔ ጌይንታኔ፤ ዪይ ሜሻዔ ዚፔ ጌይንታ ዓቲንቁ ናይ ሾዔኔ፤ ዪካፓ ዚፔ ማሬሻኔ ሾዓዛ፡ ማሬሻኔ ሃሣ ኩብርኣኔ ሾዔኔ። 43 ኩብርኣኔ፡- ቆራሄ፡ ታፑሃ፡ ሬቁሜንታ ሺማዔ ጌይንታ ዖይዶ ዓቲንቁ ናይ ሾዔኔ። 44 ሺማዔያ ራሃሜ ሾዓዛ፡ ራሃሜ ዮርቁዓሜ ሾዔኔ፤ ሺማዔኮ ጌርሲ ሬቁሜ ሻማዩ ሾዔኔ፤ 45 ሻማዩ ማዖኔ ሾዓዛ፡ ማዖኔ ቤትፁሬ ሾዔኔ።

46 ካኣሌቤኮ ዔጋገ ጌይነታ ሜሌ ላኣሊሰኩና ዓኣኔ፤ ዒዛይዳገ ካኣሌቤኦ- ሃራኔ፣ ሞፃነታ ጋዜዜ ጌይነታ ሜሌ ሃይሃ ዓቲንቄ ናይ ሾዔኔ፤ ሃራኔ ሃሃ ጋዜዜ ጌይነታ ሜሌ ዓቲንቄ ናይ ሾዔኔ።

47 ያህዳዬ ጌይነታ ዓሢ፡- ሬጌሜ፣ ዮታሜ፣ ጌሻኔ፣ ፔሌፃ፣ ዔጋገና ሻዓፔ ጌይነታ ላሆ ዓቲንቄ ናይ ሾዔኔ።

48 ካኣሌቤኮ ማዕካ ጌይነታ ሜሌ ላኣሊሰኩና ዓኣነቴ ዒዛይዳገ ዒ ሹቤሬና ቲርሃ ጌይነታ ላምዎ ዓቲንቄ ናይ ሾዔኔ፤

49 ዬና ላኣሌላ ናንጊቤቃ ጊንፃገገ ሜሌ ላምዎ ዓቲንቄ ናይ ሾዔኔ፤ ዔያቶኮ ቶይዳሢ ማድማና ጌይነታ ካታሞ ማዜ፣ ሻዓፔ ማዓዛ ላምዓሳሢ ሃሃ ማክቢና ጊቢዓ ጌይነታ ላምዎ ካታሞንሢ ማዜ፣ ሻሞኬ።

ቃሲ ሃሃ ካኣሌቤኮ ዓክሳ ጌይነታ ፔቴ ዉደሮ ናይሰኩና ዓኣኔ።

50 ሃካገ ሊካ ዴማ ገይዲነታዞንሢያ ካኣሌቤ ዜርፆኬ፡- ካኣሌቤ ፔኤኮ ማቕ ዔፕራታይዳገ ሾዔ ቤርታሳ ናዓሢ ሁሬ ማዓዛ ሁሬኮ ናኣዚ፣ ቂሪያትይዓሪሜኮ ዓዴ ሾባሌኬ፤ 51 ሁሬኮ ላምዓሳ ናዓሢ፣ ሳልሞኔ ቤቴልሃሜኮ ዓዶ ማዓዛ ሃይሃሳ ናዓሢ ሃሬፔ ቤትጋኣዴሬ ዓዶኬ።

52 ቂሪያትይዓሪሜ ዓዶ፣ ሾባሌኮ ሜሌ ናይ ዓኣኔ፤ ዬያታ፡- ሄሮዔቴና ሜንሆቴ ቶኦኮኮ ዛሎኬ። 53 ዬያጉዲ ሃሃ ቂሪያትይዓሪሜይዳ ናንጋ ዩትራ ዓሳ፣ ፑታ ዓሳ፣ ሹማታ ዓሶና ሚሽራዓ ዓሶ ጌይነቴ ዔኤሊነታ ዜርፆኮ ቤርታሳ ዓዳሢ ሾባሌኬ፤ ዬያቶይዳገ ሃሃ ፆርዓና ዔሽታፆሌ ጌይነታ ቶኦካ ኬሰኬኔ።

54 ቤኤቴሌሄሜ ካታሞ ማዜ፣ ሳልሞኔ ናኣታ፡- ኔፆገ ዓሶንታ ዓፃሮት ቤቴዮዓቤነታ ሜናሃ ዓሶኮ ዛሎንታ ፆርዓ ዓሶንታኬ።

55 ቲርዓ ዓሶንታ ሺምዓ ዓሶንታ ሱካ ዓሶ ጌይነታ ቶኦኮንሢ ሃይሴ ፃኣፒሢና ጊንሢ ሃሃ ጊዳገ ዔኪ ዲቢሺ ፃኣፒሢኮ ዔራቶ ዓኣያ፣ ያቤፃ ጌይነታ ዳካ ካታማሰኬማይዳ ናንጋያኬ፤ ዔያታ ሬካቤ ዓሶኮ ዓዶ፣ ሃሜቴና ሞላ ዔፔ ዛላና ካኣሚያ ቄና ዓሶኬ።

3

ካኣቲ ዳውቴ ናኣቶ

1-3 ዳውቴ ኬብሮኦኔይዳ ዓኣፃ ሾዔ ዓቲንቆ ናኣታ ሞሊ ጊንፆ ሃካገ ዴማ ገይዲነታኔ፡-

ዒይዚራዔኤሌ ዓጮ ዓቤላ ዓሢኖዓማ ሾዔ ቶይዳሢ ዓምኖኦኔ፣ ቂርሜሎሴ ላኣሌሎ ዓብጋይሎይዳገ ሾይነቴ ዳኣኔኤሌ፣ ጌሹሬ ካኣቲ ታልማዬ ናኣ ማዕካ ሾዔ ዓቤሴሎሜ፣

ሃጊታ ሾዔ ዓድኒያሴ፥
ዓቢፃላ ሾዔ ሼፓዲያ፥
ዔግላ ሾዔ ዪትሬዓሚንታኬ፤

4 ዩንሢ ላሆ ናኣቶ ዒ ሾዔሢ ኬብርኣኔይዳ ናንጌ ዎድናኬ፤ ዳውቴ ኬብርኣኔይዳ ናንጌ ላንካይ ለዔና ዛላና ዓጮ ዎይሄኔ።

ዬካፓ ዳውቴ ዬሩሳላሚይዳ ናንጌ ሃይሢታሚ ሃይሦ ለዔ ዎይሄኔ፤ 5 ዬሮ ቤዘይዳኣ ዒዚ ሚርጌ ዓቲንቄ ናይ ሾዔኔ።

ዒዘኮ ማቻ፥ ዓሚዔኤሌ ናኣ፥ ቤርሳቤ ዒዛሞ፡- ሺሞዓ፥ ሾባቤ፥ ናኣታኔና ሴሎሞኔ ጌይንታ ያይዶ ዓቲንቄ ናይ ሾዔኔ።

6 ዩንሢ ሌሊቱዎንቴ ሜሌ ዒዘኮ ታዘጸ ዓቲንቄ ናይያኣ ዓኣኔ፤ ዬያታ፡- ዪብሃሬ፥ ዔሊሹዓ፥ ዔሊፓሌ፤ 7 ናጋሄ፥ ኔፔጌ፥ ያፒዓ፥ 8 ዔሊሻማዓ፥ ዔሊያዳዔና ዔሊፔሌ፤ ጌይንታያኬ፤ 9 ሃሣ ዩንሢዳፓ ሜሌ ሃንጎ ላኣሊና ሾዶና ዓቲንቄ ናይ ዓኣኔ፤ ዒዘኮ ቲዕማሮ ጌይንታ ዉድሮ ናይሰከናኣ ዓኣኔ።

ካኣቲ ሴሎሞኔ ዜርዖ

10 ካኣቲ፥ ሴሎሞኔኮ ሾይንቶ ዜርዖ ዎሊ ሄሌ ጎይዖ ሃካፓ ዴማ ፓይዲንታኔ፤ ሴሎሞኔ፥ ሮቢዓሚ፥ ዓቢያ፥ ዓኣሳ፥ ዒዮሳፒ፤ 11 ዒዮራሚ፥ ዓካዚያሴ፥ ዒዮዓሴ፥ 12 ዓሚሲያሴ፥ ዓዛሪያሴ፥ ዒዮዓታሚ፥ 13 ዓካኣዜ፥ ሂዚቂያሴ፥ ሚናኣሴ፥ 14 ዓሞኣኔንታ ዒዮሲያሴንታኬ፤ 15 ዒዮሲያሴኮ ናኣዚ ቶይዲ ዮሃናኔ፤ ሄሌ ጌኤዚ ዒዮዓቁሚ፤ ሃይሣሳሢ ሴዴቂያሴ ማዓዛ ያይዳሳሢ ሻሉሜኬ፤ 16 ዒዮዓቁሚ ዒኮኒያኔና ፄዴቂያ ጌይንታ ላምዖ ዓቲንቄ ናይ ሾዔኔ።

ካኣቲ ዒኮኒያኔ ዜርዖ

17 ባብሎኔ ዓሳ ያሎና ባሺ ዲዒ ዔኪ ቱኡሲ ዓሲ ማሄ ካኣቲ፥ ዮዓኪኔኮ ዜርዖ ሃይማፓ ዴማ ዓኣዘንሢኬ፤ ዒዚ፥ ዮዓኪኔ ላንካይ ዓቲንቄ ናይ ሾዔኔ፤ ዔያታኣ፡- ሳላቲያሌ፥ 18 ማልኪራሚ፥ ፔዳያ፥ ሸናፃሬ፥ ዪቃሚያ፥ ሆሻማዓና ኔዳቤ ጎዎዘንሢኬ። 19 ፔዳያ ዜሬባቡሌና ሺሞዒ ጌይንታ ላምዖ ዓቲንቄ ናይ ሾዔኔ፤ ዜሬባቡሌኮ ሃሣ ሜሹላሚና ሃናኒያ ጌይንታ ላምዖ ዓቲንቄ ናይና ሹሎሚቶ ጌይንታ ዉድሮ ናይያኣ ዓኣኔ። 20 ዬያጉዲ ሃሣ ፔዳያኮ ሜሌ ዶንጎ ዓቲንቄ ናይ ዓኣያ ማዓዛ ዔያታ፡- ሃሹባ፥ ዓሄሌ፥ ቤሬኪያ፥ ሃሳድያና ዩሻብሄሴይ ጌይንታያኬ።

3:4 3:4 2ሳሙ. 5:4-5፤ 1ካኣቶ. ማ 2:11፤ 1ያሕሲ. ዓሃኬ 29:27። 3:5 3:5 2ሳሙ. 11:3።

21 ሃናኒያ ፔላዲና ዪሻዕያ ጌይንታ ላምዎ ዓቲንቄ ናይ ሾዔኔ፤ ዪሻዕያ ሬፓያ፤ ሬፓያ ዓርናኔ፤ ዓርናኔ ዓብዲዩኔ፤ ዓብዲዩኔያ ሹካኒያ ሾዔኔ። 22 ሹካኒያ ሹማዒያ፤ ሹማዒያ፡- ሃፁሹ፡ ዩጋሌ፡ ባሪያሄ፡ ኔዓሪያና ሻፓጃ ጌይንታ ደንጎ ዓቲንቄ ናይ ሾዔኔ፤ ዬያር ሹካኒያኮ ዜርፃ ዎሊ ዑፃ ላሆኬ፤ 23 ኔዓሪያ፡- ዔልዮዔናዬ፡ ሂዚቂያሴንታ ዓዘሪቃሜ ጌይንታ ሃይሃ ዓቲንቄ ናይ ሾዔኔ፤ 24 ዔልዮዔናዬያኦ፡- ሆዳውያ፡ ዔሊያሺቤ፡ ፔላያ፡ ዓቁቤ፡ ዮሃናኔ፡ ዴላያንታ ዓርኒ ጌይንታ ላንካይ ዓቲንቄ ናይ ሾዔኔ።

4

ዪሁዳ ማእር ዜርዖ

1 ዪሁዳኮ ዜርዖ፡- ፓሪሴ፡ ሄጂሮኔ፡ ካርሚ፡ ሁሪና ሾባሌናኬ።
 2 ሾባሌ ሬዓያ፤ ሬዓያ ያሃቲ ሾዔኔ፤ ዬይ፡ ያሃቲ ዖርዓይዳ ናንጋ ዓሶኮ ቤርታሳ ዓደንሂ ማዔ ዓሁማዬና ላሃዴ ጌይንታዘንሂ ሾዔኔ። 3-4 ሁሪ ካኣሌቤና ካኣሌቤኮ ማቾ ዔፕራታናኮ ቶይዶ ናዓሂኬ፤ ቤኤቴሌሄሜ ካታሞ ማዜዘንሂ ዒዛ ፃጶኬ፤ ዬይ፡ ሁሪ፡- ዔፃሜ፡ ፔኑዔሌና ዔዜሪ ጌይንታ ሃይሃ ዓቲንቄ ናይ ሾዔኔ፤ ዔፃሜ፡- ዒይዚራዔኤሌ፡ ዒሻማ፡ ዔድባሻንታ ጌዶሪ ካታሞ ማዜ፡ ፓኑዔሌንታ ሁሻኔ ካታሞ ማዜ፡ ዔፃፊ ሾዔኔ፤ ዬያቶኮ ሃፅሌልፓኖ ጌይንታ ጌርሰኬና ዓኣኔ።

5 ቴቆዓኔ ካታሞ ማዜ፡ ዓሽሁሪኮ ሄላና ናዕራ ጌይንታ ላምዎ ላኣሊሰኬንሂ ዓኣኔ፤ 6 ዓሹሪ ናዕራይዳፓ፡- ዓሁዛሜ፡ ሄፔሪ፡ ቴሚኒና ዓሃሽታሪ ጌይንታ ዖይዶ ዓቲንቄ ናይ ሾዔኔ፤ 7 ሃሃ ሄላ ጌይንታ ማቾይዳፓ፡- ጃሪቴ፡ ዪፅሃሪና ዔትናኔ ጌይንታ ሃይሃ ዓቲንቄ ናይ ሾዔኔ።

8 ቆጃ ጎዖሂ ዓኑቤና ዖባቤ ጌይንታ ላምዎ ዓቲንቄ ናይ ሾዔኔ፤ ዬይ ቆጃ ሃሩሜ ናኣዚ ዓሃርሄሌ ዜርዖ ማዔዘንሂኮ ቤርታሳ ዓዳሂኬ።

9 ቆጃ ዜርዖ ባኣካ ሚርጌና ቦንቹንታ ያዕቤፃ ጌይንታ ፔቴ ዓሲ ዓኣኔ፤ ዒዚ ሾይንቲ ዎዶና ዒዛኮ ዒንዳ ሾይዖና ሚርጌ ሜታዴሂር ሱንዖ ዒዛኮ «ያዕቤፃ» ጌይ ጌሂኔ፤ 10 ፔቴ ኬሊ ያዕቤፃ፡- «ታ ያኣዛሂያ! ታና ዓንጃ፤ ዳልጌ ዓጪ ታኣም ዓንጌ፤ ፔቴታዎ ታጌዳፓ ዲሚዲፓ፤ ታና ሜታሳኒ ዳንዳዓ ዓይጎዎ ፑርታ ባኣዚፓ ታና ካፔ» ጌይ ዒሰራዔኤሌ ያኣዛሂ ሺኢቁም፡ ያኣሲያ ዒ ሺኢቁሂጉዲ ዒዛም ዎይዜኔ።

11 ሹሃኮ ጌርሲ ካሉቤ ማሂሪ ጌይንታ ፔቴ ዓቲንቁ ናይ ሾዓዛ፣ ማሂሪያ ዔሽቶኔ ሾዔኔ፤ 12 ዔሽቶኔ ሃሣ ቤትራፓ፣ ፓሴሃና ቴሂና ጌይንታ ሃይሣ ዓቲንቁ ናይ ሾዔኔ፤ ቴሂና ናሃሼ ጎዖ ካታማ ማዜኔ፤ ዩንሢ ዜርፃ ሬካ ጌይንታ ዓጪዳ ናንጋኔ።

13 ቁናዘማ ዖትኒዔኤሌና ሴራያ ጌይንታ ላምዖ ዓቲንቁ ናይ ሾዔኔ፤ ዖትኒዔኤሌያ ሃታቴና ማዖኖታዬ ጌይንታ ላምዖ ዓቲንቁ ናይ ሾዔኔ፤ 14 ማዖኖታዬ ዖፕራ ሾዔኔ።

ሴራያ ዔኤቢ ኮሺሢ ሃአማቶ ማዶና ዔርቴ ዓሳ ናንጋ ቤዘ «ሃአሞ ዶኤጮ» ጌይንታ ካታማ ማዜ፣ ዒዮዓቤ ሾዔኔ።

15 ዪፑኔ ናአዚ ካአሌቤያ፡- ዒሩ፣ ዔላና ናዓማ ጌይንታ ሃይሣ ዓቲንቁ ናይ ሾዔኔ፤ ዔላ ቁናዜ ሾዔኔ።

16 ዪሃልዔሌ ጎዖሢ፡- ዚፔ፣ ዚፓ፣ ቲሬያና ዓሳርዔሌ ጌይንታ ዖይዶ ዓቲንቁ ናይ ሾዔኔ። 17-18 ዔዘራ፡- ዬቴሬ፣ ማሬዴ፣ ዔፔሬና ያሎኔ ጌይንታ ዖይዶ ዓቲንቁ ናይ ሾዔኔ። ማሬዴያአ ቤትያ ጌይንታ፣ ጌብጸ ካአቲ ናዎ ዔኪ ማይራሞ ጌይንታ ዉዱሮ ናይሰኬኖና ሻማይንታ ዩሽባሄ ጌይንታ ላምዖ ዓቲንቁ ናይ ሾዔኔ፤ ዩሽባሄ ዔሽቲሞዓ ጌይንታ ካታማ ማዜኔ፤ ማሬዴያ ጊንሣ ዪሁዳ ያጻፓ ፔቴ ላአሊ ዔኪ ጌዶሬ ካታሞ ማዜ፣ ዬሬዴ፤ ዬያጉዲ ሃሣ ሶኮ ካታሞ ማዜ፣ ሄቤሬና ዛኖሃ ካታሞ ማዜ ቁቲዔሌ ጎዖሢ ሾዔኔ።

19 ሆዲያ ናሃሚኮ ጌር ዔኬኔ፤ ዒዛ ዜርፃ፡- ቁዒላ ካታማ ናንጋ ጋርማ ቶኦኮና ዔሽቲሞዓ ካታማ ናንጋ ማዕካቴ ቶኦኮኮ ማዖንሢኬ።

20 ሺሞኔያ፡- ዓሞኖኦኔ፣ ሪና፣ ቤንሃኔና ቲሎኔ ጌይንታ ዖይዶ ዓቲንቁ ናይ ሾዔኔ።

ዩሽዒ፡- ዘሄቴና ቤንዘሄቴ ጌይንታ ላምዖ ዓቲንቁ ናይ ሾዔኔ።

ሼኤላ ዜርፃ

21 ሼኤላ ዪሁዳኮ ዓቲንቆ ናአቶይዳፓ ፔቴሢ ማዓዛ ዒዛኮ ዜርፃ ለካኔ ካታሞ ማዜ ዔሬ፣ ማሬሻ ካታሞ ማዜ ላዕዳ፣ ቤትዓሽቤዓ ካታማ ናንጋ ሻኦፕ ሚዛጸ ዓፒሎ ዲዓ ቶኦኮ፤

22 ዮቁማና ኮዚባ ካታሞይዳ ናንጋ ዴራ ሞዓኦቤ ዓጮ ላአሌሎ ዔኪ ቤኤቴሌሄማይዳ ማዜ ዒዮዓሴና ሳራፔናኬ፤ [ዬያቶ ዓሶ ዛሎ ሃይሳ ሚናፓ ኬኤዘንቲ ዓኣያኬ] 23 ዔያታ ካአቲሞ ማኦርይዳ ዲማ ዲማ ባአዚ ዓጪና ማዛያ ኔፃዒማና ጌዴራ ጌይንታ ካታማይዳ ናንጋ ማኒኬ።

ሲሞኦኔ ዜርፃ

24 ሲሞክኑ ጎሥሂ ኔሙዔኤሌ፡ ያሚኔ፡ ያሪቤ፡ ዜራሃና ሻዑሌ
 ጌይንታ ደንጎ ዓቲንቄ ናይ ሾዔኔ፤ 25 ሻዑሌ፡- ሻሉሜ ሾዓዛ
 ሻሉሜ ሚብሳሚ ሾዔኔ፤ ሚብሳሚ ሃሣ ሚሸማዔ ሾዔኔ፤
 26 ሚሸማዔ ሃሙዔኤሌ፡ ሃሙዔኤሌ ዛኩሬ፡ ዛኩሬ ሺምዒ
 ሾዔኔ፤ 27 ሺምዒ፡- ታጳ ላሆ ዓቲንቄና ላሆ ዉዲሮ ናይና ሾዔኔ፤
 ዒዛኮ ጌርሲንሂ ጋዓንቲ ሚርጌ ናይ ሾይባኣሴ፤ ዩያሮ ሲሞክኑ ፃጳ
 ዪሁዳ ፃጳጉዲ ዲቢባኣሴ።

28 ዴንዲ ዳውቲ ካኣታዴ ዎዶ ሄላንዳኣና ሲሞክኑ ዜርፃ
 ናንጌሢ፡- ቤርሳቤ፡ ሞላዳ፡ ሃፃርሹዓሌ፡ 29 ቤልሃ፡ ዔፃሚ፡ ቶላዴ፡
 30 ቤቱዔሌ፡ ሆርማ፡ ፂቅላጌ፡ 31 ቤትማርካቦቲ፡ ሆፃር ሱሲሚ፡
 ቤትቢሪና ሻዕራይሚ ካታሞይዳኬ፤ 32 ዩያጉዲ ሃሣ ዔፃሚ፡
 ዓይኔ፡ ሪሞኔ፡ ቶኬኔና ዓሻኔ ጌይንታ ሚሌ ደንጎ ዳካ ዳካ
 ካታማሰኩንሂዲ፡ 33 ኮይሎይዳ ዓኣ ጉርዶይዳኣ ናንጌኔ፤ ዩይ
 ዔያታ ናንጌ ቤዛ ደኣሎ ዛሎና ዴንዲ ባዕላቲ ካታሞ ሄላኔ።
 ሲሞክኑ ዜርፃ ፔኤኮ ማኣሮ ዓሶንታ ዔያታ ናንጌ ቤዛንታ ዛሎ ፃኣፒ
 ጌሣሂ ያዲኩ።

34 ዲማ ዲማ ቶኦኮኮ ሱኡጋ ሃይካፓ ሊካ ፓይዲንታዞንሂኩ፡-
 ሚሸባቤ፡ ያሞሌኬ፡ ዓሚሲያሴ ናኣዚ ዮሻ፡

35 ዮዔሌ፡ ዮሺቢያ ናኣዚ ዒዩ፡ [ሴራያ ናኣዚ ዮሺቢያ፡ ዓሴዔሌ
 ናኣዚ ሴራያ፡]

36 ዔልዮዔናዩ፡ ያዕቆባ፡ ዩሾሃያ፡ ዓሳያ፡ ዓዲዔኤሌ፡ ሺሚዔኤሌ፡
 ቤናያ፡

37 ሺፒዒ ናኣዚ ዚዛ፡ ዩዲያንታ ሺምሪንታ ሺማዒያንታ ዜርሣ
 ማዔ ዓሎኔ ናኣዚ ሺፒዓንታኩ።

38 ዩንሂ ዓሶኮ ማኣሮ ዓሳ ሚርጌ ሚርጌ ዴንዴኔ፤ 39 ዩያሮ ዔያታ
 ፔኤኮ ቆልሞ ሄንቆ ቤሲ ኮዒ ዔያታ ናንጋ ቤዛኮ ዓባ ጌላ ዛሎና
 ዴንዲ ጌራሬ ሄላንዳኣና ዴዔኔ፤ ዩካ ደኣጮኮ ዓባ ኬሰካ ዛላ ጌራሬ
 ካታማ ዓኣ ዛሎና ቆልሞ ዔያታ ሄንቆ። 40 ዩና ቤዜላ ዔያቶ ዲቃሣ
 ባኣዚባኣ ፔጌ ቤሲኬ፤ ዒኣካ ዔያታ ቆልማ ሄንቆንዳ ዓኣዔ ማኣቲ
 ዓኣ ቤሲ ሚርጌ ዴንቄኔ፤ ቤርታ ዩኖ ቤዜይዳ ናንጋ ዴራ ካኣሚ ዓሶ
 ጌይንታ።

41 ዪሁዳ ካኣቲ፡ ሂዚቂያሴ ካኣታዴ ዎዶና ዩና ኬኤዚንቲ ዓሳ
 ጌራሬ ዓጮ ዴንዲ ዒኣካ ናንጋ ዓሶኮ ዓፒሎና ማዦና ማኣሮንታ
 ማኣቶ ማኣሮሞ ቢያ ሻሂኔ፤ ሃሣ ካኣሚ ፃጳንታ ሚዑና ዓሶሞ
 ዓይሱሞ ጋፒሲ ዎዶ ፔኤኮ ቆልሞም ሚርጌ ሄንቆ ቤሲ ዴንቄሂሮ
 ዒኣካ ዓኣ ዓሶ ዳውሲ ዳኪ ፔኤሮ ዒኣካ ቤዛ ናንጌሂ ዓርቄኔ።

42 ሲሞክኔ ዜርዖይዳፓ ደንጎ ጻኤታ ማዓ ዓሲ ዔደኦሜ ዲኮ ባንሢ ዴንዴኔ፤ ዔያቶ ሱኡጌ ማዒ ዔኪ ዓኣዴዘንሢ ጸሽዒ ናኣቶ ፔላዲያ፤ ኔዓሪያ፤ ሬፓያና ዑዚዔኤሌናኬ፤ 43 ዔያታ ዒኢካ ባቲ ዓኣ ዓማሌቄ ዓሶ ዎዲ ጋፒሲ፤ ሃኖ ሄላንዳኣና ዒኢካ ናንጋኔ።

5

ሮኦቤኤሌ ዜርዖ

1 ዒሰራዔኤሌኮ ናኣዚ ቶይዲ፤ ሮኦቤኤሌኮ ዜርዖ ሃይካፓ ዴማ ፓይዲንታዘንሢከ፤ [ሮኦቤኤሌ ዒሰራዔኤሌኮ ናኣዚ ቶይዲታዖ ዒንድ ሌጎ ዓርቂ ዒኢሴሢሢሮ ቶይዲታ ዮሴፔ ናኣቶሞ ዒንገንቴኔ፤ ዬያሮ ዔያቶኮ ቶይዲማ ዔያታ ዎሊ ሄሊ ሾይንቴ ጎይዖ ዓኣዲኒ ዴንዳዒባኣሴ። 2 ሃዴቶዎ ቢያፓ ባሼ ደዲ ማዔሢና ፃጰ ቢያኮ ሱኡጌ ማዔ ዓሲ ጰዴሢ ዪሁዳ ፃጰፓኬ፤] 3 ያይቆኦቤኮ ናኣዚ ቶይዲ፤ ሮኦቤኤሌ ዖይድ ዓቲንቁ ናይ ሾዔኔ፤ ዔያታ፡- ሃኖኬ፤ ፓሉ፤ ሄዲሮኔና ካርሚ ጌይንታያኬ። 4-6 ሾይንታፓ ማሌ ሾይንቴ ሄላንዳኣና ናንጌ ዮዔኤሌ ዜርዖ፡- ሸማዒያ፤ ጎጊ፤ ሸሞዒ፤ ሚካ፤ ሬዓያ፤ ቤዓሌና ቤዔራናኬ፤ ዓሶኦሬ ካኣቲ ቲግላቶፔሌሴሬ ሮኦቤኤሌ ቶኦኮኮ ሱኡጋሢ ማዔ ቤዔራ ዓርቂ ዲዒ ዔኪ ዓኣዴኔ።

7 ማኣሮ ዓሶኮ ፃኣፒንቴ ሱንፃ ዛገንቴ ጎይዖና ሮኦቤኤሌ ፃጰኮ ቶኦኮ ቶኦኮኮ ሱኡጎ ማዔዘንሢ፡- ዒዩዔኤሌንታ ዛካሪያሰንታ፤ 8 ዒዩዔኤሌ ዜርዖፓ ሸማዒኮ ናኣዚ ናዖ፤ ዓዛዜ ናኣዚ ማዔ ቤላዔንታኬ፤ ዬና ቶኦካ ናንጋ ቤዛ ዓሮዔኤሪና ዬያኮ ኬዶ ዛሎና ኔቦና ባዓልሚያን ዓጮ ሄላንዳኣናኬ፤ 9 ዔያቶኮ ጌሌዓዴ ዓጮይዳ ሚርጌ ቆልሞ ዓኣሢሮ ዓባ ኬሰካ ዛሎና ዴንዲ ዔፕራዲሴ ዎሮ ሄላንዳኣና ፒዲ ጌይ ዓኣ ዓሲ ናንጉዎ ዳውሎ ቢያ ዔያታ ዓርቂ። 10 ካኣቲ ሳኣዖኦሌ ዎድና ሮኦቤኤሌ ፃጰ ሃጋራ ዓሶ ዖሊ ቢያ ዎዲ ኩርሴኔ፤ ጌሌዓዴኮ ዓባ ኬሰካ ዛሎና ዓኣ ዬያ ዓሶኮ ቤዛ ፔ ዓጪ ዔያታ ማሃኔ።

ጋኣዴ ዜርዖ

11 ጋኣዴ ፃጰ፡- ሮኦቤኤሌ ፃጰ ናንጋ ቤዛኮ ኬዶ ዛሎና ዓኣ ዓጮይዳ ናንጋኔ፤ ዬይ ዓጫ ባኣሳኣኔ ዓጮ ጋራ ዓኣያ ማዓዛ ዓባ ኬሰካ ዛሎና ዴንዲ ሳሌካ ሄላኔ። 12 ዒዩዔኤሌ ቢያፓ ባሼ ዜርዖኮ ዓድኬ፤ ሄሊሳዖ ሻፓሚ ዒዛኮ ዴማ ሄሊሲ ዓኣ ቶኦኮኮ ዓድኬ፤ ያዕናዬና ሻፓፃና ባኣሳኣኔይዳ ናንጋ ሃንጎ ቶኦኮኮ ማዖንሢኬ፤

5:1 5:1 ማኸ. ማፃ 35:22፤ 49:3-4። 5:2 5:2 ማኸ. ማፃ 49:8-10። 5:4-6 5:4-6 2ካኣቶ. ማ 15:29።

13 ሜሌ ዓቲ ዬኖ ፃጸ ዓሲ ማዔ ዓሳ፡- ሚካዔኤሌ፡ ሚሹላሚ፡ ሹባዒ፡ ዮራዬ፡ ያዕካኔ፡ ዚዓና ዔቤሬ ጌይንታ ላንካዎ ቶኦካኦ ዬኖ ዓሶና ዎላኬ፤ 14 ዔያታ ሁሬ ናኦዚ ዓቢሃይሌ ዜርዎ ማዓዛ ዔያቶኮ ቤርታሳ ዓደንሢ፡- ዓቢሃይሌ፡ ሁሪ፡ ያሮሃ፡ ጌሌዓዴ፡ ሚካዔኤሌ፡ ሹሻዬ፡ ያህዶና ቡዜናኬ፤ 15 ጉኒኮ ናኦዚ ናሳሢ፡ ዓብዲዔሌ ናኦዚ፡ ዓሃ ዬንሢ ቢያ ቶኦኮኮ ሱኡጋሢ፤ 16 ዬያታ ቢያ ባኦሳኦና ጌሌዓዴ ዓጮ ደማ ዓኦ ደኮ ደኮ ካታሞና፤ ዬያጉዲ ሃሣ ሳኦሬ ዓጮይዳ ቆልማ ሄንቃ ቤዞ ቢያይዳ ናንጋኔ። 17 ዬይ፡ ማኦር ዓሶኮ ሱንዎ ፃኦፕ ዓርቆና ባካ ገኦገሹንቴሢ ዪሁዳ ካኦቲ ዒዮዓታሜና ዒሰራዔኤሌ ካኦቲ ዒዮርቢዓሜ ዎዶናኬ።

ዓባ ኬሰካ ዛሎና ዓኦ ፃጸኮ ዖሎ ዓሶ

18 ሮኦቤኤሌንታ ጋኦዴንታ ዓባ ኬሰካ ዛሎና ዓኦ ሚናኦሴ ፃጸ ሄካሢንታኮ ገቲማና ጨንቻ ዓፓሮና፤ ዬያጉዲ ዓኦዛና ኮሺ ዖልቲ ዔሬ ዖይዲታሚ ዖይዶ ሹያና ላንካይ ፃኤታና ላሂታሚ ፖኦሊሴ ዓኦኔ፤ 19 ዔያታ ሃጋራ ፃጸ ማዔ፡- ዬጹሬ፡ ናፒሹንታ ኖዳቤ ዴሮ ዖላኒ ዴንዴ። 20 ዔያታ ዖኦሲ ጉሙርቂ ዒዚ ዔያቶ ማኦዳንዳጉዲ ሹኦቄ፤ ዬያሮ ዖኦሲ ሹኦዲ ዔያቶኮ ዎይዚ ሃጋራ ዓሶንታ፡ ዬያቶ ዛላ ማዒ ዖላ ላኅዎ ባሹሲኤ፤ 21 ዬያ ሞርኮ ኩጫፓ ደንገታሚ ሹያ ጋኦሎ፡ ላሞዎ ፃኤታና ደንገታሚ ሹያ ማራይና ላሞዎ ሹያ ሃሬ ዲዒ ዔያታ ዔኬ፤ ዬያጉዲ ፔቲ ፃኤታ ሹያ ዓሲያኦ ዲዒ ዔኬ። 22 ዖላ ዖኦሲሮ ማዔሢሮ ሞርኮ ዛላፓ ሚርጌ ዓሲ ዔያታ ዎዴ፤ ዬካፓ ዔያታ ገንሣ ፔኤሮ ዖልዚና ባሹንቲ ዲዒንታንዳያ ሄላንዳኦና ዬኖ ዓጮሎይዳ ናንጌኔ።

ዓባ ኬሰካ ዛሎና ዓኦ ሚናኦሴ ፃጸ

23 ዓባ ኬሰካ ዛላ ዓኦ ሚናኦሴ ፃጸኮ ሄካሢ ኬዶ ዛሎና ዴንዲ ባዓልሄርሞኔ ሄላኔ፤ ዬካፓ ዴንዲ ሴኒሬና ጋዓዎ ሄርሞኔ ዴኮ ሄላ ባኦሳኦና ዓጮይዳ ናንጋኔ፤ ዔያቶኮ ዴራኦ ሚርገ ሚርገ ዴንዴ፤ 24 ዬያቶ ቶኦኮኮ ሱኡጋ፡- ዔፔሬ፡ ዩሽዒ፡ ዔሌዔኤሌ፡ ዓዘሪዔኤሌ፡ ዔርሚያሴ፡ ሆዳሙያና ያህዲዔኤሌናኬ፤ ዬያታ ቢያ ቶኦኮኮ ሱኡጎና ዖሎ ሱኡጌያ ማዒ ዔርቲ ዓሶኬ።

ዓባ ኬሰካ ዛሎና ዓኦ ፃጸኮ ዲዒንቶ

25 ያዲ ማዔቲያ ዴራ ዔያቶኮ ቤርታኦ ዓደንሢ ዖኦዛሣሞ ጉሙርቂንታያ ማዒባኦ፤ ዔያታ ዎይቲይ ጌዔቲ ዖኦሲ ካኦሽኪዎ ሃሺ ዔያታ ዓኦ ዓጮሎይዳፓ ዖኦሲ ባይዜ፡ ሜሌ ዴራ ካኦሽካ ዖኦዞ ዚገ ካኦሽኬ፤ 26 ዬያሮ ዒሰራዔኤሌ ዖኦሲ ዔያቶይዳ ፑሌ፡ ሃሣ ባኅ ሱንዎ ቲግላትፔሌሴሬ ጌይንታ ዓሶኦሬ ካኦቲ ዔቂሲ ዓጮ

ዔያቶኮ ዓይሣኔ፤ ዬያይዲ ቲግላትፔሌሴሬ ሮኦቤኤሌንታ ጋኣዳንታ
ዓባ ኬሰካ ዛሎዶዳ ዓኣ ሚናኣሴ ፃጸኮ ሄካሣ ዲዒ ዔኪ ሃላሃ፤
ሃቦሬንታ ሃራንታ፤ ዬያጉዲ ጎዛኔ ዎሮ ዓጫ ዔያታ ሃሮ ሄላንዳኣና
ናንጋንዳጉዲ ማሄኔ።

6

ቄኤሶ ቢያኮ ሱኡጎ ማኣሮ ዓሶ

1 ለዊ ሃይሃ ዓቲንቄ ናይ ሾዔኔ፤ ዔያታ፡- ጌርሾኔ፡ ቄዓቲና ሜራሪ
ጎያያኬ፤ 2 ቄዓቲ፡- ዓምራሜ፡ ዪፅሃራ፡ ኬብሮኦኔንታ ዑዚዔሌ ጌይንታ
ዖይዶ ዓቲንቄ ናይ ሾዔኔ።

3 ዓምራሜያ ዓኣሮኔና ሙሴ ጌይንታ ላምዖ ዓቲንቄና ማይራም
ጌይንታ ፔቲ ዉዲሮ ናይ ሾዔኔ።

4 ዓኣሮኔ፡- ናኣዳኣቤ፡ ዓቢሁ፡ ዓላዜሬንታ ዒታማሬ ጌይንታ ዖይዶ
ዓቲንቄ ናይ ሾዔኔ።

4 ዓላዜሬ ፒንሃሴ ሾዔኔ፤ ፒንሃሴ ዓቢሹዓ፡ ዓቢሹዓ ቡቂ ሾዔኔ፤
5 ቡቂ ዑዚ ሾዔኔ፤ 6 ዑዚ፡- ዜራህያ ሾዓዛ፡ ዜራህያ ሜራዮቲ
ሾዔኔ፤ 7 ሜራዮቲ ዓማሪያ፡ ዓማሪያ ሃሃ ዓሂያቤ ሾዔኔ፤ 8 ዓሂያቤ
ፃዶቄ፡ ፃዶቄ ዓሂማዓፄ ሾዔኔ፤ 9 ዓሂማዓፄ ዓዛሪያሴ፡ ዓዛሪያሴ
ዮሃና ሾዔኔ፤ 10 ዮሃና ዓዛሪያሴ ሾዔኔ፤ ዓዛሪያሴ ካኣቲ፡ ሴሎሞኔ
ዬሩሳላሜይዳ ማዢሴ ጌኤዢ ማኣሮይዳ ቄኤሴ ማዒ ማዳያኮ።
11 ዓዛሪያሴ ዓማሪያ፡ ዓማሪያ ሃሃ ዓሂፁቤ ሾዔኔ፤ 12 ዓሂፁቤ
ፃዶቄ፡ ፃዶቄ ሻሉሜ ሾዔኔ፤ 13 ሻሉሜ ሂልቂያ ሾዔኔ፤ ሂልቂያ
ዓዛሪያሴ ሾዔኔ፤ 14 ዓዛሪያሴ ሴራያ፡ ሴራያ ዒዮፄዳቄ ሾዔኔ።
15 ናንጊና ናንጋ ጎዳ ዪሁዳና ዬሩሳላሜና ዳሮ ናቡካዳናዖሬ ዖሎና
ባሺ ዲዒ ዔኬም ቤሲ ባኣያ ማዒ ናንጋንዳጉዲ ማሄ ዎዶና
ዒዮፄዳቄያ ዬያ ዓሶና ዎላ ዲዒንቲ ዳንዳኔ።

ሌዊ ዜርዖ

16 ሌዊ ሃይሃ ዓቲንቄ ናይ ሾዔኔ፤ ዔያታ፡- ጌርሾኔ፡ ቄዓቲና
ሜራሪ ጎያያኬ፤ 17 ጌርሾኔ፡- ሊቢኒና ሺምዒና ሾዔኔ፤ 18 ቄዓቲያ፡-
ዓምራሜ፡ ዪፅሃራ፡ ኬብሮኦኔንታ ዑዚዔሌ ጌይንታ ሾዔኔ፤ 19 ሜራሪ
ሃሃ ማህሊና ሙሺና ሾዔኔ። ሌዊ ፃጸ ዒጊሮ ሾይንታ ሃይካጋ ዳማ
ዓኣዞንሣኬ፡-

20 ጌርሾኔ ሊቢኒ ሾዔኔ፤ ሊቢኒ ያሃቲ ሾዔኔ፤ ያሃቲ ዚማ ሾዔኔ፤
21 ዚማ ዮዓሄ፡ ዮዓሄ ዒዶ፡ ዒዶ ዜራሄ፡ ዜራሄ ዓትራዬ ሾዔኔ።

5:26 5:26 2ካኣቶ. ማ 15:19፤29፤ 17:6። 6:19 6:19 ኬሲ. ማፃ 6:16-19።

22 ቁዓቴ ዓምናኣዳኣቤ፥ ዓምናኣዳኣቤ ቆራሄ፥ ቆራሄ ዓሲሬ ሾዔኔ፤ 23 ዓሲሬ ዔልቃና፥ ዔልቃና ዔቢያሳፕ፥ ዔቢያሳፕ ዓሲሬ ሾዔኔ፤ 24 ዓሲሬ ታሃቴ፥ ታሃቴ ዑሪዔኤሌ፥ ዑሪዔኤሌ ዑዚያ ሾዓዛ፥ ዑዚያ ሻዑሌ ሾዔኔ።

25 ዔልቃና ጎረሃሂ ዓማሳዬና ዓሂሞቴና ሾዔኔ፤ 26 ዓሂሞቴ ዔልቃና፥ ዔልቃና ያፓዬ፥ ያፓዬ ናሃቴ ሾዔኔ፤ 27 ናሃቴ፡- ዔሊያቤ፥ ዔሊያቤ ዩሮሃሜ፥ ዩሮሃሜኣ ሂልቃና ሾዔኔ።

28 ሳሙዔኤሌ ላምዎ ዓቴንቁ ናይ ሾዔኔ፤ ዬያቶኮ ቶይዳሂ ዒዩዔኤሌ፤ ሄሌሂ ዓቢያ ጌይንታኔ።

29 ሜራሪ ማሂሊ፥ ማሂሊ ሊቢኒ፥ ሊቢኒ ሺምዒ፥ ሺምዒ ዑዛ ሾዔኔ፤ 30 ዑዛ ሺምዒ፥ ሺምዒ ሃጊያ፥ ሃጊያ ዓሳያ ሾዔኔ።

ጌኤዠ ማኣሮይዳ ያኦሲ ቦንቾም ዓይናዳ ዓሶ

31 ጩኣቁሞ ሳኣዲና ዬሩሳላሜ ሙኬሂዳፓ ካኣቴ፥ ዳውቴ ናንጊና ናንጊ ጎዳ ማኣሮይዳ ዓይኑሞና ማዳዘንሂም ሱኡጌ ማዒ ዓሲ ዶኦሬኔ፤ 32 ካኣቴ ሴሎሞኔ ናንጊና ናንጊ ጎዳኮ ጌኤዠ ማኣሮ ዬሩሳላሜይዳ ማዠንዳሂኮ ቤርታ ዬና ዓሳ ቢያ ዎዴ ፔ ኬሎና ኬሎና ዓፒሎና ማዠንገቴያ ያኦሲ ዳርና ካኣማ ማኣሮይዳ ዓይኑሞ ዓይናዳያኬ። 33 ዬና ቤዛይዳ ማዳ ዓሶኮ ማኣሮ ዓሳ ሃካፓ ለካ ኬኤዚንታሂጉዲኬ፡-

ቁዓቴ ቶኦኮፓ፡- ቤርታዳያ ማዔ፥ ያኦሲ ቦንቾም ዓይኑሞ ዓይናዳ ዓሶኮ ሱኡጋሂ ዒዩዔኤሌ ናኣዚ ሄማኔኬ፤ ዒዛ ማኣሮ ዓሳ ሃይካፓ ዴማ ፓይዲንታ ጎይያና ዴንዲ ያይቆኦቤ ሄላኔ፤ ዔያታ፡- ሄማኔ፥ ዒዩዔኤሌ፥ ሳሙዔኤሌ፥ 34 ሂልቃና፥ ዩሮሃሜ፥ ዔሊዔኤሌ፥ ቶሃ፥ 35 ፀፒ፥ ዔልቃና፥ ማሃቴ፥ ዓማሳዬ፥ 36 ዔልቃና፥ ዒዩዔኤሌ፥ ዓዛሪያ፥ ሶፖኒያሴ፥ 37 ታሃቴ፥ ዓሲሬ፥ ዓቢያሳፕ፥ ቆሬ፥ 38 ዩፀሃሬ፥ ቁዓቴ፥ ሌዊንታ ያይቆኦቤንታኬ።

39 ሚዛቆ ዛላ ዔቁ ማዳ ላምዓሳ፥ ዓይናዳ ዓሶ ሱኡጋሂ ዓሳኣፔኬ፤ ዬያኮ ማኣሮ ዓሶ ፓይዳ ሃካፓ ዴማ ፓይዲንታ ጎይያና ዴንዲ ሌዊ ሄላኔ፤ ዔያታ፡- ዓሳኣፕ፥ ቤራኪያ፥ ሺምዒ፥ 40 ሚካዔኤሌ፥ ባዕሴያ፥ ማልኪያ፥ 41 ዔትኒ፥ ዜራሄ፥ ዓዳያ፥ 42 ዔታኔ፥ ዚማ፥ ሺምዒ፥ 43 ያሃቴ፥ ጌርሾኔንታ ሌዊንታኬ።

44 ሻውሎ ዛላ ዔቁ ማዳ፥ ሃይሃሳ ዓይናዳ ዓሶ ሱኡጋሂ ሜራሪ ናኣዚ ዔታኔኬ፤ ዒዛኮ ማኣሮ ዓሶኮ ፓይዳ ሃይካፓ ዴማ ፓይዲንታ ጎይያና ዴንዲ ሌዊ ሄላኔ፤ ዔያታ፡- ዔታኔ፥ ቂሺ፥ ዓብዲ፥ ማሉኬ፥ 45 ሃሻቢያ፥ ዓሜሲያሴ፥ ሂልቁያ፥ 46 ዓሞዲ፥ ባኒ፥ ሾሜሬ፥ 47 ማሂሊ፥ ሙሺ፥ ሜራሪንታ ሌዊንታኬ።

48 ለዊ ዓሶ ማዕፌ፣ ዔያቶኮ ዒጊና ያኦሲ ዚጊ ካኣሽኮ ቤዛ ማዲንታ ማሌ ማሌ ማዶ ቢያ ማዳኔ።

ዓኣሮኔ ዜርዖ

49 ዓኣሮኔና ዒዛኮ ዜርዖና ዑንጃንታ ዒንጎ ባኮ ዒንጎ ቤዘይዳ ሚቹ ዒንጎ ባኮዋ ቢያ ሚቹ ያኦሲም ዒንጋኔ፤ ዬያጉዲ ሃሣ ዑሣ ዓኣዳ ጌኤዡ ማኣሮይዳ ካኣሽኮ ዳምቦና ያኦሲ ዒሰራዔኤሌ ዓሶኮ ጎሞ ዓቶም ጋዓንዳጉዲ ዒንጊንታ ባኮኮ ቢያ ሱኡጋ ዔያቶኬ፤ ዔያታ ዬያ ቢያ ማዲ ኩንሣሣ ያኦሲ ፔ ዓይላሣ ሙሴ ዓይሣ ጎይዖናኬ።
50 ዓኣሮኔ ዜርዖኮ ገይዳ ሃካፓ ዳማ ዓኣ ጎይዖኬ፤ ዔያታ፡- ዓላዜሬ፣ ፒንሃሴ፣ ዓቢሹዓ፣ 51 ቡቁ፣ ዑዚ፣ ዜራህያ፣ 52 ማራዮቴ፣ ዓማሪያ፣ ዓሂዖቤ፣ 53 ሳደቁንታ ዓሂማዓጃንታኬ።

ለዊ ዓሳ ናንጎም ዒንጊንቲ ቤዛ

54 ዓኣሮኔ ዜርዖይዳፓ ቁዓቴ ዜርዖ ለዊ ዓሶም ዒንጊንቲ ቤዘይዳፓ ቤርታዲ ዒዛም ማዓ ቤዛ ዲማሲ ዔራሪ ዓጎ ባኮና ዔኬኔ፤ 55 ዬይ ቤዛ ዪሁዳ ዓጮይዳ ዓኣ ኬብሮኦኔና ዬኖኮ ኮይሎይዳ ቆልማ ሄንቃ ቤዘዋ ቢያ ዓርቃያኬ። 56 ኬብሮኦኔኮ ጎዡ ቤዘና ጉርዳ ጋዓንቲ ዪፑኔ ናኣዚ፣ ካኣሌቤም ጌይንቲያኬ።
57-59 ዓኣሮኔና ዒዛኮ ዜርዖናም ዒንጊንቲ፣ ዓሲ ዋዳ ዓሲ ዓኣሽንቲ ቶላንዳጉዲ ጌይንቲ ካታሞንሢ፡- ኬብሮኦኔ፣ ያቲሬ፣ ሊቢና፣ ዔሸቲሞዓ፣ ሂሌኔ፣ ዳቢሬ፣ ዓሻኔንታ ቤትሹማሹንታ ማዓዛ ቆልማ ሄንቃ ቤዘንታ ዋላኬ። 60 ቢኢኒያሜ ዓጮይዳ፡- ጌባዒ፣ ዓሌማቴና ዓናቶቴ ጌይንታ ካታሞና ቆልማ ሄንቃ ቤዘና ዓኣሮኔ ዜርዖም ዒንጊንቲያኬ፤ ዓኣሪ ዓኣሮኔ ዜርዖም ቢያ ናንጊ ቤሲ ማዓያ ዋሊ ዑፃ ታጶ ሃይሃ ካታማኬ። 61 ዓባ ጌላ ዛሎና ዓኣ ሚናኣሴ ፃጶኮ ሄካሢ ዓጮፓ ታጶ ካታማ ሃንጎ ቁዓቴ ዜርዖም ዒፃ ዓጊንቲም ጊሽኪንቲኔ።

62 ጌርሹኔ ፃጶኮ ዲማ ዲማ ቶኦኮም፡- ዪሳኮኦሬይዳፓ፣ ዓሴኤሬይዳፓ፣ ኒፕታኣሌኤሚና ባኣሳኣኔናይዳ ዓኣ ዓባ ኬሰካ ዛሎና ዓኣ ሚናኣሴ ዓጮይዳፓ ዋሊ ዑፃ ታጶ ሃይሃ ካታማ ዒንጊንቲኔ። 63 ዬያጉዲ ሃሣ ማራሪ ፃጶኮ ዲማ ዲማ ቶኦኮም፡- ሮኦኤሌሲዳፓ፣ ጋኣዳና ዛብሎኦኔ ዓጮናይዳፓ ዋሊ ዑፃ ታጶ ላምዖ ካታማ ዒፃና ዲማሲ ዒንጊንቲኔ። 64 ዬያይዲ ዒሰራዔኤሌ ዓሳ ለዊ ዓሳ ናንጋንዳ ካታሞ ዔያቶም ዒንጊኔ፤ ዬይያ ካታሞ ካታሞኮ ኮይላ ቆልማ ሄንቃ ቤዘና ዋላኬ። 65 ኬዳና ኬኤዚንቲ ቤዛ፡- ዪሁዳይዳ፣ ሲሞኦኔና ቢኢኒያሜና ዓጮይዳ ዓኣ ካታሞዋ ሃንጎዋቶጉዲ ቢያ ዲማሲ ዔር ባኮና ዒንጊንቲያኬ።

66 ቁዓቲ ቶኦካፓ ፔቲ ፔቲ ማኣሪ ዓሲም ዔፕሬኤሜ ዓጮይዳ ካታማና ቆልሞ ሄንቃ ቤሲና ዒንጊንቲኔ። 67 ዩንሢያ ዔፕሬኤሜ ጌሜሮይዳ ዓኣያ፣ ዓሶ ዎዳ ዓሳ ዓኣሺንቲ ቶላ ካታሞንሢ፡- ሴኬሜ፣ ጌዜሬ፣ 68 ዮቅሜዓሜ፣ ቤትሆሮኔ፣ 69 ዓያሎኔና ጋትሪሞኔናኬ፤ ዩይ ካታማ ቆልማ ሄንቃ ቤዘና ዎላኬ። 70 ዓባ ጌላ ዛሎና ዓኣ ሚናኣሴ ዓጮይዳ ሃሣ ዓኔሬና ቢልዓሜ ካታማ ኮይላ ዓኣ ቆልማ ሄንቃ ቤዘና ዎላ ቁዓቲ ቶኦካም ዒንጊንቲኔ።

71 ጌርሾኔ ቶኦካም፡- ሃካፓ ዳማ ፓይዲንታ ካታማ ኮይላ ዓኣ ቆልማ ሄንቃ ቤዘና ዎላ ዒንጊንቲያኬ፤

ዓባ ኬሰካ ዛሎና ዓኣ ሚናኣሴ ዓጮይዳፓ ባኣሳኣኔይዳ ዓኣ ጎላኔና ዓሰታሮቲና።

72 ዪሳኮኦሬ ዓጮይዳ፡- ቃዳሴ፣ ዳቤራቲ፣ 73 ራሞቲና ዓኔሜናኬ።

74 ዓሴኤሬ ዓጮይዳ፡- ማሻሌ፣ ዓብደኔ፣ 75 ሁቆቁና ሬሆቤናኬ፤

76 ኒፕታኣሌኤሜ ዓጮ ጌላላይዳ ዓኣ ቁዳሼ፣ ሃሞኔና ቂርያታይሜናኬ፤

77 ሃንጎ ሚራሪ ቶኦካም ሃካፓ ዳማ ፓይዲንታ ካታሞንሢ ኮይላ ዓኣ ቆልማ ሄንቃ ቤዘና ዎላ ዒንጊንቲኔ፡-

ዛብሎኦኔ ዓጮይዳ፡- ሪሞናና ታቦሪና፤

78 ዮርዳኖሴ ዎሮኮ ዓባ ኬሰካ ዛሎና ዒያርኮኮ ሱካ ዓኣ ሮኦቤኤሌ ዓጮ ዳውሎይዳ ዓኣ፡- ቤፆሬ፣ ያህፄ፣ 79 ቁዳሞቲና ሜፓዓቲናኬ፤

80 ጋኣዳ ዓጮ ጌሊዓዳይዳ ዓኣ ራሞቲ፣ ማሂናይሜ፣ 81 ሃሴቦኦኔና ያዕዘሬናኬ።

7

ዪሳኮኦሬ ዜርዎ

1 ዪሳኮኦሬ ያይዶ ዓቲንቁ ናይ ሾዔኔ፤ ዩንሢያ፡- ቶላዒ፣ ፑዎ፣ ያሹቤና ሺምሮኔ ጌይንታዘንሢኬ።

2 ቶላዒ ላሆ ዓቲንቁ ናይ ሾዔኔ፤ ዩያታ፡- ዑዚ፣ ሬፓያ፣ ዪሪዔሌ፣ ያህማዬ፣ ዩብሳሚንታ ሹሙዔሌ ጌይንታያኬ፤ ዩንሢያ ቶላዒ ቶኦካ ማኣሪ ዓሶኮ ሱኡጌ፣ ጊንሣ ሃሣ ያልዚናኣ ዔርቲ ዓሲኬ፤ ዔያቶ ዜርዎኮ ሚርጉማ ካኣቲ ዳውቲ ዎዶና ላማታሚ ላምዎ ሺያና ላሆ ጄኤታናኬ።

3 ዑዚ ጎምሢ ዩዝራህያ ጌይንታ ፔቲ ዓቲንቁ ናይ ሾዔኔ፤ ዩያ ዩዝራህያና ዒዛኮ ያይዶ ዓቲንቆ ናኣታ፡- ሚካዔኤሌ፣ ዓብዲዩ፣ ዒዮዔኤሌንታ ዩሺያንታ ዔያቶ ማኣሪ ዓሶኮ ሱኡጎኬ። 4 ዔያቶኮ

ሚርጌ ላክሊና ናይና ዓኣሢሮ ዜርፃ ዔያቶሲ ፖኦሊሴ ማዶ ማዳኒ ዳንዳዓ ሃይሢታሚ ላሆ ሺያ ዓቲንቁ ኬሳኒ ዳንዳዓያኩ።

5 ዪሳኮኦሬ ፃፃፓ ፖኦሊሴ ማዶ ማዳኒ ዳንዳዓ ሳሊታሚ ላንካይ ሺያ ዓቲንቁ ዓኣያ ማዔሢ ፃኣፒ ዓርቆና ባካ ዔርዛኔ።

ቢኢኒያሜና ዳኣኔና ዜርፃ

6 ቢኢኒያሜ ሃይሣ ዓቲንቁ ናይ ሾዔኔ፤ ዔያታ ቤላዔ፥ ቤኩሬና ዪዲዔኤሌ ጎያያኩ።

7 ቤላዔ ደንጎ ዓቲንቁ ናይ ሾዔኔ፤ ዪያታ፡- ዔፅቦኔ፥ ዑዚ፥ ዑዚዔኤሌ፥ ያሪሞቴና ዒሪ ጌይንታዞንሢኬ፤ ዔያታ ፔ ዜርፃኮ ሱኡጌ፥ ጌንሣ ሃሣ ያልዚናኣ ዔርቴ ፖኦሊሴኬ፤ ዔያቶ ዜርፃፓ ፖኦሊሴ ማዶ ማዳኒ ዳንዳዓ ላማታሚ ላምፃ ሺያና ሃይሢታሚ ያይዶ ዓቲንቁ ዓኣኔ።

8 ቤኩሬ ጎሆሢ ታዘጳ ዓቲንቁ ናይ ሾዔኔ፤ ዪያታ፡- ዜሚራ፥ ዮዓሼ፥ ዔሊዔኤሌ፥ ዔልዮዔናዬ፥ ያምሪ፥ ዪሪሞቴ፥ ዓቢያ፥ ዓናቶቴና ዓሌሜቴ ጌይንታያኩ። 9 ዔያቶኮ ዜርፃይዳፓ ፖኦሊሴ ማዶ ማዳኒ ዳንዳዓያ ማዔም ፃኣፒንቴ ዓቲንቃ ላማታሚ ሺያና ላምፃ ጄኤታታሢ ዔርቴኔ።

10 ዪዲዔዔኤሌ፡- ቢልሃኔ ጌይንታ ዓቲንቁ ናይ ሾዔኔ፤ ቢልሃኔ፡- ያዑሼ፥ ቢኢኒያሜ፥ ዔሁዳ፥ ኬናዒና፥ ዜታኔ፥ ታርሺሺንታ ዓሂሻሃሪ ጌይንታ ላንካይ ዓቲንቁ ናይ ሾዔኔ፤ 11 ዪያታ ፔ ቶኦኮኮ ማኣሮ ዓሶ ሱኡጌ፤ ሃሣ ዔርቴ ያልዚ ዓሲኬ፤ ዔያቶ ዓሶ ዜርፃፓ ፖኦሊሴ ማዶ ማዳኒ ዳንዳዓ ዓቲንቃ ታጾ ላንካይ ሺያና ላምፃ ጄኤታናኩ። 12 ሹፒሚና ሁፒሚ ጎሆዞንሢ ዓሂሪ ዜርሢኬ፤ ሁሺሚ ጎሆሢ ዓሄሪ ናይኩ።

ኒፕታኣሌኤሜ ዜርፃ

13 ኒፕታኣሌኤሜ ያይዶ ዓቲንቁ ናይ ሾዔኔ፤ ዪያታ፡- ያሃዒዔኤሌ፥ ጉኒ፥ ዩጄሬና ሻሉሚ ጌይንታዞንሢኬ፤ ዔያታ ቢልሃ ዜርሢኬ።

ሚናኣሴ ዜርፃ

14 ሚናኣሴ ፔኤኮ ማቾ፥ ሶኦሪያ ዓጮ ላኣሌሎይዳፓ ዓሰሪዔኤሌና ማኪሬ ጌይንታ ላምፃ ዓቲንቁ ናይ ሾዔኔ፤ ማኪሬ ጌሊዓዳ ሾዔኔ፤ 15 ዩይ ማኪሬ፡- ሁፒሚና ሺፒሚ ዜርፃፓ ፔቴ ፔቴ ላኣሊ ዔኬኔ፤ ማኪሬኮ ማዕካ ጌይንታ ጌራ ዓኣኔ፤ ጄሎፒሃዳ ጌይንታ ማኪሬ ዜርሢሰኬይ ዉዳሮ ናይ ሌሊ ሾዔኔ።

16 ማኪሬኮ ማቾ፥ ማዕካ ፔሬሼና ሼሬሼ ጌይንታ ላምፃ ዓቲንቁ ናይ ሾዔኔ፤ ፔሬሼ ጌይ ሱንፃ ጌሢዛ ዒንዶ ማዕካኬ፤ ፔሬሼያ

ዑላሚና ሬቁሜ ገይንታ ላምዎ ዓቲንቁ ናይ ሾዔኔ። 17 ዑላሚ ባዳኔ ገይንታ ፔቴ ዓቲንቁ ናይ ሾዔኔ፤ ዩንሢ ሲያ ሚናኣሴ ናኣዚኮ ናኣዚ፤ ማኪሬ ናኣዚ፤ ጌሌዓዳ ዜርዖኩ።

18 ጌሌዓዳኮ ጌራ ሃሞሌኩቴ ሃይሃ ዓቲንቁ ናይ ሾዔኔ፤ ዩያታ፡- ቢሾዳ፤ ዓቢዒዜሬና ማህላ ገይንታያኩ፤ 19 ሹሚዳዔ ጎሮሢ ዓህያኔ፤ ሹኩሜ፤ ሊቅሂንታ ዓኒዓሜ ገይንታ ያይዶ ዓቲንቁ ናይ ሾዔኔ።

ዔፕሬኤሜ ዜርዖ

20 ዔፕሬኤሜ ሹቴላሃ፤ ሹቴላሃ ቤሬዳ፤ ቤሬዳ ታሃቴ፤ ታሃቴ ዔልዓዳ፤ ዔልዓዳ ታሃቴ ሾዔኔ፤ 21 ታሃቴ ዛባዳ፤ ዛባዳ ሹቴላሃ ሾዔኔ፤ ዔፕሬኤሜ ሹቴላሃፓ ሜሌ ዔዜሬና ዔልዓዳ ገይንታ ላምዎ ዓቲንቁ ናይ ሾዔኔ፤ ዩንሢ ጋኣቴይዳ ናንጋ ዓሶኮ ባይ ዉኡቃንቴ ዓርቁ ዔያቶ ዎደናኔ፤ 22 ዓዳሢ ዔያቶኮ ዔፕሬኤሜ ሚርጌ ኩሊ ዔያቶ ዛሎ ያዩ ያዩ ናንጋሢሮ ዒዛኮ ጌርሲንሢ ዒዛ ደዲሻኒ ሙኩኔ፤ 23 ዩካፓ ዔፕሬኤሜ ፔ ማቸና ላሃሞ፤ ዒዛ ጎጳዲ ዓቲንቁ ናይ ሾዔኔ፤ ዔያቶኮ ማኣራ ሄሌ ሜታሢዳፓ ዔቁያና ዩያ ናዓሢኮ ስንዖ «ቤሪዓ»* ጌይ ጌሢኔ።

24 ጊንዳፓ ዔፕሬኤሜ ሹዒራ ገይንታ ዉደሮ ናይ ሾዔኔ፤ ዒዛ ኩዶ ዛሎና ደኣሎ ዛሎናይዳ ዓኣ ቤትሆሬንታ ዑዜንሹዒራ ገይንታ ካታማኣ ማክሲኔ።

25 ዔፕሬኤሜ ሃሃ ሬፓሃ ገይንታ ሜሌ ዓቲንቁ ናይ ሾዔኔ፤ ዩያ ሬፓሃኮ ዜርዖ፡- ሬሹፔ፤ ቴላሃ፤ ታሃኔ፤ 26 ላዒዳኔ፤ ዓሚሁዳ፤ ዔሊሻማዔ፤ 27 ኔዌንታ ዒያሱንታኩ።

28 ዔፕሬኤሜ ዜርዖ ጉቤ ዔኪ ፔኤኮ ናንጎ ቤሲ ማሄ ዓጫ ቤኤቴኤሊና ኮይሎይዳ ዓኣ ዳኮ ዳኮ ካታሞ ማዓዛ፤ ዓባ ኬሰካ ዛሎና ዳንዲ ናዕራና፤ ዓባ ጌላ ዛሎና ዳንዲ ጌዜሬ ሄላዖ፤ ዩያጉዲ ሃሃ ጌዜሬ ኮይላ ዓኣ ዳኮ ዳኮ ካታሞ ቢያ ዔካኔ፤ ሴኩሜንታ ዓያንታ ኮይላ ዓኣ ዳኮ ዳኮ ካታሞ ፔ ጋሪ ማሃ ዔካኔ።

29 ሚናኣሴ ዜርዖ፡- ቤትሻኔ፤ ታዕናኩ፤ ሜጊዶኔና ዶሬና፤ ዩያጉዲ ሃሃ ዩያ ካታሞኮ ኮይላ ዓኣ ዳኮ ዳኮ ካታሞ ፔ ዴማ ማሃ ዎይሢኔ።

ዩይ ቢያ ዒሰራዔኤሌ ናኣዚ፤ ዮሴፔ ዜርዖ ናንጌ ቤዘኩ።

ዓሴኤሬ ዜርዖ

* 7:23 7:23 ቤሪዓ ጌይዖ፡- ዔብሬ ዓሶ ሙኤጮና «ሜቶና (ሜታሴ)» ጌይሢኔ።

30 ዓሴኤሬ ያይዶ ዓቲንቁ ናይ ሾዔኔ፤ ዩንሢያ፡- ዩምና፡ ዩሺዋ፡ ዩሺዋና ቤሪዓ ጌይንታያኬ፤ ዩያጉዲ ሃሣ ሴራሄ ጌይንታ ፔቴ ዉዲሮ ናይያኣ ሾዔኔ።

31 ቤሪዓ ሄቤሬና ማልከዔኤሌ ጌይንታ ላምዖ ዓቲንቁ ናይ ሾዔኔ፤ ማልከዔኤሌ፡- ቢርዛዊ ጌይንታ ዓቲንቁ ናይ ሾዔኔ።

32 ሄቤሬ ሃይሣ ዓቲንቁ ናይ ሾዔኔ፤ ዔያታ፡- ያፕሌዔ፡ ሾሜሬና ሆታሜ ጎዖያኬ፤ ሃሣ ፔቴ ሹዓ ጌይንታ ዉዲሮ ናይያኣ ዒ ሾዔኔ።

33 ያፕሌዔ፡- ፓሳኬ፡ ቢምሃሌና ዓሸዋቴ ጌይንታ ሃይሣ ዓቲንቁ ናይ ሾዔኔ።

34 ያፕሌዔኮ ጌርሲ ሾሜሬ ጎዖሢያ፡- ዓሂ፡ ሮህጋ፡ ዩሁባና ዓራሜ ጌይንታ ያይዶ ዓቲንቁ ናይ ሾዔኔ።

35 ያፕሌዔ ጌርሲ ሆታሜያ፡- ያፓሄ፡ ዩምናዔ፡ ሸሌሸና ዓማሌ ጌይንታ ያይዶ ዓቲንቁ ናይ ሾዔኔ።

36 ያፓሄ ዜርዓ፡- ሱሃ፡ ሃርኔፔሬ፡ ሹዓሌ፡ ቤሪ፡ ዩምራ፡ 37 ቤዔሬ፡ ሆዳ፡ ሻማ፡ ሺልሻ፡ ዩቲራኔና ቤዔራ ጌይንታያኬ።

38 ዩቴሬ ዜርዓ፡- ዩፑኔ፡ ፒሰፓና ዓራ ጌይንታያኬ፤ 39 ዑላ ዜርዓ፡- ዓራሄ፡ ሃኒዔሊና ሪፅያ ጌይንታያኬ።

40 ዩያታ ቢያ ዓሴኤሬ ዜርዓኬ፤ ዔያታ ፔ ማኣሮ ዓሶኮ ሱኡጌ፡ ገንሣ ሃሣ ዔርቴ ያልዚ ዓሲ ማዔያ ዲማ ዲማ ቢታንቶ ዓኣ ዓሲኬ፤ ዓሴኤሬ ዜርዓፓ ፖኦሊሴ ማዶ ማዳኒ ዳንዳዓ ዓቲንቃ ላማታሚ ላሆ ሺያኬ።

8

ቢኢኒያሜ ዜርዖ

1 ቢኢኒያሜ ደንጎ ዓቲንቁ ናይ ሾዔኔ፤ ዩንሢያ ዋሊ ሄሊ ሄሊ ሸይንቴ ጎይዖና፡- ቤላዔ፡ ዓሸቤሌ፡ ዓህራሄ፡ 2 ናሃና ራፓ ጌይንታያኬ።

3 ቤላዔ ዜርዓ፡- ዓዳሬ፡ ጌራ፡ ዓቢሁዳ፡ 4 ዓቢሹዓ፡ ናዕማኔ፡ ዓሆሃ፡ 5 ጌራ፡ ሸፑፓኔና ሁራሜ ጌይንታያኬ።

6-7 ዔሁዳ ዜርዓ፡- ናዕማኔ፡ ዓሂያና ጌራ ጎዖያኬ፤ ዔያታ ጌባዔይዳ ናንጌዖ ገንዓፓ ዳውሲንቲ ማናሃቴ ዳንዲ ዒኢካ ናንጌ ማኣሮ ዓሶ ሱኡጎኬ፤ ዩካ ዔያቶ ዔኪ ዳንዳሢ ዑዛና ዓሂሁዳኮ ዓዶ፡ ጌራናኬ።

8-9 ሻሃራሜ፡- ሁሸሚና ባዕራ ጌይንታ ላምዖ ላኣሊ ዓኣንቲ ዔያቶ ዓንጃኔ፤ ዩካፓ ሞዓኣቤ ዓጮይዳ ናንጊቤቃ ሆደሾ ጌይንታ ፔቴ ላኣሊሰኬኖ ዔኪ ላንካይ ዓቲንቁ ናይ ሾዔኔ፤ ዩንሢያ፡- ዮባቤ፡

ፀቢያ፣ ሜሻ፣ ማልካኣሜ፣ 10 ዬዑፄ፣ ሳክያና ሚርማ ጌይነታያኬ፤
ዒዛኮ ዓቲንቆ ናኣታ ጉቤ ዒዛ ማኣሮ ዓሶኮ ሱኡጌ ማዔኔ።

11 ቃሲ ሃሣ ሁሻሜ ጌይነታ ማቸይዳፓ ዓሂቱቤና ዔልፓዓሌ
ጌይነታ ላምዖ ዓቲንቆ ናይ ሾዔኔ።

12 ዔልፓዓሌያኣ፡- ዔቤሬ፣ ሚሼዓሜና ሼሜዴ ጌይነታ ሃይሣ
ዓቲንቆ ናይ ሾዔኔ፤ ሼሜዴ ዖኖና ሎዴ ጌይነታ ካታማሰከኒሣሂና
ኮይላ ዓኣ ጉርዶዋ ማኸፎያኬ።

ጋኣቲነታ ዓያሎኔይዳ ናንጋ ቢኢኒያሜ ዓሶ

13 ቤሪዓና ሴማዓና ዓያሎኔ ካታሞይዳ ዴዔ ማኣሮ ዓሶኮ
ሱኡጎኬ፤ ዔያታ ቤርታ ጋኣቲይዳ ናንጋ ዴሮ ዳውሲ ኬሴኔ፤ 14 ቤሪዓ
ዜርፃ፡- ዓሂዮ፣ ሻሻቁ፣ ዪሬሞቲ፣ 15 ዜባድያ፣ ዓራዴ፣ ዔዴሬ፣
16 ሚካዔኤሌ፣ ዩሽፓና ዮሃ ጌይነታያኬ።

ዬሩሳላሜይዳ ናንጌ ቢኢኒያሜ ዓሶ

17 ዔልፓዓሌ ናኣታ፡- ዜባድያ፣ ሚሹላሜ፣ ሂዝቁ፣ ሄቤሬ፣
18 ዩሽሜራዬ፣ ዩዝለዓና ዮባቤ ጌይነታያኬ።

19 ሺምዒ ናኣታ፡- ያቂሜ፣ ዚክሪ፣ ዛብዲ፣ 20 ዔሊዔናዬ፣
ዲልታዬ፣ ዔሊዔኤሌ፣ 21 ዓዲያ፣ ቤራያና ሺምራቲ ጌይነታያኬ።

22 ሻሻቁ ናኣታ፡- ዒሽጳኔ፣ ዔቤሬ፣ ዔሊዔኤሌ፣ 23 ዓብድኔ፣
ዚክሪ፣ ሃናኔ፣ 24 ሃናኒያ፣ ዔላኣሜ፣ ዓንቶቲያ፣ 25 ዩፕዴያና ፓኑዔሌ
ጌይነታያኬ።

26 ዪርሃሜ ናኣታ፡- ሻምሼራዬ፣ ሼሃሪያ፣ ዓታልዓያ፣ 27 ያዕሬሺያ፣
ዔሊያና ዚክሪ ጌይነታያኬ።

28 ዬያታ ቢያ ዬሩሳላሜይዳ ናንጌ፣ ቤርታሳ ማኣሮ ዓሶኮ
ሱኡጎነታ ዔያቶ ማኣሮኮ ቶይዶ ቶይዶኬ።

ጌባዖኔና ዬሩሳላሜይዳ ናንጌ ቢኢኒያሜ ዓሶ

29 ዪዒዔኤሌ ጌባዖኔ ካታሞ ማዢ ዒኢካ ዴዔኔ፤ ዒዛኮ
ማቻ ማዒካ ጌይነታያ ማዓዛ፣ 30 ዒዛኮ ናኣዚ ቶይዲ ዓብድኔ
ጌይነታኔ፤ ሜሌ ዒዛኮ ዓቲንቆ ናኣታ፡- ፀሬ፣ ቂሼ፣ ባዓኣሌ፣ ኔሬ፣
ናኣዳኣቤ፣ 31 ጌዶሬ፣ ዓሂዮ፣ ዜኬሬነታ፣ 32 ሺምዓኮ ዓዶ ሚቅሎቲ
ጌይነታሣነታኬ፤ ዔያቶኮ ዜርፃ ዔያቶ ቶኦኮ ማዔ ዒጊኖ ኮይላ
ዬሩሳላሜይዳ ናንጋኔ።

ካኣቲ ሳኣዖኦሌ ማኣሮ ዓሶ

33 ኔሪ ቁሴ ሾዔኔ፤ ቁሴ ካኣቲ ሳኣዖኦሌ፤ ሳኣዖኦሌ፡- ዮናታኣኔ፡ ማልከሹዓ፡ ዓቢናዳኣቤና ዔሽባዓኣሌ ጌይንታ ዖይዶ ዓቲንቁ ናይ ሾዔኔ፤ 34 ዮናታኣኔያ ማሪባዓኣሌ፤ ማሪባዓኣሌ * ማካ ሾዔኔ።

35 ማካ፡- ፒቶኔ፡ ማሌኬ፡ ታሪዓና ዓሃዜ ጌይንታ ዖይዶ ዓቲንቁ ናይ ሾዔኔ። 36 ዓሃዜ፡- ዬሆዓዳ ሾዔኔ፤ ዬሆዓዳ፡- ዓሌማቴ፡ ዓዝማዌቴንታ ዚምሪ ጌይንታ ሃይሃ ዓቲንቁ ናይ ሾዔኔ፤ ዚምሪ ሞፃ ጎዖሢ ሾዔኔ፤ 37 ሞፃ፡- ቢንዓ፡ ቢንዓ ራፓ፡ ራፓ ዔልዓሳ፡ ዔልዓሳ ዓፄሌ ሾዔኔ።

38 ዓፄሌ፡- ዓዝሪቃማ፡ ቦኬሩ፡ ዒሰማዔኤሌ፡ ሹዓሪያ፡ ዓብዲዩና ሃናኔ ጌይንታ ላሆ ዓቲንቁ ናይ ሾዔኔ፤ 39 ዓፄሌ ጌርሲ ዔሹቁ ቶይዶ ናዓሢ ዑላማ፡ ሄሌሢ ያዑሹ፤ ሃይሃሳሢ ዔሊፔሌ፤ ጌይንታያ ዓቲንቁ ናይ ሾዔኔ።

40 ዑላማኮ ዓቲንቆ ናኣታ ሂኢሺ ዱከሢና ዔርቴ ያልዚ ዓሲኬ፤ ዔያቶኮ ዜርፃ ዋሊ ዑፃ ፔቴ ጃኤታና ዶንጊታሚ ናይና ናኣቶኮ ናይና ዓኣያኬ፤ ዓካሪ ሱንፃ ኬዴ ዔኤሊንቴዘንሢ ቢያ ቢኢኒያማ ፃጰኬ።

9

ዲዒንታፓ ማዔ ዒሰራዔኤሌ ዴሮ

1 ዒሰራዔኤሌ ዴራ ፔ ማኣሮ ዓሶና ዓሶና ፃኣፒንቴኔ፤ ዬይ ሃይሳ ዒሰራዔኤሌ ዓሶኮ ካኣቶ ሃይሶ ማፃኣፓ ፃኣፒንቲ ዓኣኔ።

ጁሁዳ ዴራ ማዳ ጎሞ ዛሎና ማቶ ዔኪ ዲዒንቲንሢና ባብሎኔ ዓጮ ዓኣዳኔ፤

2 ካታሞይዳ ካታሞይዳ ዔያቶኮ ናንጎ ቤዘ ባንሢ ማዔ ቤርታሳ ዓሳ፡- ቁኤሳ፡ ሌዊ ዓሳ፡ ጌኤዠ ማኣሮይዳ ማዳ ዓሶንታ ሃንጎ ዒሰራዔኤሌ ዓሶንታኬ። 3 ጁሁዳይዳፓ፡ ቢኢኒያማይዳፓ፡ ዔፕሬኤማንታ ሚናኣሴንታ ፃጰፓ ዓሲ ዬሩሳላማይዳ ናንጋኒ ዴንዴኔ።

4-6 ጁሁዳ ፃጰይዳፓ ዬሩሳላማይዳ ናንጋኒ ዴንዴ ዓሳ ላሆ ጃኤታና ታዘጲታሚ ማኣሪ ዓሲኬ።

ጁሁዳ ናኣዚ ፓሬሴ ዜርፃ፡- ዖሚሪኮ ናኣዚ ናዖ፡ ዓሚሁዴ ናኣዚ፡ ዑታዬ ሱኡጌ ማሂ ዶኦሬኔ፤ ማሌ ሃንጎ ፓሬሴ ዜርፃ ዒሞሪና ባኒናኬ።

ጁሁዳ ናኣዚ፡ ሹኤላ ዜርፃኮ ቶይዳሢ ዓሳያ ዒዛኮ ናኣቶና ዋላ ማኣሮ ዓሶኮ ሱኡጋሢኬ።

* 8:34 8:34 ማሪባዓኣሌ ጌይንቲሢ፡- 2ሳሙ. 4:4ይዳ «ሚፐባሹቴ» ጌይንቲኔ። 9:3 9:3 ዒዚ. 2:27፤ ኔሂ. 7:73።

ዪሁዳ ናኣዚ ዛራሄ ዜርፃ፡- ዪዑዔሌ ዔያቶኮ ሱኡጌ ማሄኔ።
 7-8 ቢኢኒያሜ ዜርፃፃፓ ዪሩሳላሜይዳ ናንጋኒ ዴንዴ ዓሳ ሃይካፓ ዴማ ፓይዲንታዞንሂኑ፡-
 ሃሴኑዓ ናኣዚ ሆዳውያ፡ ሆዳውያ ናኣዚ ሜሹላሜ፡
 ሜሹላሜ ናኣዚ ሳሉ፡ ዪሮሃሜ ናኣዚ ዪብኔያ፡
 ሚክሪ ናኣዚ ናፆ ዑዚ ናኣዚ ዔላ፡
 ዪብኒያ ናኣዚ ሬዑዔኤሌ፡ ሬዑዔኤሌ ናኣዚ ሹፓዲያ፡ ሹፓዲያ ናኣዚ ሜሹላሜንታኑ።

9 ቢኢኒያሜ ፃፃፓ ዪሩሳላሜይዳ ናንጋኒ ዴንዴ ዓሳ ዎሊ ዑፃ ታዞጳ ፃኤታና ደንጊታሚ ላሆ ማኣሪ ዓሳኒ፤ ሃይካፓ ኩዴ ፓይዲንታ ዓቲንቃ ቢያ ማኣሮ ዓሳኮ ሱኡጎ ሱኡጎኑ።

ዪሩሳላሜይዳ ናንጌ ቁኤሶ

10-12 ዪሩሳላሜይዳ ናንጌ ቁኤሳ ሃይካፓ ዴማ ፓይዲንታዞንሂኑ፡-
 ዪዳዒያ፡ ዪሆያሪቤና ያከኔ፡
 ጌኤዡ ማኣሮይዳ ቢታንታ ዓኣ ሂልቁያ ናኣዚ ዓዛሪያሴ፤
 ዒዛኮ ቤርታኣ ዓደንሂ፡- ሜሹላሜ፡ ፃዶቁ፡ ሜራዮቲንታ ዓሂፁቤንታኑ።
 ዪሮሃሜ ናኣዚ ዓዳያ፤ ዒዛኮ ቤርታኣ ዓደንሂ፡- ፓሽሁሬና ማልኪያናኑ።
 ዓዲዔኤሌ ናኣዚ ማዕሳዬ፤ ዒዛኮ ቤርታኣ ዓደንሂ፡- ያህዜራ፡ ሜሹላሜ፡ ሚሺሌሚቲንታ ዒሚሬንታኑ።

13 ማኣሮ ዓሳኮ ሱኡጎ ማዔ ቁኤሳ ዎሊ ዑፃ ፔቲ ሺያና ላንካይ ፃኤታና ላሂታሚኑ፤ ዬያታ ቢያ ጌኤዡ ማኣሮይዳ ማዲንታ ማዶ ማዳኒ ዔራቶ ዓኣያኑ።

ዪሩሳላሜይዳ ናንጌ ሌዊ ዓሳ

14-16 ዪሩሳላሜይዳ ናንጌ ሌዊ ዓሳ ሃይማፓ ዴማ ፓይዲንታ ዓሳኑ፡-
 ሃሹቤ ናኣዚ ሹማዒያ፤ ዒዛኮ ቤርታኣ ዓደንሂ፡- ሜራሪ ቶኦኮይዳፓ ዓዘሪቃሜና ሃሻቢያናኑ።
 ባቅባቃሬ፡ ሄሬሹንታ ጋላሌ፤
 ሚካ ናኣዚ ማታኒያ፤ ዒዛኮ ቤርታኣ ዓደንሂ፡- ዚክሪና ዓሳኣፔናኑ።
 ሹማዒያ ናኣዚ ዓብዲዲ፤ ዒዛኮ ቤርታኣ ዓደንሂ፡- ጋላሌና ዪዲታናኑ።
 ኔያፓ ካታሞ ዴማ ማዔ ዓጫ ናንጋ፡ ዔልቃናኮ ናኣዚ ናፆ፡ ዓኣሳ ናኣዚ ቤሪኪያ።

ዩሩሳላሜይዳ ናንጊ ጌኤዠ ማኣር ካፓ ዓሶ

17 ዩሩሳላሜይዳ ናንጊ ጌኤዠ ማኣር ካፓ ዓሶ ሃኣቶኩ፦

ሻሉሜ፣ ዓቁቤ፣ ፃልሞኔ፣ ዓሂማኔንታ ጌርሲንሂንታኩ፤ ዬያቶኮ ሱኡጋሂ ሻሉሜኩ፤ 18 ዴንዲ ዬኖ ዎዶ ሄላንዳኣና ዓባ ኬሰካ ባንፆና ካኣቲ ጌላ ዲሮ ካሮ ካፓንዳጉዲ ዬያታ ዓይሂንቱኔ፤ ዔያታ ቤርታ ሌዊ ዓሶ ጉርዶ ባንሂ ጌሎ ዲሮ ካሮ ካፓያኩ።

19 ዔቢያሳፔኮ ናኣዚ ናዎ፣ ቆሬ ናኣዚ ሻሉሜ ቆሬ ቶኦኮ ማዔ፣ ዒዘኮ ዒጊኖና ዎላ ዔያቶኮ ቤርታኣ ዓዶንሂ ናንጊና ናንጋ ጎዳ ዴሮና ዎላ ካኣማ ማኣር ጌሎ ካሮ ካፓሂጉዲ ዔያታኣ ዓፒሎና ማዠንቱ ጌኤዠ ማኣር ጌሎ ካሮ ካፓኔ። 20 ቤርታ ዓላዜሬ ናኣዚ ፒንሃሴ ዔያቶኮ ሱኡጋሂኩ፤ ዒማና ናንጊና ናንጋ ጎዳኣ ዒዛና ዎላኩ።

21 ሜሼሌሚያ ናኣዚ፣ ዛካሪያሴ ዓፒሎና ማዠና ናንጊና ናንጋ ጎዳ ዴሮና ካኣማ ማኣር ጌሎ ካሮ ካፓያኩ።

22 ኬኤዎ ጌሎ ካሮንታ ዲሮ ካሮንታ ካፓንዳጉዲ ዶኦሪንቱ ዓሳ ዎሊ ዑፃ ላሞዎ ጃኤታና ታጰ ላሞዎ ዓሲኩ፤ ዔያታ ናንጋ ጉርዶ ጉርዶ ጎይዎ ፓይዲንቲ ፃኣፒንቱኔ፤ ዔያቶኮ ቤርታኣ ዓዶንሂ ዬኖ ማዶ ማዶንዳጉዲ ዓይሂሂ ካኣቲ ዳውቴና ዎኦሲ ማሊዎ ኬኤዛ ሳሙዔኤሌናኩ። 23 ዬኖ ዓሶና ዬኖ ዓሶኮ ናኣቶና ጌኤዠ ማኣር ጌሎ ዲሮ ካሮ ካፓኖ ሃሺባኤሶ። 24 ዴማ ዴማ ባንፆና ጌይዎ፦ ኬዶ ባንፃ፣ ዶኦሎ ባንፃ፣ ዓባ ኬሰካ ባንፆንታ ጌላ ባንፆ ሆቶና ፔቴ ፔቴ ዲሮ ጋሮ ጌሎ ካሮ ካፓ ዓሲ ዓኣኔ፤ 25 ዬያቶ ካፓ ዓሶ ዔያታ ዓኣ ጉርዶይዳ ናንጋ ዓጊና ላንካሳ ኬሎና ኬሎና ዎሊ ዓኣሂ ጌሊ ጌሊ ማኣዳኔ፤ 26 ዎይዶ ሌዊ ዓሶንሂ ካፓ ዓሶኮ ሱኡጎ ማዓዛ ዔያታ ጉቤ ቢታንቶ ዒንጊንቱያኩ፤ ዬያጉዲ ሃሂ ጌኤዠ ማኣርይዳ ዓኣ ቆልዎና ጋሮይዳ ጌሃ ማሆኮዎ ዔያታ ሱኡጌኩ። 27 ጌኤዠ ማኣር ካፓኒና ጉቶ ጉቶ ዲሮ ጋሮ ጌሎ ካሮ ቡላሂ ዔያቶ ማዔሂሮ ዔያታ ዎርቃሂ ጌኤዠ ማኣርኮ ዑኬኩ።

ሜሌ ሌዊ ዓሶ

28 ሜሌ ሌዊ ዓሳ ጌኤዠ ማኣርይዳ ማዶንቶ ሜሆ ሱኡጌ ማዒ ዛጋኔ፤ ሜሆ ማዶሮ ኬሶዎና ሃሂ ጋፒንፆይዳ ማሂ ጌልዘዋና ዔያታ ፓይዲ ፓይዲ ዛጋኔ። 29 ሃንጎዎታ ሃሂ ዛሎ ማዶንቶ ማሆንታ፣ ዲኢሎንታ፣ ዎይና ዑዠንታ፣ ሪሚቶ ዛይቶንታ፣ ዑንጆና ዴማ ዴማ ሳውቃ ዴኤሾኮዎ ቢያ ሱኡጎኩ። 30 ሳውቃ ዴኤሾ ዎላ ሲኢሪዎ ጋዓንቱ ዓይሂንቱሂ ቁኤሶሞ ሌሊኩ።

31 ቆሬ ቶኦካፓ ሻሉሜኮ ቶይዶ ናዓሂ፣ ማቲትያ ናንጊና ናንጋ ጎዳሞ ዒንጊንታ ካዎ ካሂሳ ሱኡጋሂኩ፤ 32 ቁዓቲ ቶኦካ ሃሂ ጌኤዠ ማኣርሞ ማዓ ካዎ ሃውሾ ኬሎና ኬሎና ካሂሳ ሱኡጎኩ።

33 ዘላ ሌዊ ማኣሮ ዓሶኮ ሱኡጋ ጌኤዠ ማኣሮይዳ ዋንቴና ሮኦሪና ያኦሲ ቦንቸሞ ዓይኑሞ ዓይናዳኔ፤ ዔያታ ዋንቶና ሮኦሮና ቢያ ማዳያ ማዔሢሮ ሜሌ ማዶ ቢያ ሃሺ ጌኤዠ ማኣሮኮ ዲሮ ጋራ ዔያቶሞ ጊኢጊንቴ ቆልጾይዳ ናንጋኔ።

34 ዬንሢ ቢያ ሌዊ ማኣሮ ዓሶኮ ሱኡጎኬ፤ ዔያቶኮ ፃጳ ፓይዲንቴ ጎይዖና ሱኡጌ ማዒ ዬሩሳላሜይዳ ናንጋኔ።

ካኣቲ ሳኣዖኦሌኮ ቤርታኣ ዓዶንሢና ዜርዖና
(1 ያኦሲ. ዓሃኬ 8:29-38)

35 ዬዒዔኤሌ ጎጾሢ ጌባዖኦኔ ካታሞ ማዢ ዒኢካ ዴዔኔ፤ ዒዛኮ ማቻ ማዕካ ማዓዛ፤ 36 ናኣዚ ቶይዲ ዒዛኮ ዓብዶኔ ጌይንታኔ፤ ሜሌ ዒዛኮ ዓቲንቆ ናኣታ፡- ፀሬ፣ ቁሺ፣ ባዓኣሌ፣ ኔሬ፣ ናኣዳኣቤ፣ 37 ጌዶሬ፣ ዓሂዮ፣ ዛካሪያሴና ሺሞዓኮ ዓዶ ሚቅሎቴ ጎጾያኬ፤ 38 ሚቅሎቴ ሺሞዓኮ ዓዶኬ፤ ዔያታ ሃንጎ ዔያቶኮ ዒጊኖኮ ዑኬ ዬሩሳላሜይዳ ናንጋኔ።

39 ኔሬ ቁሴ፣ ቁሴ ካኣቲ ሳኣዖኦሌ ሾዔኔ፤ ሳኣዖኦሌያ ዮናታኣኔ፤ ማልኪሹዓ፣ ዓቢናዳኣቤና ዔሽባዓኣሌ ጌይንታ ዓቲንቁ ናይ ሾዔኔ፤ 40 ዮናታኣኔ ሜሪባዓኣሌ፣ ሜሪባዓኣሌ * ሚካ፣ 41 ሚካ ፒቶኔ፣ ሜሌኬ፣ ታሬዓና ዓሃዜ ጌይንታ ዓቲንቁ ናይ ሾዔኔ። 42 ዓሃዜ ያዕራ፣ ያዕራ ዓሌሜቴ፣ ዓሌሜቴ ዓዘማዌቴና ዘምሪ ጌይንታ ዓቲንቁ ናይ ሾዔኔ፤ ዘምሪያ ሞፃ ጎጾሢ ሾዔኔ፤ 43 ሞፃ ቢንዓ፣ ቢንዓ ሬፓያ፣ ሬፓያ ዔልዓሳ፣ ዔልዓሳ ዓፄሌ ሾዔኔ።

44 ዓፄሌ፡- ዓዘሪቃሜ፣ ቦኬሩ፣ ዒሰማዔኤሌ፣ ሽዒሪያ፣ ዓብዲዩና ሃናጊ ጌይንታ ላሆ ዓቲንቁ ናይ ሾዔኔ።

10

ካኣቲ ሳኣዖኦሌኮ ሃይሶ
(1 ሳሙ. 31:1-13)

1 ፒሊሰፄኤሜ ዓሳ ሙኪ ዒሰራዔኤሌ ዓሶ ጾሌሞ ዒሰራዔኤሌ ዓሳ ዔያቶ ቤርታፓ ጳሽኬኔ፤ ዬያ ጾሎና ሚርጌ ዒሰራዔኤሌ ዓሲ ጊልቦዓ ዲካ ሃይቄኔ፤ 2 ዒማና ፒሊሰፄኤሜ ዓሳ ባሹና ሳኣዖኦሌና ዒዛኮ ናኣቶና ዳውሴኔ፤ ዬካፓ ሳኣዖኦሌኮ ናኣቶ፡- ዮናታኣኔንታ ዓቢናዳኣቤንታ ማልኪሹዓንታ ዋዳኔ፤ 3 ሃሣ ሳኣዖኦሌ ዓኣ ዛሎና ጾላ ኮሺ ዶዴሢሮ ሞርካ ዒዛ ሂኢሺና ማኣሳንሢ ዴኬኔ፤ 4 ዒዚ

* 9:40 9:40 ሜሪባዓኣሌ ጌይንቱሢ፡- 2 ሳሙ. 4:4ይዳ «ሜፒቦሹቴ» ጌይንቱ።

ዲማና ዲዛኮ ገቲሞ ዓርቁ ዲዛና ዎላ ሃንታ ዴጎስኬያም፡- «ሃይ ዓይሁዴ ማዒባኣ ዓሳ ታና ዓማሉዎጉዲ ኔኤኮ ጩንቸ ዓፓር ቱጊ ታና ዎዴ!» ጋዓዛ፣ ዴጎህ ጋዓንቴ ዬያይዳኒ ሚርጌና ዒጊጩህረ ዲዛ ሃሼኔ፤ ዬያር ሳኦጎሉ ፔ ጩንቸ ዓፓር ቱጊ ሳዓ ዔቁሲ ጊዳ ሎኦሚኔ፤ ⁵ ዬይ ዴጎህ ሳኦጎሉ ሃይቁህ ዛጌ ዎዶና ዲዚያ ፔ ጩንቸ ዓፓር ሳይይዳ ዔቁሲ ጊዳ ጫቲ ሃይቁኔ። ⁶ ዬያር ሳኦጎሉና ሃይህ ዓቲንቆ ናኦታኣ ዎሊ ዑፃ ሃይቁኔ፤ ዲዛ ቤዛ ካኦታዳንዳ ዓሲ ዓቱዎፃ ቢያ ሃይቁኔ። ⁷ ዲማና ዲይዘራዔኤሌ ዶኦጫ ናንጋ ዲሰራዔኤሌ ዓሳ ዔያቶኮ ፖኦሊሳ ጳሽኬህ፤ ሃህ ሳኦጎሉና ዲዛኮ ናኦቶና ሃይቁህ ዎይዛፃ ፔኤኮ ካታሞ ካታሞ ሃሺ ጳሽኬም ፒሊሰጻኤሚ ዓሳ ሙኪ ዔያቶኮ ካታሞ ዓርቁኔ።

⁸ ያሎ ዓሶኮ ዚር ጉቲሎ ፒሊሰጻኤሚ ዓሳ ሃይቁ፣ ዲሰራዔኤሌ ዓሶኮ ዓኣ ባኮ ጉሲ ዔካኒ ዴንዳፃ ሳኦጎሉና ናኦቶኮ ሌዛ ጊልቦዓ ዲካ ዓኣንቴ ዴንቁኔ፤ ⁹ ዬካፓ ዔያታ ሳኦጎሉኮ ቶኦኮ ቲቁ፣ ሃህ ያሎ ዓንጋሞዎ ጉሴሰካፓ ዔያቶኮ ዎዞ ዔያታ ካኣሽካ ያኦዞና ዓሶናም ኬኤዛንዳጉዲ ኪኢታ ዓሲ ዳኬኔ። ¹⁰ ሳኦጎሉኮ ያሎ ዓንጋሞ ዔያቶ ያኦዞኮ ጌኤዦ ማኦርፓ ፔቲዘይዳ ዔያታ ጌህኔ፤ ቶኦኮ ዲዛኮ ዔያታ ዔያቶ ያኦዞህ፤ ዳኦጎኔ ጎፃህ ጌኤዦ ማኦርይዳ ሱጻኔ። ¹¹ ዲማና ጌሊዓዴይዳ ናንጋ ያቤሽ ዴራ ፒሊሰጻኤሚ ዓሳ ሳኦጎሉይዳ ማዴ ጌሮ ማዶ ዎይዜ ዎዶና፣ ¹² ጫርሺ ዓሲ ዴንዲ ሳኦጎሉና ናኦቶኮ ሌዞ ዔኪ ያቤሽ ሙኬኔ፤ ዲኣካ ዓኣ ሻኣቦ ዴማ ዔያታ ዴኡኬሰካፓ ላንካይ ኬሊ ጉቤ ሙኡዚ ሃሺ ሰዬኔ።

¹³ ሳኦጎሉ ናንጊና ናንጋ ጎዳም ጉሙርቁንታያ ማዒባኣህረ ሃይቁኔ፤ ዲዚ ናንጊና ናንጋ ጎዳኮ ዓይህያ ማዲ ኩንሃ ዲጻኔ፤ ሃህ ናንጊና ናንጋ ጎዳ ጋዓ ባኮ ሃሺ ሃይቁ ዓሶኮ ዔኤዦ ዔኤላ ዓሶ ዦኦቲህና ካራ ዴንቃኒ ኮዔኔ፤ ¹⁴ ናንጊና ናንጋ ጎዳ ዎዚ ጋዓቲያ ዲዚ ያኦጫ ዲጻህረ ናንጊና ናንጋ ጎዳ ዲዛ ዎዴኔ፤ ዬካፓ ካኦቲሞዎ ዲዛኮ ዲሴዬ ናኦዚ፣ ዳውቲ ባንህ ሺርሼኔ።

11

ዳውቲ ዲሰራዔኤሌና ዪሁዳ ዓሶኮ ካኣቲ ማዔህ
(2ኛው፡ 5:1-10)

¹ ዲሰራዔኤሌ ዴራ ቢያ ዳውቲ ኮራ ኬብርኦኔ ሙካዎ፡- «ኦኡኒ ቢያህ ኔኤኮ ዒጊኖኬ፤ ² ቤርታ ሳኦጎሉ ካኣታዲ

10:14 10:14 ሌዋ. ዓኬ 19:31፤ 20:6፤ 1ኛው. 13:8-14፤ 15:1-24፤ 28:7-8።

ዓሳንቲታ? ዒሰራዔኤሌ ዳሮ የሎም ዔኪ ዓሳዳሢ ነናኩ፤ ዬያ ሌሊቱዋንቲ ናንገና ናንጋ ጎዳ ማዔ ኔ ያኦዛሢ ታኦኦ ዳሮ ዔኪ ዓሳዳንዳሢና ዔያቶኦ ካኦቲ ማዓንዳሢ ነናኩ» ገዒ ኔኤም ኬኤዜኔ» ገዔኔ። 3 ዬያይዲ ዒሰራዔኤሌኮ ሱኡጋ ቢያ ዳውቲ ኮራ ኬብሮኦኔ ሙካዛ፣ ካኦቲ ዳውቲያ ናንገና ናንጋ ጎዳ ቤርታ ዔያቶና ዋላ ኬብሮኦኔይዳ ጫኦቄኔ፤ ናንገና ናንጋ ጎዳ ሳሙዔኤሌ ዛሎና ኬኤዜ ቃኦሎ ጎይዖና ዳውቲ ዔያታ ካኦቲዋም ደኦሚ ዒሰራዔኤሌይዳ ካኦታሣኔ።

ዳውቲ ዬሩሳላሜ ያሊ ባሽሢ

4 ካኦቲ ዳውቲና ዒሰራዔኤሌ ዓሳ ጉቤ ዳንዲ ዬሩሳላሜ ካታዋ ያሌኔ፤ ዒማና ካታሜሎኮ ሱንፃ፡- «ዒያቡሱ» ገይንታኔ፤ ዒዘ ዓጮይዳ ናንጋዘንሢ ዒያቡሳ ዓሳኩ። 5 ዬና ዓሳ ዳውቲም፡- «ኔ ሃይካ ፔቲታ? ገላዓኩ» ጋዓዛ፣ ዳውቲ ጋዓንቲ ጂዮኔይዳ ዔያታ ዋርዲ ዳዔ ቤዘ ዓርቄኔ፤ ዬካፓ ዬና ቤዘ «ዳውቲ ካታማ» ገይንቲንሢ ዓርቄኔ። 6 ዳውቲ ዒማና፡- «ዒያቡሳ ዓሳ ቢሪ ቤርታዲ ዲኬ ዓሢ የሎ ዓሳኮ ሱኡገ ማዓንዳኔ!» ገዔኔ፤ ዬያሮ ጁና ናኦዚ፣ ዲዮዓቤ ቤርታዲ ዳንዲ ዒያቡሳ ዓሳ ዲኬሢረ ዒዚ የሎ ዓሳኮ ሱኡጋሢ ማዔኔ፤ 7 ዳውቲ ዳንዲ ዋርዲዮ ቤዘ ገሊ ዳዔሢረ ዬና ካታማ «ዳውቲ ካታማ» ገይንቲኔ። 8 ዳውቲያ ሚሎ ገይንታ ቤዘፓ ዓርቃዖ ካታሜሎኮ ዙሎ ኬልቄ ዲርቄኔ፤ ሄሊሳዖ ዒዮዓቤያኦ ካታሜሎኮ ዓቲ ዛሎ ኮሽኔ፤ 9 ቢያ ባኮ ዋይሢ ጎዳ ማዔ ያኦዛሢ ዒዛና ዋላ ማዔሢረ ዳውቲ ሃቸም ደዲ ደዲ ዓኦዔኔ።

የሎና ዔርቲ ዳውቲኮ ፖኦሊሶ (2ሳሙ. 23:8-39)

10 ዳውቲኮ የሎና ዔርቲ ፖኦሊሶ ሱንፃ ሃይካፓ ዳማ ፓይዲንታ ጎይዖኬ፤ ዔያታ ሃንጎ ዒሰራዔኤሌ ዓሳና ዋላ ማዒ ናንገና ናንጋ ጎዳ ዳውቲም ኬኤዜ ዋዘ ቃኦሎ ጎይዖና ዳውቲ ካኦታዳንዳጉዲ፤ ሃሢ ካኦቲማኦ ደዲ ኮሺ ዔርቲያ ማዓንዳጉዲ ማሣኔ።

11 ቤርታሳሢ ሃኪሞኔ ቶኦኪ ማዔ ያሾብዓሚ ማዓዛ፣ ዒዚያ የሎና ዔርቲ ሃይሢሢከ * ሱኡጋሢኬ፤ ዒዚ ዓይጎ ዋኦቲይ ገዔቲ ዋርሢ ዔኪ ሃይሢ ጃኤታፓ ዑሣ ማዔ ዓሳና ዋላ ፔቲና የልታዖ ዬያቶ ቢያ ዋዔኔ፤ 12 ዒዛ ሄሊሳዖ ሃይሢ የሎና ዔርቲዘንሢፓ

11:4 11:4 ዓያ. 15:63፤ ሱኡጎ. ማፃ 1:21። * 11:11 11:11 ሃይሢሢከ ፔቲ ሚናኦ ማፃኦ፤ 2ሳሙ. 23:8ይዳ «የሎና ዔርቲ ሃይሢታሚ ዓሳ» ገዔኔ፤ ዔብሪ ዓሳ ሙኤጮና ሃይሢንታ ሃይሢታሚንታ ፃኦፐንታ ዋደና ፔቲ ማዔሢረ ዬኖ ቤዘ ዋኦዲ ጋዓቲያ ዔርቲዋያኩ።

ፔቴሢ ዓሆሂ ቶኦካፓ ደደናኦዚ ዓላዜሬከ፤ 13 ዒዚያ ፕሊሰጻኤሜ ዓሳ የሎሮ ጊኢጊንቴ ዎደና ፓሰዳሚሜይዳ ዳውቴና ዎላኬ፤ ዒዞ ቤዘይዳ ዔልዓ ሚርጌ ጎሽኮና ጎሺ ዓኣንቴ ዒሰራዔኤሌ ፖኦሊሳ ፕሊሰጻኤሜ ዓሶ ቤርታፓ ጳሽኬኔ። 14 ጋዓንቴ ዓላዜሬና ዒዛና ዓኣ ዓሳ ዬያ ጎዡ ጋራ ፕሊሰጻኤሜ ዓሶ ቃዚ የሌኔ፤ ናንጊና ናንጋ ጎዳኣ ዔያቶ የሎና ባሺሲሴኔ።

15 ፔቴ ከሊ ሃይሢታሚ የሎና ዔርቴ ፖኦሊሶፓ ሃይሃ ፖኦሊሴ ፕሊሰጻኤሜኮ ፖኦሊሳ ራፓይሜ ደኦጫ ዲንኪ ዴዒ ዓኣንቴ ዳውቴ ናንጋ፣ ዓዲላሜ ዴና ዔቶ ኮይላ ዓኣ ላሎ ዴንዴኔ፤ 16 ዳውቴ ዒማና ዎርዲዮ ማላ ጌሜርይዳ ዓኣንቴ ፕሊሰጻኤሜ ፖኦሊሶኮ ዛላ ቤኤቴሌሄሜ ካታዎ ጌሊ ዓርቄኔ። 17 ዳውቴ፡- «ቤኤቴሌሄሜ ጌሎ ዲሮ ካሮ ኮይላ ዓኣ ዎኣቶ ዔታፓ ዑሽኮ ዎኣሢ ዓይጌ ታኣሞ ዒንጋንዳይ?» ጌይ ዓፃዴኔ። 18 ዬማና የሎና ዔርቴ ሃይሃ ፖኦሊሶንሢ ፕሊሰጻኤሜ ዓሳ ዓኣ ቤዘይዳና ዓኣዲ ዎኣቶ ዲያ ዔታፓ ዎኣሢ ዲዒ ዳውቴሞ ዔኪ ሙከንቴ፣ ዳውቴ ዑሽካኒ ኮዒባኣሢሮ ዎኣቶ ናንጊና ናንጋ ጎዳሞ ዒንጎ ባኣዚ ማሂ ሳዓ ላኣሊ፡- 19 «ታኣኒ ሃያ ዎኣቶ ፔቴታዎ ዑሽካዓኬ! ታኣኒ ዑሽኬያ ማዔቴ ዬንሢ፣ ፔ ሺሞፓሢ ዒፃ ዴንዴ የሎና ዔርቴ ዓሶንሢኮ ሱጉዎ ዑሽኪሢጉዳያኬ!» ጌዔኔ። ዬያሮ ዎኣቶ ዑሽካኒ ዒ ናሽኪባኣሴ፤ ዬንሢ የሎና ዔርቴ ሃይሃ ፖኦሊሶንሢ ጫርቄ ማዴ ባካ ዬያኬ።

20 ዒዮዓቤኮ ጌርሲ ዓቢሳ ጎዎሢ ዬንሢ፣ የሎና ዔርቴ ሃይሃ ፖኦሊሶንሢኮ ዑዎ ሱኡጋሢኬ፤ ዒዚ ዎርዎ ዓርቄ ሃይሃ ጻኤታ ዓሲ ዎዴሢሮ ዬንሢ፣ የሎና ዔርቴ ሃይሃ ፖኦሊሶንሢጉዲ ዔርቴያ ዒ ማዔኔ፤ 21 የሎና ዔርቴ ሃይሃንሢጉዲ † ማዒ ዒ ፓይዲንቴባኣያ ማዔቴያ ዒ ጫርቄ ማዴ ማዶና ዔያቶይዳፓ ባሺ ጳንጨፍ ቦንቾ ዴንቄሢሮ ዔያቶኮ ሱኡጌ ማዒኒ ዳንዳዔኔ።

22 ቃብፃዔኤሌ ዓጮይዳ ዮዳሂ ናኣዚ ቤናያ የልዚና ዔርቴ ፖኦሊሴኬ፤ ዒዚ ላሞዎ፣ ሞዓኣቤ ዓጮኮ የሎና ዔርቴ ዓሲ ዎዴሢ ሃሽዛ ሜሌ ሚርጌ ጫርቆሞ ማዶ ማዴኔ፤ ፔቴና ሳዎይዳ ዴኤፒ ሻቺ ኬዲ ሳዎ ባይዜ ከሊሰኬና ዒዚ ፔቴ ዴኔ ዔቴ ጌሊ ዘቢ ዎዴኔ፤ 23 ዬያጉዲ ሃሃ ኮሺ ዴኤፒ ዎርሢ ዓርቄያ፣ ዔጳ ደንጎ ዎዴ ማዔ ዓንዲሪ ጌብፃ ዓሲሰኬያኣ ዎዴኔ፤ ዒማና ቤናያ ኩጮይዳ ኮኦሎፓ ዓታዛ ሜሌ ዓንጋሞ ዔኩዎዎ ጌብፃ ዓሢ ባንሢ ሙኪ ጌብፃ ዓሢ ጳርቄሰካፓ ጌብፃ ዓሢኮ ዘዓ ዓንዲራሽ ሚዎጉዲ ማዔ ዎርዎ ሳሪ ዔኪ ዒዛና ዎዴኔ። 24 ዬንሢ ሃይሢታሞንሢዳፓ ‡ ፔቴሢ ማዔ፣

† 11:21 11:21 ሃይሃንሢጉዲ ጋዓዛ ዛሎ፡- ፓይ. 11ይዳ ዛጌ። ‡ 11:24 11:24 ሃይሢታሞንሢዳፓ ጋዓዛ ዛሎ፡- ፓይ. 11ይዳ ዛጌ።

ቤናያ ጫርቂ መጻፊ ባካ ዬያኩ፤ 25 ሃይሂታሞንሂ ባካካፓ ሚርጌና
ዒዚ ያሎና ዔርቲያ ማዔቲያ ዒ ጫርቂ መጻፊ ማጻ ሃይሂ ጫርኩ
ፖኦሊሶንሂሲጉዲ ማዒባኦ፤ ዳውቲ ፔና ካፓ ዓሶኮ ሱኡጌ ማሂ
ቤናያ ደኦሬ።

26-47 ዬንሂ ያሎና ዔርቲ ሃይሂታሞንሂዳፓ ሜሌ ያሎና ዔርቲ
ዓሶኮ ሱንፃ ሃይካፓ ዴማ ፓይዲንታዞንሂኩ፡-

ዒዮዓቤ ጌርሲ ዓሳሄሌ፤
ቤኤቴሌሄሜ ካታሞ ዓሂ ደደ ናኣዚ ዔልሃና፤

ሃሮዴ ዓጮ ዓሂ ሻሞቲ፤

ፔሌፃ ዓጮ ዓሂ ሄሌፃ፤

ቴቆዓ ካታሞ ዓሂ ዒቁሼ ናኣዚ ዒራ፤

ዓናቶቲ ካታሞ ዓሂ ዓቢዔዜሬ፤

ሁሻ ዓጮ ዓሂ ሲቤካዬ፤

ዓሆሂ ዓጮ ዓሂ ዒላዬ፤

ኔያፓ ዓጮ ዓሂ ማሂራዬ፤

ሃሃ ኔያፓ ዓጮ ዓሂ ባዕና ናኣዚ ሄሌዴ፤

ቢኢኒያሜ ዓጮይዳ ዓኣ ገቢዓ ካታሞ ዓሂ ሪባዬ ናኣዚ ዒታዬ፤

ፒርዓቶኔ ዓጮ ዓሂ ቤናያ፤

ጋዓሼ ዓጮ ኮይላ ዓኣ ደኤጮይዳ ሸይንቲ ሁራዬ፤

ዓሬባ ዓጮ ዓሂ ዓቢዔኤሌ፤

ባሁሩሜ ዓጮ ዓሂ ዓዘማዌቲ፤

ሻዓልቤ ዓጮ ዓሂ ዔልያህባ፤

ገዞኔ ዓጮ ዓሂ ሃሼሜ፤

ሃራሬ ዓጮ ዓሂ ሻጌ ናኣዚ ዮናታኣ፤

ሃሃ ሃራሬ ዓጮ ዓሂ ሳኮሬ ናኣዚ ዓሂዓሜ፤

ዑሬ ናኣዚ ዔልፓሌ፤

ሜኬሬ ዓጮ ዓሂ ሄፔሬ፤

ፔሎኔ ዓጮ ዓሂ ዓሂያ፤

ቁርሜሎሴ ዓጮ ዓሂ ሄፅሮ፤

ዔዘባዬ ናኣዚ ናዕራዬ፤

ናኣታኣኔ ጌርሲ ዮዔሌ፤

ሃግሪ ናኣዚ ሚብሃሬ፤

ዓሞኦኔ ዓጮ ዓሂ ጂሌቁ፤

ቤዔርቲ ዓጮ ዓሂ ዒዮዓቤኮ ያሎ ዓንጋሞ ዔኪ ሃንታ ናህራዬ፤

ያቲሬ ዓጮ ዓሶንሂ ዒራና ጋሬቤና፤

ሂታ ዓሂ ያሪዮኔ፤

ዓህላዬ ናኣዚ ዘባዴ፤

ሺዛ ናኣዚ ዓዲና፤ [ዬይ ዓሂ ዒዛና ዎላ ሃይሂታሚ ፖኦሊሴ ዓኣያ
ማዒ ሮኦቤኤሌ ፃጳፓ ዔርቲ ዓሲኩ፤]

ማዕካ ናኣዚ ሃናኔ፥
 ሚታኔ ዓጮ ዓሢ ሲዮሳፒፆ፥
 ዓሽቴራ ዓጮ ዓሢ ዑዚያ፥
 ዓሮዔኤሬ ዓጮ ዓሢ ሆታሜ ናኣቶ ሻማዕና ዩሲዔኤሌና፥
 ቲዒ ዓጮ ዓሢ ሺምሪ ናኣቶ ዩዲዕዔኤሌና ዮሃና፥
 ማሃዋ ዓጮ ዓሢ ዔሊዔኤሌ፥
 ዔልናዓሜ ናኣቶ ዩሪባሄና ዮሻውያና፥
 ሞዓኣቤ ዓጮ ዓሢ ዩትማ፥
 ያባ ዓጮ ዓሶንሢ፡- ዔሌዔሌ፥ ያቤዴንታ ያዕሲዔሌንታኩ።

12

በኢኒያሜ ፃጳፓ ዳውቴ ጊንዖ ሺሬ ዓሶ

1 ዳውቴ ቂሴ ናኣዚ ሳኦጶኦሌይዳፓ ዓኣሺንቲ ፃቅላጌይዳ ናንጋንቲ ጉሙርቁንታያና ያልዚ ዛላ ዔራያና ማዔ ሚርጌ ፖኦሊሴ ዒዛና ዋላ ፔቴ ማዒ ዒዛ ጊንዖ ሺሬኔ። 2 ዔያታ ሳኦጶኦሌጉዲ በኢኒያሜ ፃጳኩ፤ ዔያታ ሚዛቆና ሻውሎ ኩጮናኣ ቢያ ሂኢሺ ዲካኒ፥ ሃሃ ዋራ ዋራኒ ዳንዳዓያኩ፤ 3-7 ዔያታ ጊቢዓ ካታሞይዳ ሾይንቲ፥ ዒሺማዓ ናኣቶ ማዔ ዓሂዓዜሬና ዮሳሹናኮ ቢታንቶ ዳማ ዋርቃያኩ። ዩያ ፖሊሶኮ ሱንፃ ሃይካፓ ዳማ ዓኣ ጎይዖ ፓይዲንቲ፡- ዓዘማዌቴ ናኣቶ ዩዚዔሌና ፔሌፆና፥ ዓናቶቴ ካታሞ ዓሶንሢ ቤራካና ዒዩና፥ ያሎና ዔርቴያታዖ ጊንፃፓ ሃይሢታሞ ዔርቴ ሱኡጎ ማዔዘንሢኮ ፔቴያ ማዔ፥ ጌባዖኦኔ ካታሞ ዓሢ ዩሽማዕያ፥ ጌዴራ ካታሞ ዓሶንሢ፡- ዩርሜያ፥ ያሂዘዔኤሌ፥ ዮሃናኔንታ ዮዛባዴና፥ ሃሪፔ ዓጫ ሾይንቲ፡- ዔልዑዛዬ፥ ያሪሞቴ፥ ቤዓልያ፥ ሽማሪንታ ሺጳጲያንታ፥ ቆሬ ቶኦኮ ማዔ፡- ዔልቃና፥ ዩሺያሁ፥ ዓዛርዔሌ፥ ዮዔዜሬንታ ያሽብላሜንታ፥ ጌዶሬ ካታሞ ዓሶንሢ ዩርሃሜ ናኣቶ፡- ዮዔላና ዜባድያና።

ጋኦዴ ፃጳፓ ዳውቴ ጊንዖ ሺሬ ዓሶ

8 ዳውቴ ዓሲ ናንጉዋ ዳውሎይዳ ዋርዲዮ ቤዛ ዓኣንቲ ጋኦዴ ፃጳፓ ሙኪ ዒዛኮ ያሎ ዓሶ ባኣኮ ጌሌ፥ ያሎና ዔርቴያ፤ ሃሃ ያልዚያ ያሊ ዔሬ ፖኦሊሶኮ ሱንፃ ሃካፓ ዳማ ዓኣዘንሢኩ፤ ዔያታ ጌቲማና ዋርሢና ዔኪ ያሊሢና ዔርቴያኩ፤ ዔያታ ዘቢ ዒጊቻሢጉዲ ዒጊቻያ፥ ሩኡሩማኣ ጌሜሪዳ ናንጋ ሹኡጌ ጳሽካሢጉዲኩ፤ 9-13 ዔያቶኮ

ሱንፃ ዓይዳቶሱ ሱኩጋቶጉዳያ ጉዳያ ዋሊ ገንፆ ፓይዲንቴኔ፡- ዔዜሬ፡
ዓብዲደ፡ ዔሊዓቤ፡ ሚሸማና፡ ዔርሚያሴ፡ ዓታዬ፡ ዔሊዔኤሌ፡
ዮሃናኔ፡ ዔልዛባዴ፡ ዔርሚያሴንታ ማክባናዬንታኔ።

14 ጋኦዴ ፃፀ ማዔ ዬንሢ ዓሶይዳፓ ዛላ ዓሲ ሺዮ ፖኦሊሶ ዓይሣ
ሱኩጋቶ ዓኣያና ፃኤቶ ፖኦሊሶ ዓይሣ ሱኩጋቶ ዓኣያኔ። 15 ፔቴ
ኬሊ ቤርታሳ ዓገና ፃፃኤራኣና ዮርዳኖሴ ዋራ ሱካፓ ሱኩ ሄሊ
ኩሚ ዓኣንቴ ዋርና ዔያታ ፒንቄኔ፤ ዋርኩ ዓባ ኬሰካ ዛሎና ጌላ
ዛሎናይዳ ዓኣ ዶኦጮ ገንፃ ናንጋ ዴርዋ ዔያታ ዳውሴኔ።

ቢኢኒያሜና ዪሁዳ ፃፀናፓ ዳውቴ ገንፆ ሺሬ ዓሶ

16 ፔቴና ዪሁዳና ቢኢኒያሜና ፃፀፓ ኬሰኬ ዛላ ዓሲ ዳውቴ
ዋርዲ ዴዒ ዓኣ ቤዘ ዴንዴኔ፤ 17 ዳውቴ ዬኖ ዓሶ ጎይሣ ዔካኒ
ኬሰካዎ፡- «ዒንሣ ሃይካ ሙኩሣ ታና ማኣዳኒ ማዔቴ ቃራኬ፤ ዒንሣ
ታ ዛላ ማዒ ታኣና ዋላ ዔቃያ ማዔቴ ታ ዒንሣ ዔካኒ ገኢጌያኬ፤
ጋዓንቴ ታ ዳቤ ባኣዚ ባኣያ፡ ጌኤሺ ዓኣንቴ ታ ሞርኮሞ ዓኣሣ
ዒንሣ ታና ዒንጋያ ማዔቴ ቤርታኣ ኑ ዓዶንሣ ያኦዛሣ ዛገ ዋጎንጎ!»
ጌዔኔ።

18 ዬካፓ ያኦሲኮ ዓያና ያሎና ዔርቴ ሃይሣታሞ ዓሶኮ ሱኩጋሣ፡
ዓሚሲያሴ ዑፃ ኬዴሞ ዒዚ፡-

«ዳውቴ! ኑኦኒ ኔኤርኬ!
ዒሴዬ ናዓሣ ዳውቴ፡ ኑኦኒ ኔኤና ዋላኬ!
ኔኤና ኔና ማኣዳ ዓሶናሞ ኮሹሞ ማፆንጎ!
ያኦሲ ኔኤና ዋላ ማዒ ኔና ማኣዳንዳኔ»

ጌዒ ዑኦዘ ፔኤሲ ዳገዲ ዒላቴሞ፡ ዳውቴ ዔያቶ ዋዛና ዔኪ ፔ
ፖኦሊሶኮ ሱኩጌ ማሄኔ።

ሚናኣሴ ፃፀፓ ዳውቴ ገንፆ ሺሬ ዓሶ

19 ዳውቴ ፒሊሰፃኤሚ ዓሶና ዋላ ፔቴ ማዒ ካኣቴ፡ ሳኣያኦሌ
ያላኒ ዓኣዴ ዋዶና ሚናኣሴ ፃፀፓ ዛላ ፖኦሊሴ ዳውቴ ፖኦሊሶና
ዋላ ፔቴ ማዒኒ ዴንዴኔ፤ ዒማና ፒሊሰፃኤሚ ዓሶኮ ሱኩጋ ጋዓንቴ፡-
«ዳውቴ ኑና ዒዒ ቤርታ ዒዛኮ ጎዳ፡ ሳኣያኦሌ ባንሣ ሺሬ ኑና
ኩርሳንዳኔ» ጌዒ ዒዛ ዒገጩሣረ ዋላ ጌሰታዎ ዒዚ ቲግላጌ ማዒ
ዴንዳንዳጉዲ ዳኬኔ፤ 20 ዳውቴ ቲግላጌ ማዔሰካፓ ሚናኣሴ ፃፀፓ
ዒዛ ገንፆ ሺሬ ፔቴ ፔቴ ፖኦሊሶኮ ሱንፃ ሃካፓ ዴማ ፓይዲንቴ
ጎይያኬ፡- ዓድናሄ፡ ዮዛባዴ፡ ዪዲዕዔኤሌ፡ ሚካዔኤሌ፡ ዮዛባዴ፡
ዔሊሁና ፂሌታዬናኬ፤ ዬንሣ ቢያ ሚናኣሴ ዓጮይዳ ዓኣዎ ሺዮ
ዓሶኮ ሱኩጋቶ ዓኣያኔ። 21 ቢያሣ ዔርቴ ፖኦሊሴታሣረ ያሎ ያላ
ዓሶ ባኣካ ያሎ ያሊሳ ሱኩጎ ማዒ ዔያታ ማዴኔ፤ ዬካፓ ናንገቤቃ
ዒሰራዔኤሌኮ ያሎ ያላ ዓሶ ጉቤኮ ሱኩጌ ማዔኔ። 22 ቢያ ኬሊ

ዓሲ ሙኪ ሙኪ ዳውቴኮ ያሎ ዓሶ ባኣኮ ጌላሢር ኔጉሞ ዳውቴኮ ያሎ ዓሶ ፀሓሳ ዓኣጳ ያልቃዲ ሚርጊ ሚርጊ ዓኣጳ።

ዳውቴኮ ያሎ ዓሶ ሚርጉሞ

23-37 ቤርታ ናገጊና ናገጋ ጎዳ ዳውቴሞ ጫኣቄ ጎይያና ሳኣዮሌ ካኣቱሞ ዳውቴ ባንሢ ማሃኒ ኬብርኣኔ ሙኬ ዓሳ፡-

ዪሁዳ ፃጳጵ፡- ገቲማና ያልዚ ዓንጋሞ ኮይሳሢጉዴያ ዓርቄ ላሆ ሺያና ሳሊ ያኤታ ፖኦሊሴ።

ሲሞኦኔ ፃጳጵ፡- ኮይሳሢጉዴያ ዔሬያ ላንካይ ሺያና ፔቴ ያኤታ ፖኦሊሴ።

ሌዊ ፃጳጵ፡- ያይዶ ሺያና ላሆ ያኤታ ዓሲ፤

ዓኣሮኔ ዜርያ ማዔያ፡ ዮዳሄና ዎላ ዓኣ ዓሳ ሃይሦ ሺያና ላንካይ ያኤታ ዓሲ፤

ያሎና ዔርቲያ ማዔ ያዶቄ ዒጊናጵ፡- ላማታሚ ላምዎ ዔርቲ ሱኡጌ፤

ሳኣዮሌኮ ዒጊናሢ ማዔ ቢኢኒያሚ ፃጳጵ፡- ሃይሦ ሺያ ዓሲ፤

ዬያ፡ ቢኢኒያሚ ዓሶኮ ባሼሢ ዴንዲ ዬማ ሄላንዳኣና ሳኣዮሌም ጉሙርቁንታያ ማዔ ዓኣ ጎይሣኬ።

ዔፕሬኤሜ ፃጳጵ፡- ላማታሚ ሺያና ሳሊ ያኤታ ዓሲ ማዓዛ ቢያሢ ፔኤኮ ቶኦኮና ቶኦኮና ያልዚና ዔርቲያኬ።

ዓባ ጌላ ዛሎና ዓኣ ሚናኣሴ ፃጳጵ፡- ታጳ ሳሊ ሺያ ዓሲ፤ ዳውቴ ካኣታሢያኮ ዔያቶ ዴማሲ ዶኦርናያኬ።

ዪሳኮኦሬ ፃጳጵ፡- ላምዎ ያኤታ ዓሲ ሱኡጌ ማዓዛ፡ ዔያቶ ቢታንቶኮ ዴማ ዓኣ ዓሳ ጉቤሢ ዔያቶና ዎላኬ፤ ዬንሢ ሱኡጎንሢ ዒሰራዔኤሌ ዓሳ ዓይጎ ማዳኒና ዓይዲ ማዳኒ ኮይሳቲያ ዔራ ዓሶኬ።

ዛብሎኦኔ ፃጳጵ፡- ጉሙርቁንታያ፡ ዓጪ ናሽካ ዓቲንቄ ያልዚም ጊኢጌያ ማዔ ዓይጎ ዓንጋሞና ማዔቴያ ያላኒ ዳንዳዓ ዶንጊታሚ ሺያ ፖኦሊሴ፤

ኒፕታኣሌኤሜ ፃጳጵ፡- ገቲማና ዎርሢና ዓርቄያ ሃይሢታሚ ላንካይ ሺያ ፖኦሊሴ ማዓዛ፡ ፔቴ ሺያ ሱኡጌ ማዓ ዓሲና ዎላኬ።

ዳኣኔ ፃጳጵ፡- ላማታሚ ሳሊ ሺያና ላሆ ያኤታ ያልዚ ዔራ ፖኦሊሴ፤

ዓሴኤሬ ፃጳጵ፡- ያይዲታሚ ሺያ ያልዚም ጊኢጊንቴ ፖኦሊሴ፤

ዮርዳኖሴኮ ዓባ ኬሰካ ዛሎና ዓኣ ሮኦቤኤሌ፡ ጋኣዴና ሚናኣሴና ፃጳጵ፡- ዓይጎ ዓንጋሞናታቴያ ያላኒ ዳንዳዓ ፔቴ ያኤታና ላማታሚ ሺያ ፖኦሊሴ ዓኣ።

38 ዬይ ያሎም ጊኢጊንቴያ ማዔ ፖኦሊሳ ቢያ ዳውቴ ዒሰራዔኤሌይዳ ካኣታሢኒ ጋፒንሢ ማላሢ ጌሢ ኬብርኣኔ

ዴንዴኔ፤ ዓቴ ዒሰራዔኤሌ ዓሳ ዩያ ማሊያ ቃራኬ ገይ ዔኬኔ፤
 39 ዩያታ ቢያ ዔያቶኮ ዒጊና ዒጊና ዔያቶሞ ገኢጊሼህሂ ዋዛና
 ሙዒ ዑሽኪ ዑሽኪ ዳውቴና ዋላ ሃይሃ ኬሊ ፔኤቄኔ፤ 40 ዓጮኮ
 ኬዶ ዛሎና ዓኣ ዩሳኮኦሬ፤ ዛብሎኦኔና ገገታኣሌኤሜ ፃጳፓኣ
 ዓቱዋያ ሚርጌ ዓሲ ሃሪና ጋኣሎና ባቁሎና ጌማይና ሚርጌ
 ሙኡዚ፤ ዲኢሊ፤ ቤሌሴ ሚያ ዓኣፓ፤ ቤሌሴ ሚያኮ ዓኣፓ
 ዲንቆና ላጫህ፤ ዋይኔፓ ኮሸና ዑዠንታ ሪሚቶ ዛይቶንታ ጫኣኒ
 ዔኪ ሙኡኬኔ፤ ዩያጉዲ ሃህ ሹኪ ዔያታ ሙዓንዳ ሚርጌ ባይና
 ማሪይና ዔኪ ሙኡኬኔ፤ ዩይ ቢያ ዔያቶኮ ዓጮይዳ ዓኣ ዴራ ዋዛዴ
 ዋዞ ዔርዛያኬ።

13

ጫኣቁሞ ሳኣፂኖ ቂርያትይዓሪሚፓ ዩሩሳላሚ ዔኪ ዓኣዳኒ
 ማሎናህ

(2ሳሙ. 6:1-11)

1 ካኣቲ ዳውቴ ሺኖና ጭቶ ፖኦሊሶ ዓይህያ ማዔ ያሎ ያሊሳ
 ሱኡጎ ቢያህና ዋላ ዘርቴኔ። 2 ዩካፓ ዒሰራዔኤሌ ዴርሞ ጉቤ፦
 «ዒንህ ዔኤዔያ ማዔያታቴ ሃህ ናንጊና ናንጋ ጎዳ ማዔ ኦ
 ያኦዛህ ማሊህ ማዔያታቶ ዓቴ ኦ ዓጮ ዓሶንታ ቄኤሶንታ ዳኮ ዳኮ
 ካታሞይዳ ናንጋ ሌዋ ዓሶንታሞ ከኢታ ዓሲና ዔኤሊህ ዳኪ ሃካ
 ዔያታ ሙከ ኦኡና ዋላ ቡከንታንዳጉዲ ኦ ኬኤዞም። 3 ሳኣያኦሌ
 ካኣታዲ ዓኣ ዋዶና ዋሊንቲ ዓቴ ኦ ያኦዛህኮ ጫኣቁሞ ሳኣፂኖ ዴንዲ
 ኦ ዔኪ ሙካንዳኔ» ጌዔኔ። 4 ዴራ ዒዛኮ ዩያ ማሊያጉዲ ማዳኒ
 ዋዛና ዔኤዔኔ።

5 ዩያሮ ዳውቴ ጫኣቁሞ ሳኣፂኖ ቂርያትይዓሪሚፓ ዩሩሳላሚ
 ዔኪ ዩዓኒ ዶኦሎ ዛሎና ዴንዲ ገብፂ ዓጮ ዛጳና፤ ኬዶ ዛሎና
 ሃማቴ ባንህ ዓኣዳ ጎይያ ሂላንዳኣና ዒሰራዔኤሌ ዓጮ ጉቤይዳ
 ዓኣ ዴር ፔቴይዳ ቡኩሴኔ። 6 ከሩቤሌ ጋኣዘይዳ ዴዔ፤ ሱንፃ
 ናንጊና ናንጋ ጎዳ ጌይንቴ ያኦዛህኮ ጫኣቁሞ ሳኣፂኖ ዔኪ
 ሙካኒ ዳውቴንታ ዴራኣ ቢያ ዩሁዳ ዓጮይዳ ባዓላ ጌይንታ
 ቂርያትይዓሪሚ ካታሞ ዴንዴኔ። 7 ያኦሲኮ ጫኣቁሞ ሳኣፂኖ
 ዓቢናዳኣቤ ማኦራፓ ኬሲ ዔኪ ዓከ ሳርጌላ ያይታይዳ ጫኣኔ፤
 ዒማና ዑዛና ዓሂኖ ጎይሰኬንህ ሳርጌሎ ያይቶ ዒሻኔ፤ 8 ዳውቴንታ
 ዒሰራዔኤሌ ዴራ ቢያ ሚርጌ ሻሺና ዴንህ ዋርቆ ጎኦሎና ፔቴ
 ሻሺ ዴንህ ዋርቆ ጎኦሎ ዋርቃያ ካራቤያ ባዒ ባዒ ገንህ ሂሻጉዲ

13:5 13:5 1ሳሙ. 7:1-2። 13:6 13:6 1ሳሙ. 7:1-2።

ገልሶ ባኣዚያ ገልሲ ገልሲ፤ ሹሉንጎጉዴ ባኣዚያ ዋርቁ ዋርቁ ያኦሲ ቦንቾም ዓይኑምና ዒናፓ ባይዲ ባይዲ ኮርጋኔ።

9 ዩካፓ ኪዶኔ ጌይንጎታ ሃኣኮ ሺርኮ ቆይዳ ሄላየ ሳርጌሎ ያይቶ ጎቻ ጌማጎታ ዲቁንቲ ጫኣቁም ሳኣዲና ዓገሠሠረ ሀዘ ፔ ኩጮና ያኦሲኮ ጫኣቁም ሳኣዲና ዶዑዋጉዲ ዓርቁኔ፤ 10 ዒማና ሀዘ ጫኣቁም ሳኣዲና ካኣሜሠረ ናንገና ናንጋ ጎዳ ዳጋዳጋ ቤዘማና ዒዛ ዋዳም ዒኢካ ያኦሲ ቤርታ ሃይቁኔ። 11 ናንገና ናንጋ ጎዳ ዳጋዲ ሀዘ ዔሪቦኣንጎቲ ዋዳሠረ ዳውቴ ዳጋዳኔ፤ ዬና ቤዘላ ሃና ሄላንዳኣና «ፔሬፅ ሀዘ»* ጌይንጎታ።

12 ዩካፓ ዳውቴ ያኦሲ ሚርጌና ዒገጫዎ፡- «ዓካሪ ሃያ ያኦሲኮ ጫኣቁም ሳኣዲና ታ ማኣሪ ዋዲ ታ ዔኪ ዓኣዳንዳይ?» ጌዔኔ።

13 ዬያሮ ዳውቴ ጫኣቁም ሳኣዲና ዬሩሳላሜ ዔኪ ዓኣዲዎ ሃሺ ጋኣቲ ካታማ ናንጋ፣ ያቤድዔዶኦሜ ማኣራ ጌሠኔ። 14 ዬይ ጫኣቁም ሳኣዲና ዒኢካ ሃይሠ ዓገኒ ዳዔኔ፤ ዬያሮ ናንገና ናንጋ ጎዳ ያቤድዔዶኦሜኮ ማኣሮ ዓሶና ዒዛሮ ማዔ ባኮ ቢያ ዓንጄኔ።

14

ዳውቴ ዬሩሳላሜይዳ ማዳ ማዳ (2ሳሙ. 5:11-16)

1 ዒሮሴ ካኣቲ፣ ኪራሜ ዳውቴ ኮራ ኪኢታ ዓሲ ዳኬኔ፤ ዳውቴኮ ካኣቲም ማኣሮ ማዛኒ ለባኖኦሴ ሚያ ዔኬ ሃኣሚንጎታ ሹጮና ማኣሮ ማዛኖ ዓሲያኣ ዬኖ ኪኢቶ ዓሶና ዋላ ዴንዳኔ፤ 2 ናንገና ናንጋ ጎዳ ዒሰራዔኤሌኮ ካኣቲ ማሂ ዒዛ ዶዲሼሠረ ፔኤኮ ዳሮ ዒሰራዔኤሌሮ ጌዒ ዒዛኮ ካኣቲም ያርጎቹያ ማዔሠ ዳውቴ ዔሬኔ።

3 ዳውቴ ዬሩሳላሜይዳ ሚርጌ ላኣሊ ዔኪ ሚርጌ ዓቲንቁና ዉዶሮ ናይና ሸዔኔ፤ 4 ዒዚ ዬሩሳላሜይዳ ዓኣየ ሸዔ ዓቲንቆ ናኣታ፡- ሻሙዓ፣ ሸባቤ፣ ናኣታኣኔ፣ ሴሎሞኔ፣ 5 ዪብሃሬ፣ ዔሊሹዓ፣ ዔሊፓሌዳ፣ 6 ኖጋሃ፣ ኔፔጌ፣ ያፒዓ፣ 7 ዔሊሻማዓ፣ ቤዔልያዳና ዔሊፔሌቲ ጌይንጎታኦ።

ዳውቴ ያሎና ፒሊሰዴሜ ዓሶ ባሽሠ (2ሳሙ. 5:17-25)

8 ዳውቴ ዒሰራዔኤሌ ዓጮ ቢያይዳ ካኣታዳሠ ፒሊሰዴሜ ዓሳ ዋይዛየ ያሊ ዓርቁ ዲዒ ዔካኒ ፔኤኮ ያሎ ዓሶ ዳኬኔ፤

* 13:11 13:11 ፔሬፅ ሀዘ ጌይዎ፡- ዔብሬ ዓሶ ሙኡጮና «ሀዘ ሜንሃና ቤዘ» ጌይሠኦ። 13:14 13:14 1ያኦሲ. ዓሃኬ 26:4-5።

ዳውቴያ ይያዋይዘዎ ዔያቶና ያልታነ ከሰከኔ፤⁹ ዲማና ፒሊሰጻኤሜ ዓሳ ራፓይሜ ዶኦጮ ሙኪ ያሎ ዓርቁኔ፤¹⁰ ይያሮ ዳውቴ፡- «ፒሊሰጻኤሜ ዓሶ ታ ያሎንዶ? ታኣም ኔ ዔያቶ ዓኣሢ ዒንጊ ያሎና ባሺሲ ሳንዳ?» ጌይ ያኦሲ ያኦጮኔ።

ያኦሲ ማሃዎ፡- «ሂዮ፤ ዔያቶ ያሌ! ታኣኒ ኔኤም ዓኣሢ ዒንጊም ኔ ዔያቶ ባሻንዳኔ» ጌዔኔ።

¹¹ ይያሮ ዳውቴ ባዓልፔራዲሜ ጌይንታ ቤዛ ፒሊሰጻኤሜ ዓሶ ያሊ ባሺሰካፓ፡- «ሞርኮኮ ያሎ ዓሶ ዲጲጉዲ ዳርዚ ታ ዓኣዳንዳጉዲ ያኦሲ ታና ማኣዳኔ» ጌዔኔ፤ ዩካፓ ዬኖ ቤዜሎኮ ሱንፃ «ባዓልፔራዲሜ» ጌይንቱኔ፤¹² ዲማና ፒሊሰጻኤሜ ዓሳ ጳዠ ጳሽካዎ ፔኤኮ ካኣሽኮ፡ ማሌ ያኦዞ ከኤሪ ዴንዳዛ ዳውቴ ይያ ማሌ ያኦዞ ጉቤ ዒዛኮ ያሎ ዓሳ ታሚና ሚቻንዳጉዲ ዓይሢኔ።

¹³ ዩካፓ ፒሊሰጻኤሜ ዓሳ ኔጉዋዎ ጊንሣ ማዒ ዬኖ ዶኦጮሎ ያሊሢ ዓርቁኔ፤¹⁴ ዳውቴያ ሃሣ ያኦሲ ዋዚ ጋዓቴ ያኦጮዛ፤ ያኦሲ ማሃዎ፡- «ዔያቶኮ ጊንዎ ዛሎና ሺሪ ሻኣሶ ኮሪና ሙኪ ያሊ፤ ሃይና ሌካ ፒዜ ከሰከ ያሊ፤¹⁵ ታ ኔኤኮ ቤርታ ቤርታ ዓኣዲ ፒሊሰጻኤሜ ዓሶኮ ያሎ ዓሶ ያሊ ባሻንዳሢ ሻኣሶ ቶኦኮይዳ ያልዚ ዓሲ ካኣኒ ማላ ዑኡሲ ዋይዘዎ ያዎሌ!» ጌዔኔ።¹⁶ ያኦሲ ዒዛ ዓይሢሢጉዲ ዳውቴ ማዲ ፒሊሰጻኤሜ ዓሶ ጌባዮኔይዳፓ ዴንዲ ጌዜሪ ሄላንዳኣና ያሊ ባሺ ዳውሴኔ፤¹⁷ ይያሮ ዳውቴ ማዲ ባካ ቢያ ቤዛ ዋይዚንቴኔ፤ ናንጊና ናንጋ ጎዳ ማሌ ዴራ ቢያ ዳውቴ ዒጊጫንዳጉዲ ዴሮይዳ ዒጊቹሞ ጌልዜኔ።

15

ያኦሲኮ ጫኣቁሞ ሳኣዲኖ ዬሩሳላሚ ዔካኒ ጊኢጎናሢ

¹ ዳውቴ ናንጋንዳ ማኣሪ ፔ ካታሞ፡ ዬሩሳላሚይዳ ማኮፎኔ፤ ሃሣ ያኦሲኮ ጫኣቁሞ ሳኣዲኖ ጌሦንዶ ቤሲያ ጊኢጊሺ ዓፒሎና ማኮ ማኣሮዋ ዶቁኔ፤² ዩካፓ ዳውቴ ናንጊና ናንጋ ጎዳ ናንጊና ዒዛም ማዲንዳጉዲ፡ ጊንሣ ሃሣ ጫኣቁሞ ሳኣዲኖ ከዴንዳጉዲ ዶኦሪሢ ዔያቶ ማዔሢሮ፡- «ጫኣቁሞ ሳኣዲኖ ከዳኒ ኮይሳሢ ሌዊ ዓሶም ሌሊከ» ጌዔኔ።³ ይያሮ ዳውቴ ያኦሲኮ ጫኣቁሞ ሳኣዲኖ ጊኢጊሽና ቤዞ ዔከ ዓኣዳኒ ዒሰራዔኤሌ ዴሮ ቢያ ዬሩሳላሚይዳ ቡኩሴኔ፤⁴ ሄሊሳዎ ዓኣሮኔ ዜርዎና ሌዊ ዓሶና ቡኩሴኔ፤⁵ ዲማና ሌዊ ዓሢ ቁዓቴ ቶኦካፓ ዑሪዔኤሌ ጎዎሢ ዒዛኮ ዒጊኒ ማዔያ ፔቴ ጻኤታና ላማታሚ ዓሲኮ ሱኡጌ ማዒ ሙከኔ።⁶ ማራሪ ቶኦካፓ ዓሳያ ጎዎሢ

15:2 15:2 ላሚ. ዋማ 10:8።

ዲዛኮ ዲጊኖ ማዕያ ላምዎ ጭታና ላምዎሚ ዓሲኮ ሱኡጌ ማዕ
 ሙኩኔ። 7 ጌርሾኔ ቶኦካገገ ዲዩዌኤሌ ጎሮሚ ዲዛኮ ዲጊኖ ማዕያ
 ፔቴ ጭታና ሃይሚታሚና ዓሲኮ ሱኡጌ ማዕ ሙኩኔ፤ 8 ዔሊፃገጌ
 ቶኦካገገ ሾማዒያ ጎሮሚ ዲዛኮ ዲጊኖ ማዕያ ላምዎ ጭታ ዓሲኮ
 ሱኡጌ ማዕ ሙኩኔ፤ 9 ኬብሮኦኔ ቶኦካገገ ዔሊዌኤሌ ጎሮሚ ዲዛኮ
 ዲጊኖ ማዕያ ሳሊታሚ ዓሲኮ ሱኡጌ ማዕ ሙኩኔ፤ 10 ዑዚዌኤሌ
 ቶኦካገገ ዓምናኣዳኣቤ ጎሮሚ ዲዛኮ ዲጊኖ ማዕያ ፔቴ ጭታና ታጾ
 ላምዎ ዓሲኮ ሱኡጌ ማዕ ሙኩኔ።

11 ዩካገ ደውቴ ቁኤሶ፣ ሳዶቁንታ ዓቢያታሬንታ፤ ዩያጉዲ
 ሃሃ ዑሪዌኤሌ፣ ዓሳያ፣ ዮዌኤሌ፣ ሾማዒያ፣ ዔሊዌኤሌና
 ዓምናኣዳኣቤና ዋሊ ዑፃ ላሆ ሌዊ ዓሲ ዌኤላዎ፡- 12 ዔያቶም
 ሂዚ ጌዌኔ፤ «ዒንሢ ሌዊ ዓሶ ቶኦኮኮ ሱኡከኔ፤ ዩያሮ ናንጊና ናንጋ
 ጎዳ ማዕ ዲሰራዌኤሌ ያኦዛሢኮ ጫኣቁም ሳኣዲና ታ ገኢጊሾ ቤዛ
 ኬዲ ዔኪ ሙካኒ ዒንሢንታ ዒንሢኮ ዲጊኖ ማዕ ሌዊ ዓሶንታ
 ቢያ ያኦሲም ዲማሱዋቴ፤ 13 ሃያኮ ቤርታ ዒንሢ ሙኪ ያኦሲኮ
 ጫኣቁም ሳኣዲና ኬዲባኣሢሮ፣ ሃሃ ጌይንቴ ደምቦ ጎይዎ ኑ ዓዛም
 ማዲባኣሢሮ ናንጊና ናንጋ ጎዳ ማዕ ኑ ያኦዛሢ ደጋዲ ሜቶ ኑ ጊዳ
 ዓገኔ» ጌዌኔ።

14 ዩያሮ ቁኤሶንታ ሌዊ ዓሶንታ ናንጊና ናንጋ ጎዳ ማዕ
 ዲሰራዌኤሌ ያኦዛሢኮ ጫኣቁም ሳኣዲና ኬዲ ዔካኒ ፔና ያኦሲም
 ዲማሴኔ፤ 15 ናንጊና ናንጋ ጎዳ ሙሴ ዛሎና ዒንጌ ዓይሢያጉዲ
 ሌዊ ዓሳ ያኦሲኮ ጫኣቁም ሳኣዲና ፔኤኮ ጌኤታ ዛጳሢ ሚያና ኬዲ
 ዴንዴኔ።

16 ደውቴ ዒማና፡- «ሚርጌ ሻዠ ዴንሢ ዋርቆ ጎኦኦንታ ፔቴ
 ሻሻና ዋርቁንታ ጎኦኦንታ ዑኡቱቡሎዋ ዔኪ ያኦሲ ቦንቾም
 ማዓ ዓይኑም ዓይናዳንዳጉዲ ዒንሢኮ ዲጊኖ ማዕ ሌዊ ዓሶገ
 ደኦሩዋቴ» ጌዲ ሌዊ ዓሶ ሱኡጎም ኬኤዜኔ፤ 17-21 ያኦሲ ቦንቾም
 ዓይኑም ዓይናዳ ዓሶ ቶኦካገገ ዑኡቱቡላሢ ዋቻንዳጉዲ ዒዮዌኤሌ
 ናኣዚ ሂማኔ፣ ዲዛኮ ዲጊኒ ማዕ ቤራኪያ ናኣዚ ዓሳኣፔ፤ ዩያጉዲ
 ሃሃ ሜራሪ ቶኦካገገ ቁሳያ ናኣዚ፣ ዌታኔ ደኦሪንቴኔ፤ ዑኡዞ ዴጊዲ
 ዋርቁንታ ሚርጌ ሻዠና ዴንሢንታ ጎኦኦ ዋርቁ ዔያቶ ማኣዳያ
 ማዓንዳጉዲ፡- ዛካሪያሴ፣ ያዕዚዌኤሌ፣ ሾሚራሞቴ፣ ዩሂዌኤሌ፣
 ዑኒ፣ ዔሊዓቤ፣ ማዕሴያንታ ቤናያንታ ደኦሪንቴኔ።

ሃሃ ዑኡዞ ሂርኪዲ ዋርቆ ሚርጌ ሻዠና ዴንሢንታ ጎኦኦ
 ዋርቁንዳጉዲ፡- ማቲቶያ፣ ዔሊፔሌ፣ ሚቅኔያ፣ ዓዛዝያንታ፤

15:15 15:15 ኬሲ. ማፃ 25:14።

ዬያጉዲ ጌኤዡ ማኣሮ ካፓ ዓሶ ባኣካፓ ያቤድዔዶኦሚንጎታ ዩዒዒኤሌሌንጎታ ዶኦሪንጎታ።

22 ከናኒያ ጎሆሢ ዓይኑሞሮ ዋርቆ ዓንጋሞ ዋርቂ ዔራያታሢሮ ሌዊ ዓሶ፡ ዓይኑሞ ዓይናዳ ዓሶኮ ሱኡጌ ማዒ ዶኦሪንጎታ፤ 23-24 ሃሣ ቤራኪያ፡ ዔልቃና፡ ያቤድዔዶኦሚንጎታ ዩሂያንጎታ ያኦሲኮ ጫኣቁሞ ሳኣዲኖ ካፓ ዓሶ ማዒ ዶኦሪንጎታ፤ ዒዮሳፒፎ፡ ናትናዔኤሌ፡ ዓማሳዬ፡ ዛካሪያሴ፡ ቤናያ፡ ዔለዔዜሬንጎታ ቄኤሳሢ ሼባኒያንጎታ ያኦሲኮ ጫኣቁሞ ሳኣዲኖኮ ቤርታ ቤርታ ዓኣዲ ማልኮ ዋርቃጎዳጉዲ ዶኦሪንጎታ።

ያኦሲኮ ጫኣቁሞ ሳኣዲኖ ዬሩሳላሚ ዔኪ ዴንዶናሢ (2ሳሙ. 6:12-22)

25 ዬካፓ ካኣቲ ዳውቴንጎታ ዒሰራዔኤሌ ዓሶኮ ሱኡጎንጎታ ያሎ ያላ ዓሶ ዓይሣዞንሢንጎታ ያኦሲኮ ጫኣቁሞ ሳኣዲኖ ያቤድዔዶኦሚ ማኣራፓ ዔካኒ ዋዛና ዴንዴኔ፤ 26 ያኦሲኮ ጫኣቁሞ ሳኣዲኖ ኬዳ ሌዊ ዓሶ ያኦሲ ማኣዳሢሮ ላንካይ ዚያ ጌማይና ላንካይ ማራናይና ሹኪ ዒንጎ ባኣዚ ማሢ ያኦሲሞ ዔያታ ሹኢሹኔ፤ 27 ዳውቴ ዒማና ሚዛጰ ሻኣዡ ዓፒሎና ኮሺንጎታ ዔፑዶ ማይንጎታ፤ ዬያጉዲ ሃሣ ዓይኑሞ ዓይናዳ ዓሳ ቢያ ዔያቶኮ ሱኡጎሢ ከናኒያንጎታ ያኦሲኮ ጫኣቁሞ ሳኣዲኖ ኬዳ ሌዊ ዓሳኣ ሚዛጰ ሻኣዡ ዓፒሎ ማይንጎታ ዓኣኔ። 28 ዬያጉዲ ዒሰራዔኤሌ ዴራ ቢያ ዛዬንጎታ ፖሮዚንጎታ ዋርቂ ዋርቂ፡ ዑኡቱቡሎዋ ዎቺ ዎቺ ፔቴ ሻዡና ዋርቆ ጎኡሎንጎታ ዲቦ ሻዡ ዴንሢ ዋርቆ ጎኡሎዋ ዋርቂ ዋርቂ ናንጊና ናንጎ ጎዳኮ ጫኣቁሞ ሳኣዲኖ ሶራይቴ ዒላሺሢና ዔኪ ዬሩሳላሚ ሙኬኔ።

29 ዒማና ዓሳ ጫኣቁሞ ሳኣዲኖ ዳውቴ ካታሞ ዔኪ ጌሊያይዳ ዓኣንጎታ ሳኣዶኦሌኮ ናኣ፡ ማልኮኦላ ካኣቲ ዳውቴ ዒናፓ ባይዲ ባይዲ ጰላሢ ኬኤዮኮ ፑልቶ ካሮና ዛጋዖ ዒዛ ፓሴኔ።

16

1 ዔያታ ዒማና ጫኣቁሞ ሳኣዲኖ ዳውቴ ጊኢጊሹ፡ ዓፒሎና ማዡንጎታ ማኣራ ጌሣኔ፤ ዬካፓ ሚቺ ዒንጎ ዒንጊያንጎታ ፔቱሞና ዒንጎ ዒንጊያዎ ዔያታ ያኦሲሞ ሹኢሹኔ፤ 2 ዳውቴ ዬያ ባኮ ዒንጌሰካፓ ናንጊና ናንጎ ጎዳ ሱንዮና ዴሮ ዓንጃኔ፤ 3 ዬካፓ ዒሰራዔኤሌ ዓሶኮ ዓቲንቆንጎታ ላኣኡንጎታሞ፡ ፔቴ ፔቴ ዓሶሞ ቢያ ፔቴ ፔቴ ሙሊሢ ላኣዳ ቲቁሢ ዓሸከንጎታ ዎይኔ ዲንቆናያይዳፓኣ ዳካ ዒንጎኔ።

4 ያኦሲኮ ጫኣቁሞ ሳኣዲኖኮ ቤርታ ማዒ ማዳንዳጉዲና ናንጊና ናንጎ ጎዳ ማዔ ዒሰራዔኤሌ ያኦዛሢሞ ጋላታንጎታ ሄርሺሢንጎታ

ቦንቾዋ ዒንጊ ዒንጊ ያከዛሢ ካእሽኮ ካእዠ ዳምቦ ማዲሻንዳጉዲ ሌዊ ዓሶይዳፓ ዳውቴ ደኦሬኔ። 5 ዒማና ዓሳኣፔ ሱኡጋሢኬ፤ ዛካሪያሴ ዒዛኮ ዴማ ማኣዲ ማዲሢ ማዒ ደኦሪንቴኔ፤ ዩካፓ ዩዒዒኤሌ፤ ሽሚራሞቴ፤ ዩሂዒኤሌ፤ ማቴትያ፤ ዒሊዒቤ፤ ቤናያ፤ ያቤድዒ ደኦሚንጎ ዩዒዒኤሌንጎ ጎኦሎ ዋርቃንዳጉዲ፤ ዓሳኣፔ ሃሃ ዑኡቴቡላሢ ዋቻንዳጉዲ ጌይንቴኔ፤ 6 ቤናያና ያሃዚዒኤሌና ጌይንጎ ላምዖ ቄኤሶንሢ ጫኣቁሞ ሳኣፂኖኮ ቢያ ዎዴ ቤርቶ ዛሎና ዛዬ ዋርቃንዳጉዲ ጌይንቴኔ፤ 7 ዓሳኣፔንጎ ሃንጎ ዒዛኮ ዒጊና ሌዊ ዓሶንጎ ናንጊና ናንጎ ጎዳም ማዒ ጋላጎ ዓይኑሞ ሺኢሻንዳጉዲ ዳውቴ ሱኡጌ ማሂ ዒያቶ ደኦሬሢ ዒማናኬ።

ዳውቴኮ ያሱሲ ጋላቶ ዓይኑሞ
(ዓይኑ. 105:1-15፤ 96:1-13፤ 106:1፤47-48)

- 8 ናንጊና ናንጎ ጎዳ ጋላቱዋቴ፤
ዒዛ ሱንዖ ዒኤሊ ሺኢቁዋቴ፤
ዒ ማዴ ባኮ ዴሮ ቢያሢም ኬኤዙዋቴ።
- 9 ናንጊና ናንጎ ጎዳም ጋላጎ ዓይኑሞ ዓይናዲዋቴ፤
ዒ ማዴ ዲቃሢ ሄርሺሳ ማዴ ቢያ ኬኤዙዋቴ፤
- 10 ዒዛኮ ዲማዴ ሱንዖና ዎዛዲዋቴ!
ናንጊና ናንጎ ጎዳ ኮዓዞንሢ ቢያ ዎዛዲንጎ!
- 11 ዒዛኮ ማኣዳሢ ዴንቃኒ
ናንጊና ናንጎ ጎዳ ኮዑዋቴ፤
ቢያ ዎዴ ዒዛም ዚጊ ካእሽኮዋቴ፤
- 12-13 ዒዛም ማዴያ ማዒ፤ ዒሰራዒኤሌ ናኣቶንሢዮ!
ያኡሲ ደኦሬያ ማዒ ያይቆኦቤ ናኣቶንሢ!
ያኡሲ ማዴ ዲቃሢ ሄርሺሳ ባኮ
ዒዚ ዎጌ ዎጊያንጎ
ዒ ፔ ዎልቆና ማዴ ማዴ ጳቂሡዋቴ።
- 14 ናንጊና ናንጎ ጎዳ ኦኡኮ ያከዛሢኬ፤
ዒዚ ዓጮ ቢያይዳ ፒዜ ዎጌ ዎጋኔ።
- 15 ዒዛኮ ጫኣቁሞ ዋሊፖቴ፤
ዒ ዓይሢ ባኮ ዴንዲ ሺያ ሸይንጎ ሄላንዳኣና
ያኡሲ ኬኤዜ ሃጊ ማዒንዳ ዎዞ ቃኣሎ ናንጊና ደዲሺ ካፓኔ።
- 16 ዒ ዒብራሃማና ዎላ ጫኣቁ ጫኣቁሞ ካፓኔ፤
ዩሳኣቁም ኬኤዜ ሃጊ ማዒንዳ ዎዞ ቃኣሎዎ ደዲሻኔ፤
- 17 ያይቆኦቤም ዳምቤ ማሂ ደዲሹኔ፤

ዒሰራዔኤሌማኣ ጋፒንሢባኣ ጩኣቁሞ ጩኣቄኔ።

18 ዩይ ጩኣቁማ፡-

«ካኣናኔ ዓጮ ታ ኔኤሞ ዒንጋንዳኔ፤
ኔኤሞ ዒንጊንቴ ቤሲ ማዓንዳኔ» ጋዓያኬ።

19 ያዲ ጌይንቴሢ ያኦሲኮ ዓሳ ፓይዶና ዳካ ዓኣንቴ
ካኣናኔ ዓጮይዳ ዔያታ ሸኦቹ ማዒ ዓኣንቴኬ።

20 ፔቴ ዴሮ ኮራፓ ሜሌ ዴሮ ባንሢ
ፔቴ ዓጮይዳፓ ሜሌ ዓጪ ባንሢ
ሃንቴ ሃንቴ ዔያታ ማታዳኔ።

21 ያኦሲ ጋዓንቴ ያኦኒያ ዔያቶ ሄርቂ ዋይሦሞ ጌይባኣሴ፤
ዔያቶሮ ጌይ ካኣቶ ጎሬኔ።

22 «ታ ዶኦሚ ቲሽኬዘንሢ ካኣሚፖቴ፤
ታ ማሊያ ኬኤዛዘንሢ ዮርታ ማዲፖቴ» ጌይ ዔያቶሞ
ላቴኔ።

23 ሳያይዳ ናንጋ ዴራ ቢያ ናንጊና ናንጋ ጎዳ ጋላቱዋቴ!
ዓውሲያ ዒዛኮ ኬላ ኬላ ኬኤዙዋቴ፤

24 ካኣቶሞ ቢያ ዒዛኮ ቦንቾ ዔርዙዋቴ፤
ሜሌ ዴሮሞ ቢያ ዒዛኮ ዴኤፖ ማዲ ኬኤዙዋቴ።

25 ናንጊና ናንጋ ጎዳ ዴኤፒኬ፤
ፑኡፒ ጋላታ ዒዛሞ ኮይሳኔ፤
ሜሌ ካኣሽኮ ያኦዛፓ ቢያ ባሼ ዒጊጪንታንዳያ ኮይሳኔ፤

26 ሃንጎ ዴራ ዘጊ ካኣሽካሢ ሜሌ ያኦዘኬ፤
ናንጊና ናንጋ ጎዳ ጋዓንቴ ጩሪንጮ ማዜ ያኦሲኬ።

27 ዒዛኮ ኮይሎይዳ ዓኣ ባካ ቦንቾና ዴኤፑሞናኬ፤
ዒዛሞ ዲማዴ ማኣሮዋ ዋልቄና፤ ሃሣ ዋዛና ዒ ኩንሣኔ።

28 ዒንሢ ሳያይዳ ናንጋ ዴራ ቢያ!
ዒዛኮ ቦንቾንታ ዋልቆንታሮ ናንጊና ናንጋ ጎዳ ጋላቱዋቴ።

29 ዒዛ ሱንያሞ ኮይሳ ቦንቾ ሸኢሹዋቴ፤
ዒዛኮ ጌኤዮ ማኣሮ ዒንጎ ባኣዚ ዔኪ ዩዑዋቴ፤
ዲማዴያ ማዔ ያኦዛሢ ፔጋዲ ጴዳኣና ዒዛሞ ዘጊ
ካኣሽኩዋቴ።

30 ሳያ ዴራ ቢያ ዒዛ ቤርታ ጎይቁዋቴ!

16:18 16:18 ማዢ. ማፃ 18:13። 16:22 16:22 ማዢ. ማፃ 20:3-7።

- ሳዓ ደዲሺ ማዢንቴሢሮ ዓገጃንዲዋሴ።
- 31 ሳዖንታ ጫሪንጮንታ ዋዛዲዋቴ!
 ማሌ ዴሮዎ ቢያ ናንገና ናንጋ ጎዳ ካኣቲታሢ ዔርዘዋቴ።
- 32 ባዘንታ ዒኢካ ዓኣ ባካ ቢያ ዒላሹዋቴ!
 ጎዡንታ ዬያይዳ ዓኣ ባካ ቢያ ዋዛዲዋቴ!
- 33 ናንገና ናንጋ ጎዳ ሳዖይዳ ዋጋኒ ሙካንዳሢሮ
 ዴኤሎይዳ ዓኣ ሚፃ ዒዛሞ ዒላሾንጎ!
- 34 ዒዚ ኮሺታሢሮ ናሹማ ዒዛኮ ናንገና ባይቁዋኣሢሮ
 ናንገና ናንጋ ጎዳ ጋላቱዋቴ!
- 35 ናንገና ናንጋ ጎዳ፡-
 «ኑና ዓውሳ ዖኣዛሢዮ!
 ማሌ ዴሮ ባኣካፓ ማሢ ዔኪ ኑ ዓጮ ኑና ጌልዜ፤
 ያኣዴ ማዔም ኑና ኑ ጋላታንዳጉዲ፤
 ኔኤኮ ዲማዴ ሱንፆ ኑ ቦንቻንዳጉዲ
 ሃዳራ ኑና ዓውሴ!» ጎዑዋቴ።
- 36 ናንገና ናንጋ ጎዳ ማዔ ዒሰራዔኤሌ ዖኣዛሢ
 ናንገና ጋላቲንቴያ ማዖም!
 ዴራ ዒማና «ዓኣማን» ጌዔኔ፤ ናንገና ናንጋ ጎዳኣ ጋላቲኔ።

ዩሩሳላሜና ጌባዖኦኔይዳ ካኣሽኪንቴ ካኣዢ

37 ካኣቲ፡ ዳውቴ ዓሳኣፔና ዒዛኮ ዒገሮ ማዔ ለዊ ዓሶ ናንገና ናንጋ ጎዳኮ ጫኣቁሞ ሳኣዲና ዓኣ ቤዛ ካኣሽኪንታ ካኣዢ ዳምቦ ኩንሢሲ ኩንሢሲ ናንጋንዳጉዲ ሱኡጌ ማሢ ጌሣኔ፤ ዬያሮ ዔያታ ዬያ ማዶ ቢያ ኬሊ ማዳኔ፤ 38 ዔያቶ ማኣዳንዳጉዲ ዪዲቱ ናኣዚ ዖቤድዔደኣማና ዒዛ ቶኦኪ ማዔያ ማሌ ላሂታሚ ሳሊ ዓሲያ ዓይሢንቴኔ፤ ዒማና ዪዲቱ ናኣዚ፤ ዖቤድዔደኣማና ሆላና ጌሎ ካሮ ካፒሳ ሱኡጎ ማዔኔ።

39 ቁኤሳሢ፡ ሳዶቁና ዒዛ ዒገሮ ማዔ ማሌ ቁኤሳ ጌባዖኦኔይዳ ዓኣ፤ ዓፒሎና ማዢንቴ ዖኣሲ ካኣሽኪንታ ማኣሮይዳ ካኣዢ ካኣሽኪሳ ሱኡጌ ማሢ ዳውቴ ዔያቶ ደኦሬኔ። 40 ዬያ ዒ ማዴሢ ናንገና ናንጋ ጎዳ ዒሰራዔኤሌ ዓሶም ዓይሢ ዋጎ ጎይፆና ቢያ ኬሊ ጉቴና ዋንቴና ሚቺ ዒንጎ ዒንገፆ ሚቺ ዖኣሲም ሺኢሻንዳጉዲኬ። 41 ዒኢካ ዔያቶና ዋላ ሄማኔንታ ዪዲቱንታ፤ ዬያጉዲ ሃሣ ዖኣሲኮ ናንገና ናንጋ ናሹሞ ማሊ ማሊ ቢያ ኬሊ ጋላታ ዓይኦሞ

16:34 16:34 2ያሴሲ. ዓሃኬ 5:13፤ 7:3፤ ዒዢ. 3:11፤ ዓይኑ. 100:5፤ 106:1፤ 107:1፤ 118:1፤ 136:1፤ ዓር. 33:11።

ዓይናዳንዳጉዲ ደኦሪንቴ ማሌ ዓሲያ ዓኣኔ፤ 42 ሄማኔና ዪዲቱና ሹሉንጋ፡ ዑኡቱቡላሢ፤ ዪያጉዲ ጋላቶ ዓይኑም ዓይናዳዋኣና ዋርቆ ዓንጋም ሱኡጌ ማዒ ዓርቃያ ማዕኔ፤ ዪዲቱ ቶኦኪ ማዕ ዓሳ ጌሎ ካሮ ካፓ ዓሶኮ ሱኡጌ ማዕኔ።

43 ዪካፓ ዓሳ ቢያ ፔ ማኣሪ ማኣሪ ዴንዴኔ፤ ዳውቲያ ፔ ማኣሮ ዓሶ ዓንጃኒ ፔ ማኣሪ ዴንዴኔ።

17

ናኣታኣኔ ዳውቲም ኬኤዜ ባኮ

(2ሳሙ. 7:1-17)

1 ካኣቲ ዳውቲ ካኣቲም ማኣሮይዳ ዓኣዎ ፔቲ ኬሊ ያኦሲ ማሊያ ኬኤዛ፡ ናኣታኣኔ ዔኤሊሲ፡- «ታኣኒ ሃሢ ዚቢቂና ማኸና ማኣሪዳ ናንጋኔ፤ ናንጊና ናንጋ ጎዳኮ ጫኣቁም ሳኣፂና ጋዓንቴ ዓፒሎና ማኸንቴ ማኣሮይዳ ጌሢንቴንቴም!» ጌዔኔ።

2 ዪያሮ ናኣታኣኔ፡- «ያኦሲ ኔኤና ዋላታሢሮ ኔ ዒኖና ኔኤኒ ማሌ ባኮ ቢያ ማማዴ» ጌዔኔ።

3 ጋዓንቴ ዪኖ ዋንቴሎ ያኦሲ ናኣታኣኔም፡- 4 «ታ ዓይላሢ፡ ዳውቲ ኮይላ ዓኣዲጋፓ ሂዚ ጌዔ፤ ታኣኒ ናንጋንዳ ጌኤዦ ማኣሮ ታኣም ማኸንዳሢ ኔናቱዋሴ፤ 5 ዒሰራዔኤሌ ዴሮ ጊብፂ ዓጮ ዓይላታፓ ታኣኒ ኬሴሰካፓ ሃኖ ሄላንዳኣና ታኣኒ ማኣሪዳ ናንጊ ቤቂባኣሴ፤ ቢያ ዋዴ ታኣኒ ዓፒላና ማኸና ማኣሪዳ ማዒ ፔቲ ቤዛፓ ማሌ ቤሲ ሃንቲ ሃንቲ ናንጌኔ፤ 6 ዒሰራዔኤሌ ዴሮና ታ ሃንቴ ዋዴ ቢያይዳ ታኣኒ ደኦሬ፡ ሱኡጎ ባኣካፓ ፔቲ ዓሲታዎ ዚቢቂና ጌኤሺ ማኣሪ ታኣም ማኸም ጌዒ ታ ዓይሢባኣሴ»

7 «ዪያሮ ሃሢ ታኣኒ፡ ቢያ ባኮ ዋይሃ ጎዳ ታ ዓይላሢ ዳውቲም ጋዓ ባኮ ሂዚ ጌዒ ኬኤዜ፡- «ኔኤኒ ማራይ ሄንቃንቴ ታ ኔና ዔኪ ታ ዴሮ ዒሰራዔኤሌኮ ሱኡጌ ማሃ ጌሢኔ፤ 8 ኔ ዓኣፂ ቤዞ ቢያይዳ ታ ኔኤና ዋላ ዓኣያ ማዕኔ፤ ኔኤኮ ቤርታፓ ሞርኮ ቢያ ታኣኒ ኔኤም ያሊ ባሼኔ፤ ሃሢያ ዓጮይዳ ዓኣ ፎኤፖ ፎኤፖ ካኣታፓ ቢያ ባሼ ዔርቲ ካኣቲ ታ ኔና ማሃንዳኔ። 9-10 ታ ዴሮ፡ ዒሰራዔኤሌም ዔያታ ናንጋንዳ ቤሲ ታ ዒንጋንዳኔ፤ ዒኣካ ዔያታ ጌላዎ ኮሺ ናንጋንዳጉዲ ታ ማሃንዳኔ፤ ፑርቶ ማዳ ዓሳ ቤርታኣሲጉዲ ማይ ዔያቶ ፔቲታዎ ሜታሳባከ፤ ሃያኮ ቤርታ ታ ዔያቶ ዑፃ ሱኡጌ ደኦሬ ዋዶና ዔያታ ሚታፎ ሜቶጉዴያ ላምዓንሠ ዔያቶ ሄላዓከ፤ ኔ ሞርካ ቢያ ኔኤም ዋርቃንዳጉዲ ታ ማሃንዳኔ። 11 ኔኤኒ ናንጊ ጋርቺ ኔኤኮ ቤርታኣ ዓዶንሢጉዲ ሃይቃዛ፡ ኔ ናኣቶ ባኣካፓ ፔቲ ታኣኒ ካኣታሃንዳኔ፤ ዒዛኮ ካኣቲም

16:43 16:43 2ሳሙ. 6:19-20።

ታኦኒ ደዲሻንዳኔ። 12 ጌኤዠ ማእሮ ታኦም ማዠንዳሢ ሲዛኩ፤ ሲዛኩ ካኦቱማኦ ርንገሩ ደዲ ዴዓንዳጉዲ ታ ማሃንዳኔ፤ 13 ታ ሲዛኩ ዓደ ማዓንዳኔ፤ ሲዚ ታኦኩ ርዖ ማዓንዳኔ፤ ኔኤኒ ሳኦዖኦሌ ቤዛ ካኦታዳንጉዲ ካኦቱማፓ ታኦኒ ሳኦዖኦሌ ኬይሳዖ ሲዛይዳ ማዴ ጎይዖ ታኦኩ ማእሪዖ ኔ ርኦዚፓ ሺኦሺ፤ ታ ሲዛ ሃሻዓኩ። 14 ታ ዴሮሩ ታ ካኦቱሞሩይዳ ርንገሩ ታ ሲዛ ደኦራንዳኔ፤ ሲዛ ካኦቱማ ፓፑዋ ካኦታቶ ማዓንዳኔ » ጌዔኔ።

15 ያሱሲ ሲዛም ፔጋሲ ዳዌ ባኮ ቢያ ዬያይዲ ርኦታኦኔ ዳውቴም ኬኤዜኔ።

ዳውቴ ርንገሩ ርንገ ጎዳ ጋላቲ ሺኦቄ ሺኦጲዖ
(2ሳሙ. 7:18-29)

16 ዬካፓ ካኦቲ፥ ዳውቴ ዓፒሎሩ ማዠንገጌቲ ርንገሩ ርንገ ጎዳ ዴሮሩ ካኦማ ማእሮ ዴንዴኔ፤ ሲኦካ ሲ ዴዓዖ፡- «ርንገሩ ርንገ ጎዳ ማዔ ያኦዛሢዮ! ታኦኒ ሃያ ቢያ ኔ ታኦም ማዳኒ ኮይሳ ዓሲቱዋሴ፤ ታ ማእሮ ዓሳ ዓይጎ ዓሲዳይ? 17 ርንገሩ ርንገ ጎዳ ማዔ ያኦዛሢዮ! ኔ ታኦም ሃሢ ዑሣ ዓኦዴ ባኦዚ ማዲ ማዲኬ፤ ሙካ ዋደይዳ ኬሰካንዳ ታ ዜርዖም ቢያ ማዓንዳ ዋዛ ቃኦላ ታኦም ኔ ኬኤዜኔ፤ ሃሣ ታሩ ኔ ዴኤፒ ዓሲ ማሃኔ። 18 ዓካሪ ታ ኔኤም ሃያፓ ዑሣ ዓይጎ ባኦዚ ኬኤዛኒ ዳንዳዓይ? ኔኤኒ ታሩ ዔዔራኔ፤ ያዲ ማዔቴያ ኔ ታሩ ቦንቺሴኔ፤ 19 ዬያ ኔ ታኦም ማዳኒ፤ ሃሣ ሃካፓ ሴካ ኔኤኒ ታሩ ዴኤፒ ዓሲ ማሃንዳሢ ዔርዛኒ ኔኤኮ ኮሺ ማላሢ ማዔኔ፤ 20 ርንገሩ ርንገ ጎዳሢዮ! ኔጉዴይ ያኦኒያ ፔቴታዖ ባኦሴ፤ ኦ ዋይዜ ጎይዖሩ ኔገዳፓ ዓቴም ሜሌ ያኦሲ ባኦሴ። 21 ኔ ዓሲ ኔ ዔያቶ ማሃኒ ዓይሉማፓ ኔ ዔያቶ ኬሴ፤ ሲሰራዔኤሌ ዴሮጉዴ ዴሪ ፔቴታዖ ባኦሴ፤ ኔኤኮ ዴር ገላብጸፓ ኬሳኒ ኔ ዔያቶ ዓውሲ፤ ሃሣ ዴኤፒ ዴኤፒ ማዴ ማዴሢሮ ኔኤኮ ሱንፃ ዓጮ ቢያይዳ ዋይዚገጌቴ። 22 ሲሰራዔኤሌ ዴር ርንገሩ ኔ ዴሪ ኔ ማሃኔ፤ ርንገሩ ርንገ ጎዳሢዮ! ኔኤኒ ዔያቶኮ ያኦዛሢ ማዔኔ።»

23 «ሃሢያ ርንገሩ ርንገ ጎዳ ማዔ ያኦዛሢዮ! ታርንታ ታ ዜርዖንታም ኔ ኬኤዜ ዋዛ ቃኦሎ ቢያ ማዲ ኩንሢ፤ ታ ማዳንዳኔ ኔኤኒ ጌዔ ባኮ ቢያ ማዴ፤ 24 ዬያ ኔ ማዳንዳሢ ሱንፃ ኔኤኮ ደዲ ርንገንዳጉዲሩ ርንገሩ ዴኤፒ ማዲ ርንገንዳጉዲኬ፤ ዬካፓ ዴራ፡- ቢያ ባኮ ማዜ ጎዳሢ ሲሰራዔኤሌ ዓሰኮ ያኦሲኬ! ጋዓንዳኔ፤ ኔ ዓይላሢ ዳውቴኮ ካኦቱማኦ ኔ ቤርታ ደዲ ርንገያ ማዓንዳኔ።»

17:13 17:13 2ቆሮ. 6:18፤ ዓ.ብ. 1:5።

25 «ታ ያካሂዳለህ! ነ ዓይላህ፣ ታክም ነኤኒ ሃያ ቢያ ገጋሴህረና ዘርዎ ታኣኮ ነ ካኣታህኒ ከኤዘህረ ታኣኒ ነና ጫርቂ ሺኢቃኒ ዳንዳዔ። 26 ናንገና ናንጋ ጎዳሂህ! ነኤኒ ጎኔ ያኦሲከ፤ ሃያ ዲቃሂ ሄርሺሳ ዎዞ ቃኣሎ ነ ታክም ጉሙርሲ ከኤዘኔ፤ 27 ቢያ ዎዶ ነ ቤርታ ዓኣያ ማዒ ናንጋንዳጉዲ፣ ነ ዓይላህ ማኣር ነ ዓንጃንዳጉዲ ታ ሺኢቃኔ፤ ናንገና ናንጋ ጎዳሂህ! ነኤኒ ነ ዳር ዓንጃህረ ዔያታ ናንገና ዓንጃንቲያ ማዓንዳ።» ጌዔ።

18

ዳውቲ ያሎና ባሼ ባሺዎ

(2ኛው፡ 8:1-18)

1 ዩካፓ ዳካ ጋዓዖ ካኣቲ፣ ዳውቲ ላሚ ሃሃ ፒሊሰጻኤሜ ዓሶ ያሊ ባሼኔ፤ ዔያቶ ዒ ጊኢሪሼኔ፤ ሃሃ ጋኣቲ ካታሞና ኮይሎይዳ ዓኣ ጉርዶ ፔ ዳማ ማሂ ዔከኔ፤ 2 ዩያጉዲ ሞዓኣቤ ዓሶዎ ያሊ ባሺ ፔኤም ጊኢሪሼኔ።

3 ጊንሣ ሃሃ ካኣቲ፣ ዳውቲ ሶኦሪያ ዓጮይዳ ዓኣ ሃማቲ ዓጮ ኮይላ ናንጋ ያባ ካኣቲ ሃዲድዔዘሬ ያሌኔ፤ ዒዚ ዩያይዳሂ ሃዲድዔዘሬ ከዶ ዛሎና ዓፕራዲሴ ዎር ኮይሎ ዓጮ ዔካኒ ያሊሂርከ፤ 4 ዳውቲ ዒማና ሃዲድዔዘሬፓ ፔቲ ሺያ ሳርጌላ ያይታ፣ ለንካይ ሺያ ፓርና ላማታሚ ሺያ ቶኪና ሃንቲ ያላ ያልዚ ዓሲ ዲዒ ዔከኔ፤ ዒዚ፡- ፔቲ ጻኤታ ሳርጌላ ያይታ ጎቻንዳ ፓር ፔኤም ዓይሳዖ ሃንጎ ፓራሂኮ ቃዎንሂ ቲቄ።

5 ዳማሰቆይዳ ዓኣ ሶኦሪያ ዓሳ ያባ ካኣቲ፣ ሃዲድዔዘሬ ማኣዳኒ ያልዚ ዓሲ ዳከም ዳውቲ ዔያቶዎ ያሊ ላማታሚ ላምዖ ሺያ ያልዚ ዓሲ ዎዶ፤ 6 ዩካፓ ዒዚ ዔያቶኮ ዓጮይዳ ያሎ ዓሳ ዲንኪ ዳዓንዳ ቤሲ ጊኢሪሼኔ፤ ዳራኣ ዒዛም ጊኢራ ጨጊ ዓይሂንቲ ዎርቄ፤ ናንገና ናንጋ ጎዳ ቢያ ቤዘይዳ ዳውቲ ያሎና ባሻንዳጉዲ ማሄ፤ 7 ዳውቲ ሃዲድዔዘሬኮ ደንዞ ማዔ ቢታንታ ዓኣ ዓሳ ዔኪ ዓኣ ዎርቆና ኮሺንቲ ጊቲሞ ቢያ ዲዒ ዔኪ ዩሩሳላሚ ዓኣዳ፤ 8 ዩያጉዲ ሃሃ ሃዲድዔዘሬ ዓጮ ዓኣ፣ ፀቢሃቲንታ ኩኔ ካታሞናይዳፓ ሚርጌ ዲቢ ሞኦና ዓንጊ ዔከኔ፤ ሴሎሞኔ ጊንፃፓ ዩያ ሞኦና ዓንጎና ጌኤኮ ማኣርይዳ ዓኣ ዳኤፓ ደኦላሂንታ ቱርቱር ማሂ ዔቁሶሂንታ ዲማ ዲማ ሞኦና ዓንጎና ኮሺንታ ሜሆ ማዢሴ።

18:8 1ካኣቶ. ማ 7:40-47፤ 2ያሕሲ. ዓሃኬ 4:11-18።

9 ደውቲ ያባ ካኣቲ፡ ሃዳድ-ዔዜሬኮ ስሎ ዓሶ ዎዲ ኩርሲ ባሽህሂ ሃማቲ ዓጮ ካኣቲ ቶዒ ጎዎሂ ዎይዜኔ፤ 10 ዬያኮ ቤርታ ቶዒ ሃዳድ-ዔዜሬና ዎላ ሚርጌ ዎዴ ያልቲሂረ ፔኤኮ ናኣዚ ዮራሜ ደውቲ ኮራ ዳኬኔ፤ ዒዚ ዳኬህሂ ካኣቲ፡ ደውቲ ዎዚ ዓኣቲያ ያኦጫጎዳጉዲና ዒዚ ያሎና ሃዳድ-ዔዜሬ ባሽህሂረ «ማዳ ኔ ዎዛዳኔ!» ጌዒ ኬኤዘሞኬ። ዮራሜ ዒማና ደውቲሞ ዎርቁና፡ ቢራ ዓንጊና ሃሃ ሞኦኖ ዓንጎና ኮሺንቲ ዲማ ዲማ ማሄ ዒንጎ ባኣዚ ማሄ ዔኪ ዬዔኔ፤ 11 ካኣቲ፡ ደውቲ ዬያ ማሆ ዔኪ ዒዚ ቤርታ ዔዶኦሚፓ፡ ሞዓኣቤፓ፡ ዓሞኦኔፓ፡ ፒሊሰጻኤሚንታ ዓማሌቁ ዴርንታፓ ዲዒ ዔኬ ዎርቆ ማሆንታ ቢር ዓንጎንታ ሞኦኖ ዓንጎ ማሆና ዎላ ካኣኣ ካኣሸኪንታጎዳ ማሄ ማዓጎዳጉዲ ያኦሲሞ ዲማሴኔ።

12 ጻሩያ ናኣዚ፡ ዓቢሻዬ ዔዶኦሚ ዓሶ ሶኦጎ ደኦጮ ጌይንታ ቤዛ ያሊ ባሽ ዔያቶ ባኣካፓ ታጶ ሳሊ ሽያ ማዓ ያልዚ ዓሲ ዎዳኔ፤ 13 ዒዚ ዒማና ዔዶኦሚ ዓጮ ጉቤይዳ ያልዚ ዓሲ ዲንኪ ዴዓጎዳ ቤሲ ማዢ ገኢጊሽኔ፤ ዬኖ ዓጫ ናንጋ ዓሳ ካኣቲ ደውቲሞ ገኢሪ ዎርቃያ ማዔኔ፤ ናንጊና ናንጋ ጎዳ ቢያ ቤዘይዳ ደውቲ ያሎና ባሻጎዳጉዲ ማሄኔ።

14 ዬያይዲ ደውቲ ዒሰራዔኤሌ ዓጮ ቢያይዳ ካኣታዳኔ፤ ዴራኣ ቢያ ዎዴ ሳዛ ዲማሲሂ ባኣያ፡ ፒዜ ዎጌ ዎጊሂ ዴንቁኔ። 15 ዓቢሻዬኮ ጌርሲ ዒዮዓቤ ያሎ ዓሶ ዓይህሂኬ፤ ዬያጉዲ ሃሃ ዓሂሉዴ ናኣዚ፡ ዒዮሳፒጻ ፃኣፒንቲ ጌሂንታ ባኮ ሱኡጌ ማዒ ዛጋያኬ፤ 16 ዓሂፀ-ቤ ናኣዚ ሳዶቁና ዓቢያታሬ ናኣዚ ዓቤሚሌኬና ቁኤሶኬ፤ ሱሳ * ጎዎሂ ካኣቲሞ ማኣሮይዳ ፃኣፖ ባኮ ፃኣፓያኬ፤ 17 ዮዳሂ ናኣዚ ቤናያ ደውቲ ካፓ ፖኦሊሶኮ ሱኡጌኬ፤ ካኣቲ፡ ደውቲኮ ዓቲንቆ ናኣታ ዓዴ ካኣታዲ ዎይህኣና ዴኤፒ ዴኤፒ ቢታንቶ ዓኣያ ማዒ ማዳኔ።

19

ደውቲ ዓሞኦኔ ዓሶንታ ሶኦሪያ ዓሶንታ ያሊ ባሽህሂ
(2ሳሙ. 10:1-19)

1 ዬካፓ ዓሞኦኔ ካኣቲ፡ ናዖሴ ሃይቁሞ ዒዛ ቤዛ ዒዛኮ ናኣዚ ሃኑኔ ካኣታዳኔ፤ 2 ካኣቲ ደውቲ፡ «ሃኑኔኮ ዓዴ፡ ናዖሴ ታኣሞ ማዳ ባኮር ቢያ ታኣኒያ ዒዛኮ ናኣዚ ሃኑኔሞ ዒዛና ላጌ ማዒ ማዳሂ ዛሎ

18:12 18:12 ዓይኑ. 60። * 18:16 18:16 ሱሳ ጎዎሂኮ ባጎ ሱጎፃ ሴራያ ጌይንታያኬ።

ኮሺ ማዲ ማሃንዳኔ» ጌዔኔ፤ ዬያሮ ዳውቴ ዒዛና ዋላ የያያ ማዒያ ዔርዛኒ ከኢታ ዓሲ ዳኬኔ።

ዬይ ከኢቶ ዓሳ ዒዛ ደዲሻኒ ዓሞኦኔ ዓጮ ዴንዲ ሄላዛ፤

3 ዓሞኦኔ ዓጮይዳ ቢታንታ ዓኣ ዓሳ ካኣቲሞ፡- «ዳውቴ ሃንሢ ዓሶ ዳኬሢ ኔ ዓዶ ቦንቹ ኔኤና ዋላ ጎኔ የያያ ማዒያ ዔርዛኒ ማዔያ ኔኤም ማላ? ፔቴታዎ ያዲቱሞሌ! ዒዚ ሃንሢ ከኢቶ ዓሶ ዳኬሢ ዓጮ ኔኤኮ የሊ ዓርቃኒ ሙሙሮሞኬ» ጌዔኔ።

4 ዬያሮ ሃኔኔ ዳውቴኮ ከኢቶ ዓሶ ዓርቁ ቡኡጮ ዔያቶኮ ማኤዴኔ፤ ኬርናፓ ሊካ ዓኣ ማኣዓሢያ ዔያቶኮ ቲቁ ካላሲ ገንሣ ማሃ ዓጮ ዳኬኔ፤ 5 ዬንሢ ዓሳ ፔ ማኣሪ ማዒ ዴንዳኒ ቦርሲንቴኔ፤ ዳውቴ ዬያ ማዲንቴ ባኮ ዋይዛየ ከኢታ ዓሲ ዳኬ ዔያታ ዒያርኮይዳ ዴዓንዳጉዲ፤ ሃሣ ቡኡጮ ዔያቶኮ ኬሰካንዳያ ሄላንዳኣና ማዒ ሙኩሞጉዲ ኬኤዘኔ።

6 ዓሞኦኔ ዓሳ ፔ ኩቻ ዬያ ማዲ ዳውቴና ዋላ ሞርኬ ማዔሢ ዔሬኔ፤ ዬያሮ ሃይሢታሚ የይዶ ሺያ ከሎ ማዓ ቢራ ዳኬ ሳርጌላ የይታና ፓሮና ኬዶ ዛላ ዓኣ ማሶፖታሚያና ሶኦሪያ ዓጮ ጋራ ዓኣ ማዒካና የባናይዳፓ ዔኬኔ፤ 7 ዬያይዲ ዔያታ ዔኬ፤ ሃይሢታሚ ላሞዎ ሺያ ሳርጌላ የይታና ካኣቲ፤ ማዒካኮ የሎ ዓሶና ሙኪ ሜዳባ ጌይንታ ቤዘ ኮይላ ዲንኪ ዴዔኔ፤ ዓሞኦኔ ዓሳ ፔኤኮ ካታማፓ ካታማፓ ሙኪ የልዚሮ ገኢገንቴኔ።

8 ዳውቴ ዬያ ዋይዛየ ፔኤኮ የሎ ዓሶ ጉቤሢና ዋላ ዒዮዓቤ ዔያቶ የላንዳጉዲ ሳይሢኔ፤ 9 ዒማና ዓሞኦኔ ዓሳ ሙኪ ዔያቶኮ ዴኔፖ ካታሞ ማዔ ራባ ጌሎ ካራ ቤሲ ቤሲ ዓርቁኔ፤ ሃሣ ዔያቶ ማኣዳኒ ሙኬ ካኣታ ፔጌ ማዔ ቦኦሎይዳ ቤሲ ዓርቁኔ።

10 ሞርኮኮ የሎ ዓሳ ቤርቶ ዛሎና ሃሣ ገንሢና ዔያቶ የላኒ ገኢገሢሢ ዒዮዓቤ ዴንቁኔ፤ ዬያሮ ዒሰራዔኤሌ ፖኦሊሳፓ የሎና ዔርቲያ ዔርቲያ ማዔ ዓሶ ደኦሪ ሶኦሪያ የሎ ዓሶኮ ሆታ ዔቁሴኔ።

11 የሎ ዓሶኮ ዛሎ ገንሣ ዒዛ ጌርሲ ዓቢሻዬ ዓይሣንዳጉዲ ማሃኔ፤ ዓቢሻዬያኣ ዬዮ ዓሶ ዓሞኦኔ ዓሶኮ ሆታ ዔቁሴኔ።

12 ዬካፓ ዒዮዓቤ ዓቢሻዬሞ፡- «ሶኦሪያ ዓሳ የሎና ታና ባሻኒ ዑኬም ኔ ዴንቁቲ ታና ሙኪ ማኣዴ፤ ታኣኒያ ዓሞኦኔ ዓሳ ኔና የሊ ባሻኒ ዑኬቲ ሙኪ ማኣንዳንዳኔ፤ 13 ዓካሪ ዒጊጨፖ ደዴ! ኦ ዳሮና ኦ የኦሲ ካታሞና ዛሎሮ ደዲ ኦ የልቶም፤ ናንገና ናንገ ጎዳ ጌዔሢጉዲ ዬይ ማዎም» ጌዔኔ።

14 ዒዮዓቤና ዒዛኮ የሎ ዓሶና የሎሮ ቤርቲም ኬሰካዛ ሶኦሪያ ዓሳ ጳሽኬኔ፤ 15 ዓሞኦኔ ዓሳ ሶኦሪያ ዓሳ ጳሽኬሢ ዴንቃዎ ዓቢሻዬ ቤርታፓ ገንሢም ካታሞ ባንሢ ጳሽኬኔ፤ ዬካፓ ዒዮዓቤ ዬራሳላሚ ማዒ ዴንዴኔ።

16 ዲሰራዌኤሌ ዓሳ የሎና ዌያቶ ባሼሢ ሶኦሪያ ዓሳ ዌራያ ዌፕራዊሴኮ ዓባ ኬሰካ ባንፃ ዓኣ ሶኦሪያ ዓጮ የሎ ዓሶ ዌኪ ሙኪ ሾባኬ ዓይሢ የሊሳንዳጉዲ ማሄኔ፤ ሾባኬ ያባ ካኣተ፡ ሃዳድዌዜሪኮ የሎ ዓሶ ዓይሢ ሱኡጌኬ፤ 17 ዳውቴ ዌያ ዋይዛየ ዲሰራዌኤሌኮ የሎ ዓሶ ቡቡሲ ዌኪ ዮርዳኖሴ ዋርና ፒንቃየ ያላኒ ቤሲ ዓርቁ ገኢጊንቴኔ፤ ሶኦሪያ ዓሳኣ ፔ ቤዞ ቤዞ ዓርቁ ዳውቴና ዋላ የሎ ዲኡሴኔ። 18 ዌካፓ ዲሰራዌኤሌ ዓሳ ሶኦሪያ ዓሶ ገንሢሞ ማሄ ዳውሴኔ፤ ዲማና ዳውቴንታ ዲዛኮ የሎ ዓሶንታ ላንካይ ሺያ ሳርጌላ ያይታ ዲሻ ዓሲና ያይዲታሚ ሺያ ቶኪና ሃንቲ የላ ዓሲ፤ ዌያጉዲ ሃሣ ሾባኬ ጌይንታ ሶኦሪያ የሎ ዓሶ ዓይሣሢያ ዋዴኔ። 19 ካኣተ፡ ሃዳድዌዜሪ ቢታንቶ ዳማ ዋርቃ ካኣታ ዲሰራዌኤሌ ዓሳ ዌያቶ የሎና ባሼሢ ዌራያ ዳውቴና ዋላ ቡኪ ዲዛሞ ገኢራያ ማዌኔ፤ ዌማፓ ሶኦሪያ ዓሳ ዓሞኦኔ ዓሶ ማኣዳኒ ኮዒባኣሴ።

20

ዳውቴ ራባ ካታሞ የሎና ባሺ ዓርቁሢ

(2ኛሙ. 12:26-31)

1 ዓኮ ሌዓ ዓርቃንዳሢኮ ቤርታ ሲሎ ዓገኖይዳ፡ ካኣታ ያልዚር ኬሰካ ዋዶና ዲዮባቤ የሎ ዓሶ ዌኪ ዳንዲ ዓሞኦኔ ዓጮ ያላኒ ራባ ካታሞ ማንጌኔ፤ ዳውቴ ጋዓንቴ ዌሩሳላሚይዳ ዓቴኔ፤ ዲዮባቤ ዲማና ራባ ካታሞ የሊ ባይዜኔ፤ 2 ሚልኮሜ ጌይንታ ዓሞኦኔ ዓሳ ካኣሽካ ያኦዞኮ ዳኤሠማ ሃይሢታሚ ያይዶ ኪሎ ማዓያ ቶኦካ ዓሳ ባኣዚ ዓኣኔ፤ ዌያኮ ጋርይዳ ሚዛጲ፡ ሚርጌ ዋኣጌ ኬሳ ሹቺ ዓኣኔ፤ ዳውቴ ዌኖ ቶኦካ ዓኅ ባኬሎ ዌኪ ፔ ቶኦካ ዓጌኔ፤ ሃሣ ዌያጉዲ ካታሚሎይዳፓኣ ሚርጌ ባኣዚ ዲዒ ዌኬኔ፤ 3 ዲኢካ ዓኣ ዓሶዋ ዌኪ ኬሲ ማጋኣዜንታ ባላሻንታ ሄርጋኣ ዌያቶሞ ዲንጊ ማዶ ማዲሺሴኔ፤ ዓሞኦኔይዳ ዳኮ ዳኮ ካታማ ዓኣ ዓሶዋ ቢያ ዲዚ ዲማይዳኔ። ዌካፓ ዳውቴና ዲዛኮ የሎ ዓሳ ገንሣ ዌሩሳላሚ ማዌኔ።

ፒሊሰጻኤሚ ዓሶኮ የሎና ዌርቴ ዓሶ የሎና ያልዚ

(2ኛሙ. 21:15-22)

4 ናንጊቤቃ ዲሰራዌኤሌ ዓሳ ጌዜሬይዳ ናንጋ ፒሊሰጻኤሚ ዓሶ የሌኔ፤ ዲማና ሁሻ ዓጪ ሾይንቲ ማዌያ ሲቤካዌ ኅያሢ ሲፓዌ ጌይንታ ያልዚና ዌርቴ ዓሲ ዋዴኔ፤ ፒሊሰጻኤሚ ዓሳኣ የሎና ባሺንቴኔ፤

20:1 20:1 2ኛሙ. 11:1።

5 ዬያ ሌሊቱዋንቲ ላሚ ሃሃ ፒሊሰጸኤሜ ዓሶ ዔያታ ያሌኔ፤ ዬኖ ያሎና ያዒሬ ናኣዚ፤ ዔልሃናኔ ጋኣቲ ዓጫ ሾይንቲ ጎኦሊያዴኮ ጌርሲ ላሂሜ ዋዴኔ፤ ዬያኮ ዋርዖ ዘዖ ዓንዲርሙማ ዶርዜኮ ዓንዲራሹ ሚሢጉዴያኬ።

6 ሚሌ ሃሃ ጋኣቲይዳ ያልዚ ቡሊንቴኔ፤ ዬኖ ያሎይዳ ላምዖ ኩጮና ቶኮናይዳ ላቆ ኬኤላ ዋሊ ዑፃ ላማታሚ ያይዶ ኬኤላ ዓኣ ፔቲ ያዶሲ ዓሲሰኬይ ዓኣኔ፤ ዒዚያ ሚናኣ ዋዶና ያሎና ዔርቲ ራፓይሜ ዓሶ ዜርፃፓኬ። 7 ዬይ ዓሢ ዒሰራዔኤሌ ዓሶ ያላኒ ጫርቄኔ፤ ጋዓንቲ ደውቴኮ ጌርሲ፤ ሻማ ናኣዚ ዮናታኣኔ ዒዛ ዋዴኔ።

8 ደውቴንታ ዒዛኮ ያሎ ዓሶንታ ዋዴ ዬንሢ ሃይሃ ዓሶንሢ ያሎና ዔርቲያ ማዔ፤ ራፓይሜ ዜርፃፓኬ።

21

ደውቴ ዓሶ ፓይዴሢ (2ኛሙ. 24:1-25)

1 ፃላሄ ዒሰራዔኤሌ ዳርይዳ ሜቶ ዔኪ ዬዓኒ ማሌሢር ደውቴ ዳር ፓይዳንዳጉዲ ደውቴ ዒና ጌሌኔ። 2 ደውቴ ዒማና ዒዮዓቤና ሃንጎዋቶ ያሎ ዓሶ ሱኡጎናም፡- «ዒሰራዔኤሌ ዓጮኮ ካራፓ ጋፓ ሄላንዳኣና፤ ጌይዖ፡ ዳኣኔፓ ዴንዲ ቤርሳቤ ሄላንዳኣና ዓኣዲ ዳር ፓይዲዋቲ፤ ታኣኒ ዒሰራዔኤሌ ዓጮይዳ ዓኣፒኒ ዓሲ ዓኣቲያ ዔራኒ ኮዓኔ» ጌይ ዓይሣኔ።

3 ዒዮዓቤ ማሃዖ፡- «ካኣቲዮ! ናንጊና ናንጋ ጎዳ ዒሰራዔኤሌ ዳር ሃሢ ዓኣሢፓ ጸኤታ ጳንጮፍ ማሂ ኔኤም ሚርጊሾንጎ! ዔያታ ቢያ ኔ ዓይሎኬ፤ ዓካሪ ኔኤኒ ዳር ፓይዲ ዴራ ጉቤ ዳቤያ ዓይጋ ማሃይ?» ጌዔኔ። 4 ካኣቲ ጋዓንቲ ፔኤኮ ዓይሢፃ ኩማንዳጉዲ ዋልቃዲ ዒዮዓቤ ዓይሣኔ፤ ዬካፓ ዒዮዓቤ ካኣቲ ኮራፓ ኬሰኪ ዴንዲ ዳር ፓይዲኒ ዓጮ ጉቤ ሺሪ ዬራሳላሚ ማዒ ሙኬኔ።

5 ዒዚ፡- ያልዚ ያላኒ ዳንዳዓ ዓሶኮ ፓይዶ ቢያ ደውቴም ኬኤዜኔ፤ ዬያታ፡- ዒሰራዔኤሌፓ ፔቲ ሚሎኔና ፔቲ ጸኤታ ሺያ ዓሲ ማዓዛ፤ ዪሁዳይዳፓ ሃሃ ያይዶ ጸኤታና ላንካይታሚ ሺያናኬ፤ 6 ዒማና ዒዮዓቤ ካኣቲኮ ዓይሢፃ ናሽኪ ዔኪባኣሢር ለዌ ዓሶንታ ቢኢኒያሜ ዓሶ ፃጳ ፓይዲባኣሴ።

7 ያኦሲ ዬያ ማዲንቲ ባኮር ቢያ ሚርጌና ዳጋዴሢር ዒሰራዔኤሌ ዓሶይዳ ሜቶ ዔኪ ዬዔኔ። 8 ዬያር ደውቴ ያኦሲ ኮይላ፡- «ታኣኒ

20:5 20:5 1ኛሙ. 17:4-7።

ሃያይዲያና ዳኤፒ ዳኤሢ ማዕ ዓሜ ማዳኔ! ሃዳራ ታና ማኣሬ፤ ዕኤያቶ ማዳ ታ ማዳያዋይ!» ጌዕኔ።

9 ናንገና ናንገ ጎዳ ዳውቴም ያኦሲ ማሊያ ኬኤዛ፣ ጋኣዴም፡- 10 «ዳንዲ ዳውቴም <ሃይሃ ባኣዚፓ ኔ ዶኦራንዳጉዲ ታ ኔኤም ሸኢሸኔ፤ ታኣኒ ኔ ዶኦራማ ማዳንዳኔ» ጋዓኔ» ጌይ ኬኤዜ ጌዕኔ።

11 ዬያሮ ጋኣዴ ዳውቴ ኮይላ ዳንዲ ናንገና ናንገ ጎዳ ዒዛም ጌዕ ባኮ ቢያ ፔጋሲ ኬኤዜኔ፤ ሂዚ ጌዒ ዒዛ ያኦጩኔ፡- 12 «ኔ ዓጮይዳ ሃይሃ ለዕ ሉማ ኬሰከቴ ኮሺም? ሃንጎ ገንሣ ሃይሃ ዓገኒ ኔ ሞርካ ኔናዳውሲ ሃንቴቴዳይ? ዕይዕ ጌዕቴ ሃይሃ ኬሊ ናንገና ናንገ ጎዳ ዳካ ፑርታ ዶርያና ዓጮ ኔኤኮ ቢያ ኩርሳንዳ ከኢታንቸ ዳካያይዳፓ ዋማ ኔ ዶኦራይ? ሂንዳ ዓካሪ ናንገና ናንገ ጎዳም ታ ጋዓንዳማ ዲማሲ ኬኤዜ» ጌዕኔ።

13 ዳውቴ ዒማና፡- «ታኣኒ ዋሮ ዶኦራንዳቴያ ካራ ታኣም ባይቄኔ! ያዲ ማዕቴያ ዓሲ ኩቹ ጋርሲ ጌላኒ ታ ኮዑባሴ፤ ናንገና ናንገ ጎዳ ሚጩንታያታሢሮ ዒ ታገዳ ኮዕ ሜቶ ዓዓጎንጎ» ጌዕኔ።

14 ዬያሮ ናንገና ናንገ ጎዳ ዒሰራዔኤሌ ዳሮይዳ ፑርታ ዋዳ ዶርያ ዔኪ ሙኬም፣ ላንካይታሚ ሺያ ዓሲ ኩዳኔ፤ 15 ናንገና ናንገ ጎዳ ገንሣ ሃሣ ዬሩሳላሜ ባይዛኒ ከኢታንቸ ዳከኔ፤ ጋዓንቴ ከኢታንቸሢ ዬሩሳላሜ ባይዚያ ዓዓርቃማና ዳሮይዳ ናንገና ናንገ ጎዳ ሄሊሴ ሜታ ዒዛኮ ዋልቃ ጌሌሢሮ ከኢታንቸሢም፡- «ሃይማ ሄላንዳኣና ዔያቶይዳ ሄሌ ሜታ ገዳንዳኔ፣ ሃሺ!» ጌዕኔ። ከኢታንቸሢ ዒማና ዒያቡሳ ዓሢ ያርና ጎያሢኮ ቆይዶ ዓጫ ዔቁ ዓኣኔ።

16 ከኢታንቸሢ ዬሩሳላሜ ባይዛኒ ጩንቸ ዓፓሮ ኩጫ ዓርቂ ሳያኮ ዑፃ፣ ዳጌ ዠባራ ዔቁ ዓኣንቴ ዳውቴ ዳንቄኔ፤ ዬያሮ ዳውቴንታ ሲዮ ፓቴሎ ማይንቴ ዓኣ ዳሮ ሱኡጎንታ ቢያ ባለቶ ሳያ ሄሊሲ ዒዛም ዚጌኔ። 17 ዳውቴ ዒማና፡- «ያኦሲዮ! ዳቢንቴሢ ታናኬ፤ ዳራ ፓይዲንታንዳጉዲ ዓይሣሢያ ታናኬ፤ ዓካሪ ሃይ ዔኤቢ ዔሩሞ ዓሳ ዓይጎ ዋኦቴይ? ናንገና ናንገ ጎዳ ማዕ ያኦዛሢዮ! ታናንታ ታ ማኣሮ ዓሰንታይዳ ሜቶ ዓጌ፤ ሃያ ዳሮ ዑፃ ሃያ ዋዳ ዶርዓሢ ኬይሲፖ» ጌዒ ሸኢቄኔ።

18 ናንገና ናንገ ጎዳኮ ከኢታንቸሢ ጋኣዴም ሂዚ ጌዕኔ፡- «ዳውቴ ዒያቡሳ ዓሢ፣ ያርና ቆይዶ ዳንዲ ናንገና ናንገ ጎዳም ዒንጎ ባኮ ዒንጎ ቤሲ ገኢገሺም ኬኤዜ።» 19 ጋኣዴ ዒዛም ኬኤዜ ዓይሢያ ከንሣኒ ዳውቴ ዳንዳኔ፤ 20 ዬሮ ቆይዶይዳ ያርናንታ ዒዛኮ ያይዶ ዓቴንቆ ናኣቶንታ ዛርጌ ሺርኪቤቃ ከኢታንቸሢ ዳንቃያ ናኣታ ጳሽኪ ፑኒንቴኔ። 21 ያርና ዒማና ዳውቴ ዔያቶ ባንሢ ሙካሢ

ዛጊ ቆይደይዳፕ ዒዛ ባንሢ ኬሰኪ ሳዓ ላሂ ቦንቾ ዔኤላሢ ዔኤሌኔ፤ 22 ደውቴ ዖርና ኮይላ፡- «ፑርቶ ዎዳ ደርዓሢ ዳርይዳፕ ዔቃንዳጉዲ ናንጊና ናንጋ ጎዳም ዒንጎ ባኣዚ ዒንጎንዶ ቤሲ ታ ጊኢጊሾም ኔኤኮ ቆይደ ታኣም ሻንቹ፤ ጨገንታኒ ኮይሳ ባኮ ቢያ ኩንሢ ታ ጨጋንዳኔ» ጌዔኔ።

23 ዬያር ዖርና፡- «ካኣተዮ! ኔኤር ዔኬ፤ ኔ ኮዔ ባኣዚ ዒኢካ ማማዳ፤ ዒንጎ ባኮ ዒንጎ ቤዘይዳ ሚቹ ዒንጋኒ ሃንሢ ጌማቶንሢያ ዔኬ፤ ሃያ ሃኣኮ ሺርኮ ሚፆዎ ሃንዲሌ ማሂ ዔኬ፤ ሃሃ ዛርጋሢያ ሃኣኮ ዒንጊሢ ማሂ ሺኢሹ፤ ሃይሾ ቢያ ባኮ ታ ኔኤም ዒንጌኔ» ጌዔኔ።

24 ካኣተ፡ ደውቴ ጋዓንቴ፡- «ዬይ ማዓዓኬ፤ ጨገንታኒ ኮይሳ ባኮ ቢያ ታ ጨጋንዳኔ። ኔ ባኣዚ ማዔያ፤ ታኣኒ ዔኤቢ ጨገ ዔኪባኣ ባኣዚ ናንጊና ናንጋ ጎዳም ዒንጎ ባኣዚ ማሂ ዒንጋኒ ታ ኮዑዎሴ» ጌዔኔ። 25 ዬካፕ ደውቴ ዖርናም ዬኖ ቆይደኮ ላንካይ ኪሎ ማዓንዳ ዎርቄ ጨገ፤ 26 ዬኖ ቤዘይዳ ናንጊና ናንጋ ጎዳም ዒንጎ ባኮ ዒንጎ ቤሲ ጊኢጊሹ ሚቹ ዒንጎ ዒንጊሢንታ ፔቱሞና ዒንጎ ባኣዚያ ሺኢሹ፤ ዒዚ ዒማና ሺኢቃዛ ናንጊና ናንጋ ጎዳ ዒንጎ ባኮ ዒንጎ ቤዘይዳ ዓኣ ባኮ ኬዲ ሙዓንዳ ታሚ ጨሪንጫፕ ዳኪ ሺኢጲፆ ዒዛኮ ዎይዘኔ።

27 ናንጊና ናንጋ ጎዳ ኪኢታንቻሢም፡- «ጨንቾ ዓራፖ ጎንጎኖይዳ ዳኬ» ጋዓዛ፡ ኪኢታንቻሢ ዓይሢንቴ ጎይፆ ማዳኔ፤ 28 ዬያይደም ደውቴ ናንጊና ናንጋ ጎዳ ዒዛኮ ሺኢጲፆ ዎይዘሢ ዔሬኔ፤ ዬያር ዒያቡሳ ዓሢ፡ ዖርና ቆይዳ ዓኣ ዒንጎ ቤዘይዳ ናንጊና ናንጋ ጎዳም ዒንጎ ባኣዚ ዒዚ ሺኢሹ፤ 29 ሙሴ ዓሲ ናንጉዎ ደውሎይዳ ማገቴ፡ ዓፒሎና ማኲንቴያ ጎዳ ካኣሽኪንታ ማኣርንታ ዒንጎ ባኮ ዒንጎ ቤዘንታ ዬማ ሄላንዳኣና ጌባፆኣይዳ ዓኣ ካኣሽኮ ቤዛ ዓይ ዓኣኔ፤ 30 ናንጊና ናንጋ ጎዳ ኪኢታንቻሢኮ ጨንቾ ዓፓር ደውቴ ዒገጨሢሢር ዒኢካ ዴንዲ ፆኦሲ ካኣሽካኒ ዳንዳዒባኣሴ።

22

1 ዬያር ደውቴ፡- «ፆኦሲኮ ጌኤዡ ማኣርንታ ዒሰራዔኤሌ ዳርኮ ናንጊና ናንጋ ጎዳም ሚቹ ዒንጎ ባኮ ዒንጎ ቤዛኣ ሃይካ ማዓንዳያ ኮይሳኔ» ጌዔኔ።

ጌኤዡ ማኣር ማዣኒ ጊኢጊሹንቴ ባኮ

2 ካኣተ፡ ደውቴ ዒሰራዔኤሌ ዓጮይዳ ናንጋ ሜሌ ዓጮ ዓሶ ፔቴይዳ ቡኩሲ ማዶ ማዲሹ፤ ዬያቶ ዓሶፕ ፔቴ ፔቴ ዓሳ ጌኤዡ

ማእሮ ማዦንዶ ሹጮ ዓርሳንዳጉዲ ዓይሄኔ፤ 3 ዳውቴ ዒማና ማርሾ ካሮኮ ሚሰማርንታ ማኣጃፖ ጌይንታ ጳንጪንታ ዓንጎዎ ኮሾንዶ ዲቢ ዓንገ፤ ዬያጉዲ ሃሣ ዴኤሠሞ ዔሮ ባኮና ዛጊ ዔርታኒ ዳንዳዑዎ ሞኦና ዓንገያኣ ዑሣ ዓኣጳ ሚርጌ ገኢጊሹኔ፤ 4 ዲርሴና ሲዶና ዓጮ ዴራኣ ኮሺ ዲቢ ዚቢቁ ዔኪ ዬዓንዳጉዲ ዓይሣ ዔኪ ዬይሴኔ። 5 ዬካፓ ዳውቴ፡- «ታ ናኣዚ፡ ሴሎሞኔ ናንገና ናንጋ ጎዳም ማዦንዳ ጌኤዦ ማኣራ ሚርጌና ሚዛጳያ ዓጮ ቢያይዳ ዔርቱያ ማዓኒ ኮይሳኔ፤ ጋዓንቱ ዒዚ ሃጊ ናይ፡ ዒዳዲ ዶዲባኣያ ማዔሣሮ ታኣኒ ቢያ ባኮ ዒዛም ገኢጊሻንዳኔ» ጌዒ ፔ ዒኖና ማላዖ ዒ ሃይቃንዳሢኮ ቤርታ ማእሮ ማዦንዶ ባኮ ሚርጌ ገኢጊሹኔ።

6 ዒማና ዳውቴ ፔኤኮ ናኣዚ ሴሎሞኔ ዔኤሊሳዖ ናንገና ናንጋ ጎዳ ማዔ ዒሰራዔኤሌ ያኣዛሢም ጌኤሺ ማኣሪ ማዦንዳጉዲ ዓይሄኔ፤ 7 ዒዚ ናኣዚም፡- «ታ ናዓሢዮ፤ ታኣኒ ናንገና ናንጋ ጎዳ ማዔ ታ ያኣዛሢም ጌኤሺ ማኣሪ ማዦኒ ማሌንቱ፤ 8 ናንገና ናንጋ ጎዳ፡- ሕኢኒ ሚርጌ ዓሲ ዎዴኔ፤ ሚርጌ ያልዚያ ኔ ያልቱኔ፤ ሚርጌ ሱጉሣያ ኔኤኒ ላኣሌሣሮ ጌኤሺ ማኣሪ ኔ ማዦንዳጉዲ ታ ኮዑዎሴ» ታኣም ጌዔኔ፤ 9 ያዲ ማዔቲያ ሂዚ ጋዓ ሃጊ ማዓንዳ ዎዛ ቃኣላ ታኣም ኬኤኤኔ፡- ታኣኒ ዒዛኮ ሞርኮ ቢያይዳፓ ሃውሺሲ ኮሹሞ ዒዛም ዒንጌም ኮሺና ዓጮ ዎይሣንዳ ዓቲንቁ ናይ ኔ ሾዓንዳኔ፤ ዒዚ ካኣታዲ ዎይሣ ዎዶና ዒሰራዔኤሌ ዴሮም ዲቃቲሣባኣ ኮሹሞ ታ ዒንጋንዳሢሮ ሱንፃ ዒዛኮ ሴሎሞኔ ጌይንታንዳኔ፤ 10 ታኣም ጌኤዦ ማእሮ ማዦንዳሢ ዒዛኬ፤ ዒዚ ታኣኮ ናዖ ማዓንዳኔ፤ ታኣኒያ ዒዛኮ ዓዶ ማዓንዳኔ፤ ካኣቱማኣ ዒዛኮ ዒሰራዔኤሌይዳ ዶዲ ናንጋንዳኔ» ጌዔኔ።

11 ዳውቴ ሃሣ ኬኤዛዖ፡- «ሃሢ ዓካሪ ታ ናዓሢዮ፤ ናንገና ናንጋ ጎዳ ማዔ ኔ ያኣዛሢ ኔኤና ዎላ ማዖንጎ፤ ዒዛም ኔኤኒ ጌኤዦ ማእሮ ማዦንዳጉዲ ዒዚ ዒንጌ ሃጊ ማዓንዳ ዎዛ ቃኣሎ ካፒ ቢያ ባኮ ኔኤም ገኢጊሻንጎ፤ 12 ዒሰራዔኤሌይዳ ኔና ዒ ካኣታሣኣና ናንገና ናንጋ ጎዳ ኔ ያኣዛሢኮ ዎጎ ኔኤኒ ካፓንዳጉዲ ዔራቶና ጳቂሥሢ ማሊሢና ዒ ኔኤም ዒንጎንጎ፤ 13 ናንገና ናንጋ ጎዳ ሙሴ ዛሎና ዒሰራዔኤሌም ዒንጌ ዎጎንታ ዓይሢያንታ ቢያ ኔ ኩንሣቱ፡ ቢያ ባካ ኔኤም ገኢጋንዳኔ፤ ዶዴ፡ ዒጊጪፓ፤ ጫርቁ ማዳያ ማዔ። 14 ጌኤዦ ማእሮ ማዦንዳ ዛሎ ማዔቲ ታኣኒ ታ ዛሎና ማእሮ ማዦንዳም ማዓንዳ ሃይሣ ሺያና ያይዶ ጃኤታ ቶኦኔ ማዓ ዎርቁ፤ ሃይሢታሚ ያይዶ ሺያ ቶኦኔ ማዓ ሹቺ ቢራ፤ ሚርጉማ ሃይማኬ ጌይንቲ ዔርቱዎ ሞኦና

22:10 22:10 2ሳሙ. 7:1-16፤ 1ያሱሲ. ዓሃኬ 17:1-14። 22:13 22:13 ዓ.ያ. 1:6-9።

ዓንገንታ ገአገሸኔ፤ ዬያጉዲ ሃሣ ሚሢንታ ሹቺያ ታኣኒ ገአገሸኔ፤ ጋዓንቲ ኔኤኒ ዬያይዳ ቃሳንዳያ ኮይሳኔ፤ 15 ኔኤኮ ሹቺ ዓርሳ ዓሲ፤ ሹጮና ማኣር ማዡ ዓሲ፤ ሚያና ማዡ ዓሲ፤ ዬያጉዲ ሃሣ ዲማ ዲማ ማዶ ማዶ ዓሲያ ዓኣኔ፤ 16 ዋርቄ፤ ቢራ ዓንገ፤ ሞኦና ዓንገንታ ሜሌ ዓንጎዋ ገአገሸሢና ዔርቲ ዲማ ዲማ ማዶ ማዶ ዓሲ ኔኤኮ ዓኣኔ፤ ዬያር ሃሢ ማዶ ዓርቄ፤ ናንገና ናንጋ ጎዳ ኔኤና ዋላ ማዶንጎ» ገዔኔ።

17 ዬካፓ ዳውቲ ዒሰራዔኤሌ ዓሶኮ ሱኡጋ ቢያ ዒዛኮ ናኣዚ ሴሎሞኔ ማኣዳንዳጉዲ ሂዚ ገዒ ዓይሢኔ፤ 18 «ናንገና ናንጋ ጎዳ ዒንሢኮ ጾኣዛሢ ሃይማ ሄላንዳኣና ዒንሢና ዋላኤ፤ ቢያ ዛሎና ሂርገሻ ባኣዚፓ ቢያ ካፒ ኮሹሞ ዒንሢሞ ዒንጌኔ፤ ሃሮ ዓጮይዳ ናንጋ ዳሮ ቢያ ታኣኒ ያሊ ባሻ ዓርቃንዳጉዲ ማኣዳኔ፤ ዔያታ ዒንሢንታ ናንገና ናንጋ ጎዳንታሞ ዓይሢንቲ ዋርቃያ ማዔኔ፤ 19 ዓካሪ ናንገና ናንጋ ጎዳ ማዔ ዒንሢኮ ጾኣዛሢሞ ጉቤ ዒናፓ፤ ሃሣ ጉቤ ሹምፓፓ ማዲዋቲ፤ ናንገና ናንጋ ጎዳኮ ጫኣቁሞ ሳኣዲንታ ዒዛ ካኣሽኮ ዒዛሞ ዲማዶ ሜሆ ቢያ ዔኪ ሙኪ ጋራ ገሣኒ ጌኤዢ ማኣር ጾኣሲ ቦንቸሞ ማዢያ ዓርቁዋቲ።»

23

1 ዳውቲ ባሽንቲ ጋርቻዎ ፔኤኮ ናኣዚ፤ ሴሎሞኔ ዒሰራዔኤሌይዳ ካኣታሢኔ።

ሌዊ ዓሶ ማዶ

2 ካኣቲ፤ ዳውቲ ዒሰራዔኤሌ ዓሶ ሱኡጎንታ ቁኤሶንታ ሌዊ ዓሶንታ ጉቤ ፔቲይዳ ቡኩሴኔ፤ 3 ዒዚ ዒማና ሌዓ ሃይሢታሚና ዬካፓ ዑሣ ማዔ፤ ሌዊ ዓሶ ዓቲንቆ ቢያ ፓይዳኔ፤ ዋሊ ዑፃ ፓይዳ ዔያቶኮ ሃይሢታሚ ሳሊ ሺያ ማዔኔ፤ 4 ካኣቲ ዔያቶይዳፓ ላማታሚ ያይዶ ሺያ ማዓ ዓሲ ጌኤዢ ማኣር ማዶ ማዶንዳጉዲ ዓይሢኔ፤ ሃሣ ላሆ ሺያ ማዓ ዓሲ ደኣሪ ቢታንቶ ዓኣ ዓሲና ዋጌ ዋጋ ዓሲ ማሂ ገሢኔ። 5 ያይዶ ሺያ ማዓ ዓሲ ጌኤዢ ማኣር ካፓንዳጉዲ ገሢንቲኔ፤ ዓቲ ያይዶ ሺዮ ዓሶ ካኣቲ ዔያቶሞ ዒንጋ፤ ዓይኑሞ ዓንጎና ናንገና ናንጋ ጎዳሞ ዓይናዲ ጋላታንዳጉዲ ማሆና።

6 ዳውቲ ሌዊ ዓሶ ፔኤኮ ቶኦኮና ቶኦኮና ሃይሣ ቤሲ ፓቄኔ፤ ዔያታ፡- ጌርሾኔ፤ ቁዓቲንታ ሜራሪ ጌይንታ ቶኦኮኤ።

7 ጌርሾኤኮ ላዒዳኔና ሺሞዒ ጌይንታ ላምዎ ዓቲንቄ ናይ ዓኣኔ፤ 8 ላዒዳኔኮዋ ዪሃዔኤሌ፤ ዜታሜንታ ዒዮዔኤሌ ጌይንታ ሃይሣ

23:1 23:1 1ካኣቶ. ማ 1:1-40።

ዓቲንቄ ናይ ዓኣኔ፤ 9 ሸምዒኮ ሽሎሞቲ፣ ሃዚዔኤሌና ሃራኔ ጌይንታያ ሃይሃ ዓቲንቄ ናይ ዓኣኔ፤ ዩንሢ ሲያ ላዒዳኔ ዜርዖ ማዔ ቶኦኮኮ ሱኡጎኔ፤ 10-11 ሸምዒኮ ሌዓ ዋሊ ሄሊ ሄሊ ሸይንቲያ፡-ያሃቲ፣ ዚዛ፣ ዪዑሽና ቤሪያ ጌይንታ ያይዶ ዓቲንቄ ናይ ዓኣኔ፤ ዪዑሽና ቤሪያናኮ ሚርጌ ናይ ባኣሢር ፔቲ ቶኦኮ ማዒ ፓይዲንታኔ።

12 ቁዓቲኮ ዓምራሜ፣ ዪፅሃሪ፣ ኬብርኦኔና ዑዚዔኤሌ ጌይንታ ያይዶ ዓቲንቄ ናይ ዓኣኔ፤ 13 ዒዛኮ ናኣዚ ቶይዲ ዓምራሜ ዓኣሮኔና ሙሴናኮ ዓዶኬ፤ ዓኣሮኔና ዜርዖና ናንጊና ናንጋ ጎዳ ካኣሸኮ፣ ዲማጴ ሚሆ ሱኡጌ ማዒ ካፒ ካፒ ናንጋንዳጉዲ፤ ሃሣ ናንጊና ናንጋ ጎዳ ካኣሸኮ ዳምቦይዳኣ ዑንጆ ጨቢሻንዳጉዲ፤ ያኦሲማኣ ማጲያ ማዓንዳጉዲ፤ ዩያጉዲ ገንሣ ናንጊና ናንጋ ጎዳ ሱንዖና ዳር ዓንጃንዳጉዲ ዲማሶናያኬ፤ 14 ያኦሲ ዓሲ ማዔ ሙሴኮ ናኣታ ለዊ ዓሶና ዋላ ፓይዲንቲኔ። 15 ሙሴኮ ጌርሾሚና ዔሊዔዜሪ ጌይንታ ለምዖ ዓቲንቄ ናይ ዓኣኔ፤ 16 ጌርሾሚኮ ዓቲንቆ ናኣቶ ባኣካፓ ሱኡጋሢ ሽቡዒኤሌኬ፤ 17 ዔሊዔኤዜሪኮ ሪሃቢያ ጌይንታ ፔቲ ዓቲንቄ ናይ ሌሊ ዓኣኔ፤ ሪሃቢያኮ ጋዓንቲ ሚርጌ ዜርሢ ዓኣኔ።

18 ቁዓቲኮ ለምዓሳ ናኣዚ፣ ዪፅሃሪኮ ዩኖ ቶኦኮ ሱኡጌ ማዒ ዋይሃ ሽሎሚቲ ጌይንታ ፔቲ ዓቲንቄ ናይ ዓኣኔ፤ 19 ቁዓቲ ናኣዚ ኬብርኦኔኮ ቤርታሳ ናዓሢ ዪሪያ፣ ለምዓሳሢ ዓማሪያ፣ ሃይሃሳሢ ያህዚዔኤሌ፣ ያይዳሳሢ ዪቃምዓሚ ጌይንታያኬ። 20 ቁዓቲኮ ያይዳሳ ናዓሢ፣ ሙዚዔኤሌኮ ቶይዳሢ ሚካ፤ ሄሊሴሢ ዩሺያ ጌይንታ ለምዖ ዓቲንቄ ናይ ዓኣኔ።

21 ሜራሪኮ ማህሊና ሙሺ ጌይንታ ለምዖ ዓቲንቄ ናይ ዓኣኔ፤ ማሂሊኮ ሃሣ ዓላዜሪና ቂሽ ጌይንታ ለምዖ ዓቲንቄ ናይ ዓኣኔ።

22 ዓላዜሪ ጋዓንቲ ዉዲር ናይፓ ዓታዛ ፔቲታዖ ዓቲንቄ ናይ ሾውዋዖ ሃይቄኔ፤ ዒዛኮ ዉዲር ናኣታ ዔያቶኮ ዓቦ፣ ቂሽ ናኣቶም ሎዔኔ፤

23 ሜራሪኮ ለምዓሳ ናኣዚ፣ ሙሽኮ፡- ማሂሊ፣ ዔዴሪና ዪሬሞቲ ጌይንታ ሃይሃ ዓቲንቄ ናይ ዓኣኔ።

24 ዓካሪ ዩያታ ቢያ ፔ ቶኦኮና ቶኦኮና፤ ሃሣ ፔ ማኣርና ማኣርና ፓይዲንቲ ለዊ ዜርዖ ማዓዛ ፔቲ ፔቲ ዓሳ ፔ ሱንዖና ዔኤሊንታኔ። ለማታሚ ሌዔ ኩሜያ፤ ሃሣ ገንሣ ዩካፓ ዑሣ ማዔ ፔቲ ፔቲ ለዊ ዜርዖ ናንጊና ናንጋ ጎዳኮ ጌኤኾ ማኣሮይዳ ማዳ ባኣዚ ዓኣያኬ።

25 ዳውቲ ዒማና፡- «ናንጊና ናንጋ ጎዳ ማዔ ዒሰራዔኤሌኮ ያኣዛሢ ፔ ዳርም ኮሹሞ ዒንጌኔ፤ ዩያ ለሌቱሞንቲ ዒ ፔ ቶኦኮና ዩሩሳላሚይዳ ናንጊና ናንጋንዳኔ፤ 26 ዩያር ሃካፓ ሴካ ናንጊና ናንጋ

23:13 23:13 ኬሲ. ማፃ 28:1።

ጎዳ ካላሸከንታ ማኣሮንታ ካኣዡ ዳምቦ ኩንሆ ሚሆ ሌዊ ዓሳ ኬዲ ኬዲ ሃንታንዳያ ኮይሱዋሴ» ጌዔኔ። 27 ዳውቲ ጋፒንፃ ዓይሄ ዓይሄያ ጎይፆና ሌዊ ዓሳ ቢያ ላማታሚ ሌዔ ኩሚ ዓሶንታ ዩካፓ ዑሃ ዓኣጳ ዓሳ ማድሮ ሱንፆ ፃኣፒንቲኔ። 28 ዔያታ ማዳ ማዳ፡- ዓኣሮኔ ናኣታ ናንገና ናንጋ ጎዳ ማኣሮይዳ ማዳ ማዳ ማኣዲሂ፡ ዲሮ ጋሮንታ ኬኤፆኮ ቆልፆ ጋሮ ጌኤሺ ካፒሂ፡ ናንገና ናንጋ ጎዳም ዲማዳ ሚሆ ጌኤሺ ካፒሂ፤ ዩያጉዲ ጌኤዡ ማኣሮይዳ ማዳንታ ባኮ ማዳሂኬ። 29 ፆኣሲም ዒንገንታያ ማዒ ሺኢካ ካሆና ዲኢሎና፤ ዩያጉዲ ሃሃ ሙኑቃ ፃኣዛ ጌሊባኣ ላኣደንታ ሪሚቶ ዛይቶና ዲሮከንታ ዲኢሎንታ ሱኡጌ ማዒ ዛጋያ ማዓዛ፡ ገንሃ ሃሃ ጌኤዡ ማኣሮም ዒንገንታ ባኮ ዴኤሡም ዔሮ ባኮና ዛገ፤ ዋርቁያኣ ዔራ ዓሳ ዔያቶኬ፤ 30-31 ቢያ ኬሊ ጉቲና ዒባሊና፤ ዩያጉዲ ሃሃ ናንገና ናንጋ ጎዳም ዒንጎ ባካ ሚቹንታ ዓይሁደኮ ሃውሾ ኬሎንታ ዓገሮ ፃኤሮንታ ዲማ ዲማ ቦንቾ ኬሎንታይዳ ናንገና ናንጋ ጎዳ ጋላቲሂና ቦንቹሂ ዔያቶ ማዳኬ፤ ቢያ ዋዴ ዩያ ማዳ ማዳ ሌዊ ዓሶኮ ፓይዳ ዋኣዲ ማዓኒ ኮይሳቲያ ኬሰኬ ዳምቤ ዓኣኔ፤ ሌዊ ዓሳ ናንገና ናንጋ ጎዳ ካላሸከኑ ዳምቦ ኩንሃንዳጉዲ ቢያ ዋዴም ጌሂንቲኔ። 32 ዩያጉዲ ሃሃ ዓፒሎና ማዡንቲ፡ ናንገና ናንጋ ጎዳ ካላሸከንታ ማኣሮንታ ጌኤዡ ማኣሮንታ ዛገ ካፒፃ ዔያቶ ማዳኬ፤ ዩያ ሌሊቱዋንቲ ጌኤዡ ማኣሮይዳ ካኣዡ ካላሸከሳ፡ ዔያቶኮ ዒገሮ ዓኣሮኔ ዜርፆ ማዔ ቁኤሶዋ ዔያታ ማኣዳኔ።

24

ቁኤሳ ማዳንዳጉዲ ዓይሂንቲ ባኮ

1 ዓኣሮኔ ናኣታ ማድሮ ዲማ ዲማ ፓቁንቲ ጎይፆ ያዲኬ፡- ዓኣሮኔኮ ፆይዶ ዓቲንቁ ናይ ዓኣኔ፤ ዔያቶኮ ሱንፆ፡- ናኣዳኣቤ፡ ዓቢሁ፡ ዓላዜሬንታ ዒታማሬንታኬ፤ 2 ናኣዳኣቤና ዓቢሁና ዓደኮ ቤርታ ዶንሂ ባይቁ ሃይቁኔ፤ ዩያሮ ዔያቶኮ ጌርሲንሂ ዓላዜሬና ዒታማሬና ቁኤሴ ማዔኔ፤ 3 ካኣቲ፡ ዳውቲ ዓኣሮኔ ዜርፆ ዔያታ ማዳንዳ ማዳጉዴያ ጉዴያ ዲማ ዲማ ፓቁኔ፤ ዩያ ዒ ማዳሂ ዓላዜሬ ዜርሂ ማዔ፡ ሳዶቁና ዒታማሬና ዜርሂ ማዔ ዓቢሚሌኬ ዒዛ ማኣዴምኬ። 4 ዓላዜሬ ዜርፆ ባኣካፓ ዲቢ ሱኡጌ ማዓ ዓሲ ጴዳም ዒታማሬ ዜርፆ ባኣካ ሱኡጌ ማዓ ዓሲ ዳኬሂረ ዓላዜሬ ዜርፆ ታጾ ላሆ ቤሲ ፓቁንቲኔ፤ ዒታማሬ ዜርፆ ጋዓንቲ ሳሊ ቤሲ

23:26 23:26 ላሚ. ዋማ 10:8። 23:32 23:32 ፓይ. ማፃ 3:5-9።

ፓቂንቴኔ። 5 ዓላዜሬና ዒታማሬና ዜርዖይዳፓ ጌኤዠ ማኣሮኮ ቢታንቶ ዓኣ ሱኡጌንታ ዖኦሲ ባኮ ማዳያኣ ዓኣያ ማዕሚሮ ማዳ ጊሽኪንቲ ዒንጊንታሢ ዒፃ ዓጊ ዲማሲሢናኬ። 6 ዒፃሢ ዔካኒ ቤርታዲ ዓላዜሬና ዒታማሬና ዜርዖ ምሊ ዓኣሢ ጌላኔ፤ ዬካፓ ለዊ ዓሲ ማዕ። ፃኣፖ ባኮ ፃኣፓ፤ ናትናዔሌ ናኣዚ፤ ሽማዒያ ዔያቶኮ ሱንዖ ፃኣፓኔ፤ ዒማና ካኣቲንታ ቢታንታ ዓኣ ደንዘንታ ቄኤሳሢ ሳዶቄንታ ዓቢያታሬ ናኣዚ ዓቤማሌኬንታ፤ ዬያጉዲ ሃሣ ቄኤሶና ለዊ ማኣሮ ዓሶናኮ ሱኡጋኣ ቢያ ዬያ ማርካ ማዒ ዛጋኔ።

- 7-18 ለማታሚ ዖይዶ ቤሲ ማዒ ዒፃሢ ዓጊ ፓቆና ማዳ ዓሳ ሃካፓ ለኣ ፓይዲንታ ጎይዖኬ፡-
- ቤርታሳዖ ዪሆያሪቤ ዓሶም ኬሰኬኔ፤
- ለምዓሳዖ ዪዳዒያ ዓሶም፡
- ሃይሣሳዖ ሃሪማ ዓሶም፡
- ዖይዳሳዖ ሴዖሪማ ዓሶም፡
- ደንጋሳዖ ማልኪያ ዓሶም፡
- ለሃሳዖ ሚያሚኔ ዓሶም፡
- ለንካሶ ሃቆፃ ዓሶም፡
- ሳላሶ ዓቢያ ዓሶም፡
- ታዘጳሶ ዒያሱ ዓሶም፡
- ታጳሶ ሽካኒያ ዓሶም፡
- ታጳ ፔታሶ ዔሊያሺቤ ዓሶም፡
- ታጳ ለምዓሶ ያቂማ ዓሶም፡
- ታጳ ሃይሣሶ ሁፖ ዓሶም፡
- ታጳ ዖይዳሶ ዬሹብዓቤ ዓሶም፡
- ታጳ ደንጋሶ ቢልጋ ዓሶም፡
- ታጳ ለሃሶ ዒማሬ ዓሶም፡
- ታጳ ለንካሶ ሄዚሬ ዓሶም፡
- ታጳ ሳላሶ ሃፕፃፃ ዓሶም፡
- ታጳ ታዘጳሶ ፔታህያ ዓሶም፡
- ለማታማሶይዳ ዪሄዘቄሌ ዓሶም፡
- ለማታሚ ፔታሶይዳ ያኪኔ ዓሶም፡
- ለማታሚ ለምዓሶይዳ ጋሙሌ ዓሶም፡
- ለማታሚ ሃይሣሶይዳ ዴሊያ ዓሶም፡
- ለማታሚ ዖይዳሶይዳ ማዓዚያ ዓሶም ኬሰኬኔ።።

19 ዬይ ዓሳ ናንጊና ናንጋ ጎዳ ማዕ። ዒሰራዔኤሌኮ ዖኦዛሢ ዔያቶኮ ቤርታ ዓዳሢ ዓኣሮኔ ዓይሢ ጎይዖና ጌኤዠ ማኣሪ ጌሊ ዲማ ዲማ ማዳ ማዳ ጎይዖ ያዲኬ።።

ሃንጎ ዓቴ ሌዊ ዓሶ ሱንፃ

20 ሌዊ ዘርዖኮ ሃንጎ ዓቴ ማኦር ዓሶ ሱኡጎኮ ሱንፃ ሃካፓ ደማ ፓይዲንታሢጉዴያኩ፡-

ሹባሌ ዓምራሜ ዘርሢኬ፡ ዩህዴያ ሹባሌ ዘርሢኬ፤ 21 ዩሺያ ሬሃቢያ ዘርሢኬ፤ 22 ሹሎሚቴ ዩፅሃሪ ዘርሢኬ፡ ያሃቴ ሹሎሚቴ ዘርሢኬ፤ 23 ዩሪያ፡ ዓማሪያ፡ ያሂዚዔሌንታ ዩቃምዓሚንታ ኩብርኦኔ ናኣቶኬ፤ ዔያቶኮ ሱንፃ ፃኣፒንቴሢ ሞሊ ሄሊ ሾይንቴ ጎይፆኩ።

24 ሚካ ዑዚዔኤሌ ዘርሢኬ፡ ሻሚሬ ሚካ ዘርሢኬ፤ 25 ዛካሪያሴ ሚካኮ ጌርሲ፡ ዩሺያ ዛሎና ዑዚዔኤሌ ዘርሢኬ፤ 26 ማሂሊንታ ሙሽንታ ያዕዚያንታ ሜራሪ ዘርሢኬ፤ 27 ያዕዚያኮ፡ ሸሃሜ፡ ዛኩራንታ ዒብሬ ጌይንታ ሃይሃ ዓቲንቄ ናይ ዓኣኔ። 28-29 ማህሊኮ ዓላዜሬና ቂሼ ጌይንታ ላምፆ ዓቲንቄ ናይ ዓኣኔ፤ ዓላዜሬኮ ፔቴታፆ ዓቲንቄ ናይ ባኣሴ፤ ቂሼኮ ጋዓንቴ ዩራህሜዔኤሌ ጌይንታ ፔቴ ዓቲንቄ ናይ ዓኣኔ። 30 ሙሽኮ ማሂሊ፡ ዔዴሬና ያሪምቴ ጌይንታ ሃይሃ ዓቲንቄ ናይ ዓኣኔ።

ዓካሪ ዬያታ ቢያ ሌዊ ዘርዖ ማዔ ማኦር ዓሶኩ።

31 ፔቴ ፔቴ ማኦርኮ ሱኡጎንታ ጌኤዛታኣ ዒሾንሢጉዲ ዬያኮ ቤርታ ዔያቶኮ ዒጊና፡ ዓኣርኔ ናኣታ ማዳ ጎይፆማ ፔኤኮ ማዶ ማዳኒ ዒፃሢ ዓጋኔ፤ ዒማና ካኣቲ ዳውቴንታ ሳዶቄንታ ዓቢሜሌኬንታ ቄኤሶንታ ሌዊ ዓሶንታኮ ማኦር ዓሶ ሱኡጋኣ ቢያ ማርካ ማዒ ዛጋንቴ ዳማሲ ዔር ባኮ ዔያታ ዓጋኔ።

25

ጌኤዠ ማኦራ ጎዳም ዓይናዳ ዓሶ

1 ካኣቲ፡ ዳውቴና ሌዊ ዓሶኮ ሱኡጎና ሚርጌ ሻሺ ዴንሢ ሞርቆ ጎኦሎንታ ፔቴ ሻሺ ዴንሢ ሞርቆ ጎኦሎንታ ዑኡቴቡላሢናኣ ዓይናዳ ዓይናዳ ያኦሲ ማላሢ ኬኤዛንዳጉዲ ዓሳኣፔና ሄማኔና ዩዲቱና ማኦራፓ ዓሲ ዶኦሪ ጌሄኔ፤ ዬያ ማዶ ማዳ ዓሶኮ ሱንፃ ሃካፓ ደማ ፓይዲንታሢ ጉዴያኩ፡-

2 ዛኩራ፡ ዮሴፔ፡ ኔታንያንታ ዓሳርዔኤሌ ጌይንታ ያይዶ ዓሳኣፔ ናኣቶኬ፤ ያኦሲ ማሊያ ኬኤዛሢ ዓሳኣፔ ዔያቶኮ ሱኡጌ ማዓዛ ካኣቲ ዓይሄ ሞዶማና ሞዶማና ዬያ ማዶ ዔያታ ማዳኔ።

3 ዩዲቱኔኮ ላሆ ዓቲንቆ ናኣታ፡ ጌዳሊያ፡ ዪሪ፡ ያሻያ፡ ሽምዒ፡ ሃሻቢያና ማቲትያ ጌይንታያኩ፤ ዔያታ ፔቴ ሻዠና ዴንሃ ጎኦሎ ሞርቄ ሞርቄ ዔያቶኮ ዓዳሢ ዔያቶኮ ሱኡጌ ማዔም ያኦሲ ዓያና

ዔያቶም ዒንጋ ዓይኑም ዋይዚሲ ዋይዚሲ ናንገና ናንጋ ጎዳ ዓይኑምና ቦንቺ ቦንቺ ጋላታኔ።

4 ሄሊሳዎ ሄማኔ ጎዎሢ ታጾ ያይዶ ዓቲንቄ ናይ ዓኣያ ማዓዛ። ዔያታ፡- ቡቂያ፡ ማታኒያ፡ ዑዚዔኤሌ፡ ሹቡዔኤሌ፡ ያሪሞቴ፡ ሃናኒያ፡ ሃናኒ፡ ዔሊዓታ፡ ጌዳልቲ፡ ሮማሞቲዔዜሬ፡ ዮሸቤቃሻ፡ ማሎቲ፡ ሆተሪና ማህዚዓቲንታኔ፤ 5 ካኣቲም ያኦሲ ማሊያ ኬኤዛ፡ ሄማኔም ዩንሢ ታጾ ያይዶ ዓቲንቄ ናኣቶንሢንታ ቃሲ ሃሣ ሃይሣ ዉዱር ናይያኣ ያኦሲ ዒንጌኔ፤ ዩያ ያኦሲ ማጴሢ ሄማኔ ጴጊዲ ቦንቺሳኒ ቤርታ ኬኤዜ ቃኣሎ ጎይያናኔ። 6 ዒዛኮ ዓቲንቄ ናኣታ ቢያ ጌኤዦ ማኣርይዳ ያኦሲ ካኣሽኪንታ ካኣዦ ዳሞባ ኩንሢንታኣና ዔያቶኮ ዓዴ ሱኡጌ ማዔም ዑኡቱቡላሢ ዋቻኔ፡ ጎኦሎዋ ዋርቃኔ፤ ዓሳኣፔንታ ዪዱቱንታ ሄማኔንታ ካኣቲ ቢታንቶ ዴማ ማዒ ዩያ ማጴ ማጴ።

7 ዩንሢ ላማታም ያይዶ ዓሶንሢ ቢያ ኮሺ ዔኤቢ ዔራያኔ፤ ዩያጉዲ ሃሣ ዔያቶኮ ዒጊናኣ ያኦሲም ዓይናድ ዓይኑም ዔራያ ማዓዛ ፓይዳ ዔያቶኮ ዋሊ ዑፃ ላምዎ ጴኤታና ሳሊታሚ ሳሊኔ። 8 ዔያቶኮ ማጴ ማጴ ዲማሳኒ ጴጌያኣ ማዎም ጋርቺ፡ ዔርዛሢምታቲያ ዔርያይዳ ዓኣሢም ያናኣ ፓቁዋዎ ዒፃ ዓጊንታኔ።

9 ዒፃሢ ቤርታሲ ዓሳኣፔ ዒጊናፓ ዮሴፔም ኬሰኬኔ፤ ዒዛንታ ዒዛኮ ናኣቶንታ ጌርሲንሢንታኮ ፓይዳ ዋሊ ዑፃ ታጾ ላምዎኔ፤ ላምዓሳ ጌዳሊያም ኬሰኬኔ፤ ዒዛንታ ዒዛኮ ጌርሲንሢንታ ናኣቶንታ ፓይዳ ዋሊ ዑፃ ታጾ ላምዎኔ። 10 ሃይሣሳ ዛኩሬም ኬሰኬኔ፤ ዒዛንታ ዒዛኮ ጌርሲንሢንታ ናኣቶንታ ፓይዳ ዋሊ ዋሊ ዑፃ ታጾ ላምዎኔ።

11 ያይዳሳ ዪፅሬም ኬሰኬኔ፤ ዒዛንታ ዒዛኮ ጌርሲንሢንታ ናኣቶንታ ፓይዳ ዋሊ ዑፃ ታጾ ላምዎኔ።

12 ደንጋሳ ኔታንያም ኬሰኬኔ፤ ዒዛንታ ዒዛኮ ጌርሲንሢንታ ናኣቶንታ ፓይዳ ዋሊ ዑፃ ታጾ ላምዎኔ፤

13 ላሃሳ ቡቂያም ኬሰኬኔ፤ ዒዛንታ ዒዛኮ ጌርሲንሢንታ ናኣቶንታ ፓይዳ ዋሊ ዑፃ ታጾ ላምዎኔ፤

14 ለንካሳ ዓሳርዔኤሌም ኬሰኬኔ፤ ዒዛንታ ዒዛኮ ጌርሲንሢንታ ናኣቶንታ ፓይዳ ዋሊ ዑፃ ታጾ ላምዎኔ፤

15 ሳላሳ ያሻዕያም ኬሰኬኔ፤ ዒዛንታ ዒዛኮ ጌርሲንሢንታ ናኣቶንታ ፓይዳ ዋሊ ዑፃ ታጾ ላምዎኔ።

16 ታዘጳሳ ማታኒያም ኬሰኬኔ፤ ዒዛንታ ዒዛኮ ጌርሲንሢንታ ናኣቶንታ ፓይዳ ዋሊ ዑፃ ታጾ ላምዎኔ፤

17 ታጳሳ ሺምዒም ኬሰኬኔ፤ ዒዛንታ ዒዛኮ ናኣቶንታ ፔርሲንሢታኮ ፓይዳ ዋሊ ዑፃ ታጳ ላምዖኬ።

18 ታጳ ፔታሳ ዓዛርዔኤሌም ኬሰኬኔ፤ ዒዛንታ ዒዛኮ ፔርሲንሢታኮ ናኣቶንታ ፓይዳ ዋሊ ዑፃ ታጳ ላምዖኬ።

19 ታጳ ላምዓሶ ሃሻቢያሜም ኬሰኬኔ፤ ዒዛንታ ዒዛኮ ፔርሲንሢታኮ ናኣቶንታ ፓይዳ ዋሊ ዑፃ ታጳ ላምዖኬ።

20 ታጳ ሃይሣሳ ሹባዔሌም ኬሰኬኔ፤ ዒዛንታ ዒዛኮ ፔርሲንሢታኮ ናኣቶንታ ፓይዳ ዋሊ ዑፃ ታጳ ላምዖኬ።

21 ታጳ ዖይዳሳ ማታትያም ኬሰኬኔ፤ ዒዛንታ ዒዛኮ ፔርሲንሢታኮ ናኣቶንታ ፓይዳ ዋሊ ዑፃ ታጳ ላምዖኬ።

22 ታጳ ደንጋሳ ያሪሞቴም ኬሰኬኔ፤ ዒዛንታ ዒዛኮ ፔርሲንሢታኮ ናኣቶንታ ፓይዳ ዋሊ ዑፃ ታጳ ላምዖኬ።

23 ታጳ ላሃሳ ሃናንም ኬሰኬኔ፤ ዒዛንታ ዒዛኮ ፔርሲንሢታኮ ናኣቶንታ ፓይዳ ዋሊ ዑፃ ታጳ ላምዖኬ።

24 ታጳ ላንካሳ የሽቤቃሽም ኬሰኬኔ፤ ዒዛንታ ዒዛኮ ፔርሲንሢታኮ ናኣቶንታ ፓይዳ ዋሊ ዑፃ ታጳ ላምዖኬ።

25 ታጳ ሳላሶ ሃናንም ኬሰኬኔ፤ ዒዛንታ ዒዛኮ ፔርሲንሢታኮ ናኣቶንታ ፓይዳ ዋሊ ዑፃ ታጳ ላምዖኬ።

26 ታጳ ታዘጰሶ ማሎቴም ኬሰኬኔ፤ ዒዛንታ ዒዛኮ ፔርሲንሢታኮ ናኣቶንታ ፓይዳ ዋሊ ዑፃ ታጳ ላምዖኬ።

27 ላማታማሶ ዔሊዓታም ኬሰኬኔ፤ ዒዛንታ ዒዛኮ ፔርሲንሢታኮ ናኣቶንታ ፓይዳ ዋሊ ዑፃ ታጳ ላምዖኬ።

28 ላማታሚ ፔታሶ ሆቴሬም ኬሰኬኔ፤ ዒዛንታ ዒዛኮ ፔርሲንሢታኮ ናኣቶንታ ፓይዳ ዋሊ ዑፃ ታጳ ላምዖኬ።

29 ላማታሚ ላምዓሳ ጌዴልቴም ኬሰኬኔ፤ ዒዛንታ ዒዛኮ ፔርሲንሢታኮ ናኣቶንታ ፓይዳ ዋሊ ዑፃ ታጳ ላምዖኬ።

30 ላማታሚ ሃይሣሶ ማህዚያቴም ኬሰኬኔ፤ ዒዛንታ ዒዛኮ ፔርሲንሢታኮ ናኣቶንታ ፓይዳ ዋሊ ዑፃ ታጳ ላምዖኬ።

31 ላማታሚ ዖይዳሳ ሮሚምቴዔዜሬም ኬሰኬኔ፤ ዒዛንታ ዒዛኮ ፔርሲንሢታኮ ናኣቶንታ ፓይዳ ዋሊ ዑፃ ታጳ ላምዖኬ።

26

ጌኤዡ ማእሮ ካፓ ዓሶ

1 ጌኤዡ ማእሮ ካፓያ ማዔ ለዊ ዓሶኮ ማዳ ዓርቁንቴሢ ሃካፓ ደማ ዓኣ ጎይዖኬ፤ ቆራሂ ቶኦኮኮ ዓሳኣፔ ማእሮፓ ቆኦሬ ናኣዚ፤ ሜሱ-ላሜኬ። 2 ዒዛኮ ላንካይ ዓቴንቄ ናይ ዓኣኔ፤ ዔያታ ዋሊ

ሄሊ ሄሊ ሾይንቴ ጎይዖና፡- ዛካሪያሴ፡ ዪዲዕዔኤሌ፡ ዛባድያ፡ ያትኒዔኤሌ፡³ ዔላኣሜ፡ ዩሆሃናንጎታ ዔልዩሆዔናዬ ጌይንጎታ።

4 ማሌ ሃሃ ሳሊ ዓቲንቄ ናይ ዒንጊ ያኦሲ ዓንጃ፡ ያቤድዔድኦሜ ጌይንጎታ ፔቴ ዓሲ ዓኣኔ፤ ዒዛ ናኣታ ዋሊ ሄሊ ሾይንቴ ጎይዖና፡- ሹማዒያ፡ ዩሆዛባዳ፡ ዮዓሄ፡ ሳካሬ፡ ናትናዔኤሌ፡⁵ ዓሚዔኤሌ፡ ዪሳኮኦሬና ፔዑሌታዬ ጌይንጎታያኩ።

6-7 ሃሃ ያቤድዔድኦሜኮ ናኣዚ ቶይዲ፡ ሹማዒያኮ ላሆ ዓቲንቄ ናይ ዓኣኔ፤ ዩንሢ፡- ያትኒ፡ ሬፓዔኤሌ፡ ያቤዳ፡ ዔልዛባዳ፡ ዔሊሁና ሳማክያናኩ፤ ዔያቶኮ ጴኤፒ ዔራቶ ዓኣሢሮ ዔያቶ ዓድ ማኣሮ ዓሶኮ ዔያታ ሱኡጎኩ።

8 ዓካሪ ዬያታ ቢያ ያቤድዔድኦሜ ዜርዖ ማዓዛ ዔያቶንጎታ ዔያቶኮ ዓቲንቆ ናኣቶንጎታ፤ ሃሃ ዔያቶኮ ዒጊና ማዶ ማዳኒ ጊዳ ዔራቶ ዓኣያኩ፤ ዒዛ ዜርዖ ዋሊ ዑፃ ላሂታሚ ላምዖኩ።

9 ማሱላሚኮ ማዶ ማዳኒ ዔራቶ ዓኣ ታጾ ሳሊ ዓቲንቄ ናይንጎታ ጌርሲንሢንጎታ ዓኣኔ።

10 ሜራሪ ቶኦካፓ ያይዶ ዓቲንቄ ናይ ዓኣ፡ ሆሳ ጌይንጎታ ዓሲ ዓኣኔ፤ ዬያ ናኣቶኮ ሱኡጎሢ ሹምሪኩ፤ ዒዚ ቶይዶ ናዖቴዋቴያ ዓዴ ዒዛ ሱኡጌ ማሄኔ፤ ዔያታ፡- ሹምሪ፡¹¹ ሂልቋያ፡ ዪባልያና ዛካሪያሴ ጎዖያኩ፤ ዬያ ሆሳኮ ማኣሮ ዓሶይዳፓ ጌኤዮ ማኣሮ ካፓያ ማዔዛንሢ ዋሊ ዑፃ ታጾ ሃይሃ ዓሲኩ።

12 ጌኤዮ ማኣሮ ካፓ ዓሳ ፔ ማኣሮ ዓሶ ሱኡጎኮ ዴማ ዴማ ማዒ ፓቁንቲ ፓቁንቲ ዔያታ ሃንጎ ሌቂ ዓሶጉዲ ጌኤዮ ማኣራ ማዶ ማዶ ማዳኔ።¹³ ዋዚጉዲ ዔያታ ሚርጌቴያ ፔቴ ፔቴ ማኣሮ ዓሳ ዋኖ ዛሎ ማርሾ ካሮ ካፓቴያ ዔራኒ፡ ጴጌ ማዔቴያ ጋርቺ ጎዑዋዖ ጉቤሢሃም ዒፃሢ ዓጋኔ፤¹⁴ ዓባ ኬሰካ ዛሎና ዓኣ ማርሾ ካሮ ካፒዖኮ ዒፃሢ ሴሌሚያም ኬሰኬኔ፤ ሄሊሳዖ ቢያ ዋዴና ኮሺ ዞሮ ዞራ ዒዛኮ ናኣዚ ዛካሪያሴም ኬዶ ዛሎና ዓኣ ማርሾ ካሮ ካፓንዳጉዲ ዒፃሢ ኬሰኬኔ፤¹⁵ ያቤድዔድኦሜ ደኦሎ ዛሎና ዓኣ ማርሾ ካሮ ካፓንዳጉዲ ዲማሲ ዔሮ ባካ ኬሰካዛ፡ ማሆ ጌሃ ማኣሮ ካፓንዳጉዲ ዒዛኮ ናኣቶም ዒፃሢ ኬሰኬኔ።¹⁶ ሹፒሜና ሆሳናም ዓባ ጌላ ዛሎና ዓኣ ማርሾ ካሮና ኬዶ ጎይዖ ዛሎና ዓኣ ሻሌኬቴ ጌይንጎታ ማርሾ ካሮ ካፓንዳጉዲ ዒፃሢ ዔያቶም ኬሰኬኔ፤ ዬይ ማርሾ ካሮ ካፒዖ ማዳ ዋሊ ሄሊ ሄሊ ፔ ዋዴና ዋዴና ፓቁንቲያኩ፤¹⁷ ዬያሮ ቢያ ኬሊ ዓባ ጌላ ዛሎና ላሆ፡ ኬዶ ዛሎና ያይዶ፡ ደኦሎ ዛሎናኣ ያይዶ ካፓ ዓሲ ዔቃኔ፤ ዬያጉዲ

26:5 26:5 2ኛው. 6:11፤ 1ዮሐሲ. ዓሃኬ 13:14።

ሃሣ ቢያ ኬላ ያይዶ ካፓ ዓሲ ሜሆ ጌሃ ማኣሮ ካፓንዳጉዲ ጎዶዛ ዔያቶይዳፓ ላምዓሢ ፔቲ ሜሆ ጌሃ ማኣሮ፣ ዓቲ ላምዶንሢ ሃሣ ባጎ ማኣሮ ካፓ። 18 ዓባ ጌላ ዛሎና ጎይዖ ሂሊሲ ኮሺንቴ ዓሳ ቡካ ቤዞ ኮይላ ያይዶ ካፓ ዓሲ ጌሃዛ፣ ዬኖ ቤዜሎ ካፓ ላምዶ ዓሲ ዓኣኔ። 19 ቆራሄና ሜራሪ ቶኦኮናም ማርሾ ካሮ ካፓንዳጉዲ ጊሸኪንቴሢ ያዲዲኬ።

ሃንጎ ሌዊ ዓሳ ጌኤዡ ማኣራ ማዳ ማዳ

20 ሌዊ ዓሳይዳፓ ዓኪያ ጎሥሢ ጌኤዡ ማኣሮኮ ሜሆ ጌሃ ማኣሮንታ ያኦሲም ዲማዳያ ማዔ ዒንጊንታ ባኮ ጌሃ ማኣሮኮዋ ሱኡጌኬ፤ 21 ጌርሾኔ ናኣታፓ ፔቲሢ ማዔ፣ ላዒዳኔ ፔኤኮ ናኣዚ ዩሂዔኤሌ ማኣሮ ዓሳንታ ዲማ ዲማ ማኣሮ ዓሳ ዒጊኖኮዋ ሱኡጌኬ፤ 22 ዩሂዔኤሌኮ ዓቲንቆ ናኣታ፡- ዜታሜና ጌርሲ ዒዮዔኤሌናኬ። ዬንሢ ጌኤዡ ማኣሮኮ ያኣፒ ዓርቆ ባኮንታ ሜሆ ጌሃ ማኣሮንታኮ ሱኡጎንሢ። 23 ዬይ ያዲ ማዓዛ ዓምራሜ፣ ዩፅሃራንታ ኬብሮኦንታ ዑዚዔኤሌንታ ዜርዖማኣ ዔያታ ማዳጎዳ ማዳ ዒንጊንቴ።

24 ሙሴ ናኣዚ ጌርሾኔ ቶኦኪ ማዔ ሸቡዔኤሌ ጌኤዡ ማኣሮ ሜሆ ጌሃ ማኣሮኮ ሱኡጎኮ ዑዮ ሱኡጋሢ። 25 ዒዚያ ጌርሾሜኮ ጌርሲ፣ ዔሊዔኤሪ ዛሎና ሸሎሚቲኮ ዑኬ ዒጊኒኬ፤ ዬይ ዔሊዔኤሪ ራሃቢያ፣ ራሃቢያ ዩሻዕያ፣ ዩሻዕያ ዮራሜ፣ ዮራሜ ዚክሪ፣ ዚክሪያ ሸሎሚቲ ሾዔኔ፤ 26 ሸሎሚቲንታ ዒዛኮ ዒጊኖንታ ካኣቲ ዳውቲንታ ዒዛ ማኣሮ ዓሳኮ ሱኡጎንታ፣ ጊንሣ ሃሣ ዒዛ ቶኦኮኮ ዲማ ዳማ ያሎ ዓሳ ሱኡጋ፣ ያኦሲም ዲማዳያ ማሂ ዒንጎ ባኮኮዋ ሱኡጌኬ፤ 27 ዬንሢ ሱኡጎንሢ ያሎ ዋዶና ዔያታ ዲዒ ዔካ ባኮይዳፓ ፓቂ ጌኤዡ ማኣራ ማዳንታንዳጉዲ ናንጊና ናንጋ ጎዳም ዲማሳኔ። 28 ሸሎሚቲና ዒዛኮ ዒጊኖና ጌኤዡ ማኣሮ ማዳም ዲማዳ ባኮ ቢያ፣ ያኦሲ ማሊዖ ኬኤዛሢ ሳሙዔኤሌንታ ካኣቲ ሳኦዶኦሌንታ ኔሪ ናኣዚ ዓቤኔሪና ያራና ናኣዚ ዒዮዓቤ ዒንጌ ባኮንታኮ ሱኡጌ ማዔ።

ሃሣ ዓቲ ሌዊ ዓሳ ማዳ ማዳ

29 ዩፅሃራ ዜርዖ ባኣካፓ ኬናንያንታ ዒዛኮ ናኣቶንታ ጌኤዡ ማኣራቲዋንቴ ዙላ ዓሲ ዋይሥሢና ዒሰራዔኤሌ ዳሮ ባኣካ ኬሰካ ዓይጎ ባኣዚ ማዔቲያ ዔያታ ዛጊ ጌሰታኒ ሱኡጌ ማዒ ጌሢንቴ።

30 ኬብሮኦኔና ሃሻቢያ ዜርዖናይዳፓ ዛላ፤ ዬያጉዲ ሃሣ ደዲ ዒርቲያ ማዔ፣ ፔቲ ሺያና ላንካይ ያኤታ ማዓ ሃሻቢያንታ ዒጊኖንታ ዮርዳኖሴ ዋሮኮ ዓባ ኬሰካ ዛሎና ዓኣ ዒሰራዔኤሌ ዳሮኮ ያኦሲ

ማደንታ ካኣትም ማደንታ ማደኮቦ ቢያ ሱኡጌኬ። 31 ኩብርኦኔ ዜርዖኮ ሸይንቶ ሃይሳ ፃኣፒንቲ ዓኣ ጎይዖና ሱኡጋሢ ዪሪያኬ፤ ዳውቲ ካኣታደንቲ ዖይዲታማሳ ሌዖና ሃይሶ ፃኣፒ ዓርቆ ቤዛ ዛጎንቲ ጌሌዓዳይዳ ያዕዜሬ ጌይንታ ቤዛ ናንጋ ማኣር ዓሶይዳፓ ዔርቲያ ማዓ ፖኦሊሴ ጴዳኔ፤ 32 ዒማና ካኣት ዳውቲ ዬንሢ ዒዛኮ ዒጊኖንሢዳፓ ዔርቲያ ማዓ ላምዖ ሺያና ላንካይ ፃኤታ ዓሲ ሱኡጌ ማሂ ዶኦሬኔ፤ ዬያ ሌሊቱዋንቲ ዳውቲ ዮርዳኖሴ ዋርኮ ዓባ ኬሰካ ዛሎና ጌይዖ ሮኦኬሌሌንታ ጋኣዳንታ ማናኣሴ ዓጮንታይዳፓ ያኦሲ ማደና ዓጮ ዋይሢያናኮ ቢያ ሱኡጌ ዔያቶ ማሂ ጌሣኔ።

27

ዳውቲ ዖሎ ዓሶኮ ሱኡጎ ዶኦሬሢ

1 ሃካፓ ዴማ ዓኣዘንሢ ዒሰራዔኤሌ ዓሶኮ ማኣር ዓሶ ሱኡጎንታ ዲማ ዲማ ቶኦኮ ዋይሢ ዓሶንታ፤ ዬያጉዲ ሃሃ ካኣቲኮ ማደ ማደ ቢታንታ ዓኣ ዓሶኮ ሱንፃ ዋሊ ሄሊ ፃኣፒንቲኔ፤ ዬይያ፡- ሌዖ ጋራ ዓኣ ፔቲ ፔቲ ዓጊኖይዳ ላማታሚ ዖይዶ ሺያ ዓሲ ዋሊ ዑፃ ማዒ ማደንዳጉዲ ፓቂንቲያ ማዓዛ ዬያ ዲማ ዲማ ፓቂንቲ ዓሶኮ ሱኡጌ ዓኣኔ።

2-15 ፔቲ ፔቲ ዓጊኖይዳ ዬያ ዋሊ ዑፃ ማሆና ዓሶኮ ሱኡጌ ማዔ ዓሶኮ ሱንፃ ሃካፓ ዴማ ፓይዲንቲሢ ጎይዖኬ፤ ቤርታሳ ዓጊኖይዳ ቤርታሲ ፓቂንቲ ፖኦሊሶኮ ሱኡጌ ማዔሢ ዛብዲዔኤሌ ናኣዚ ያሾብዓሜኬ፤ ዒዛ ዴማ ማዔም ዒ ዓይሢ ዋይሢ ፖኦሊሳ ላማታሚ ዖይዶ ሺያኬ፤ ዒዚያ ዪሁዳ ዒጊኖ ዛላፓ ማዔ ፓርሴ ቶኦኪኬ።

ላምዓሳ ዓጊኖና ላምዓሲ ፓቂንቲ ፖኦሊሶኮ ሱኡጋሢ ዓሆሄ ዓሢ ደዳዬኬ፤ ዒዛ ዴማ ማዔም ዒ ዓይሢ ዋይሢ ፖኦሊሳ ላማታሚ ዖይዶ ሺያኬ።

ዒዛኮ ዴማ ማዒ ዓይሢሢ ሚቅሎቲ ጎሆሢኬ። ሃይሣሳ ዓጊኖና ሃይሣሲ ፓቂንቲ ፖኦሊሶኮ ሱኡጋሢ፡- ቁኤሳሢ፤ ዮዳሄ ናኣዚ ቤናያኬ፤ ዒዛ ዴማ ማዔም ዒ ዓይሢ ዋይሢ ፖኦሊሳ ላማታሚ ዖይዶ ሺያኬ፤ ዬይ ቤናያ ሃይሢታሚ ዖሎና ዔርቲ ፖኦሊሶኮ ዑፃ ዔርቲያ ማዔ ሱኡጌ ማዔያኬ። ዒማና ዒዛኮ ናኣዚ ዒዛኮ ዴማ ማዒ ዓይሢ።

ዖይዳሳ ዓጊኖና ዖይዳሶ ፓቂንቲ ፖኦሊሶኮ ሱኡጋሢ፡- ዒዮዓቤ ጌርሲ ዓሳሄሌኬ። ዬካፓ ዒዛ ቤዛይዳ ዒዛኮ ናኣዚ ዜባድያ ዬያ ፖኦሊሶኮ ሱኡጋሢ ማዔኔ፤ ዒዛ ዴማ ማዔም ዒ ዓይሢ ፖኦሊሳ ላማታሚ ዖይዶ ሺያኬ።

ደንጋሳ ዓጊኖና ደንጋሶ ፓቂንቴ ፓኦሊሶኮ ሱኡጋሢ፡- ዪፅሃሬ ዓሢ ሽምሁቴኬ፤ ዒዛ ዴማ ማዔም ዒ ዓይሣ ፖኦሊሳ ላማታሚ ያይዶ ሺያኬ።

ላሃሳ ዓጊኖና ላሃሶ ፓቂንቴ ፖኦሊሶኮ ሱኡጋሢ ቴቆዓ ዓሢ ዒቄሽ ናኣዚ ዒራኬ፤ ዒዛ ዴማ ማዔም ዒ ዓይሣ ፖኦሊሳ ላማታሚ ያይዶ ሺያኬ።

ላንካሳ ዓጊኖና ላንካሶ ፓቂንቴ ፖኦሊሶኮ ሱኡጋሢ፡- ዔፕሬኤማ ፃጳፓ ፔሎ ዓሢ፤ ሄሌፃኬ፤ ዒዛ ዴማ ማዔም ዒ ዓይሣ ፖኦሊሳ ላማታሚ ያይዶ ሺያኬ።

ሳላሳ ዓጊኖና ሳላሶ ፓቂንቴ ፖኦሊሶኮ ሱኡጋሢ፡- ሁሻ ዓሢ፤ ሲቤካዬኬ፤ ዒዚያ ዪሁዳ ፃጳኮ ዛራ ዜርፃፓኬ፤ ዒዛ ዴማ ማዔም ዒ ዓይሣ ፖኦሊሳ ላማታሚ ያይዶ ሺያኬ።

ታዞጳሳ ዓጊኖና ታዞጳሶ ፓቂንቴ ፖኦሊሶኮ ሱኡጋሢ፡- ዓናቶቴ ዓሢ ዓቤዔዜሬኬ፤ ዒዛ ዴማ ማዔም ዒ ዓይሣ ፖኦሊሳ ላማታሚ ያይዶ ሺያኬ።

ታጳሳ ዓጊኖና ታጳሶ ፓቂንቴ ፖኦሊሶኮ ሱኡጋሢ፡- ዛራ ፃጳፓ ኔፆፓ ዓሢ ማሂራዬኬ፤ ዒዛ ዴማ ማዔም ዒ ዓይሣ ፖኦሊሳ ላማታሚ ያይዶ ሺያኬ።

ታጳ ፔታሳ ዓጊኖና ታጳ ፔታሶ ፓቂንቴ ፖኦሊሶኮ ሱኡጋሢ፡- ዔፕሬኤማ ፃጳ ዓጮኮ ፒርቶኔ ዓጮ ሾይንቴ፤ ቤናያኬ፤ ዒዛ ዴማ ማዔም ዒ ዓይሣ ፖኦሊሳ ላማታሚ ያይዶ ሺያኬ።

ታጳ ላምዓሳ ዓጊኖና ታጳ ላምዓሶ ፓቂንቴ ፖኦሊሶኮ ሱኡጋሢ፡- ያትኒዔኤሌ ቶኦኪ ማዔ ኔፆፓ ዓሢ፤ ሄልዳዬኬ፤ ዒዛ ዴማ ማዔ ዒ ዓይሣ ፖኦሊሳ ላማታሚ ያይዶ ሺያኬ።

ዳውቴ ዒሰራዔኤሌ ዓሶ ፃጳ ሱኡጎ ዶኡሬሢ

16-22 ዒሰራዔኤሌ ዓሶ ዋይሣ ሱኡጎ ሱንፃ ሃይካፓ ዴማ ዋሊ ጊንፆ ፓይዲንታ ጎይፆጉዲኬ፡-

ሮኦቤኤሌ ፃጳ ዋይሣሢ፡- ዚክሪ ናኣዚ ዔሊዔዜሬኬ፤

ሲሞኦኔ ፃጳ፡- ማዕካ ናኣዚ ሺፓፂያ፤

ሌዊ ፃጳ፡- ቄሙዔሌ ናኣዚ ሃሻቢያ፤

ዓኣሮኔ ፃጳ፡- ሳዶቄ፤

ዪሁዳ ፃጳ፡- ካኦቴ፤ ዳውቴ ጌርሲንሢፓ ፔቴሢ ማዔ ዔሊሁ፤

ዪሳኮኦሪ ፃጳ፡- ሚካዔኤሌ ናኣዚ ያሞሪ፤

ዛብሎኦኔ ፃጳ፡- ዓዲዩ ናኣዚ ዩሽማዕያ፤

ኒፕታኣሌኤማ ፃጳ፡- ዓዝሪዔሌ ናኣዚ ያሪሞቴ፤

ዔፕሬኤማ ፃጳ፡- ዓዛዝያ ናኣዚ ሆሴዔ፤

ዓባ ጌላ ዛሎና ዓሳ ሚናኣሴ ፃጸ፡- ፔዳያ ናኣዚ ዒዮዔሌ፥
ዓባ ኬሰካ ዛሎና ዓሳ ሚናኣሴ ፃጸ፡- ዛካሪያሴ ናኣዚ ዩዶ፥
ቢኢኒያሜ ፃጸ፡- ዓቤኔሬ ናኣዚ ያዕሰዔኤሌ፥
ዳኣኔ ፃጸ፡- ዪርሃሜ ናኣዚ ዓዛርዔሌ ወይሃያ ማዔኔ።

23 ናንገና ናንጋ ጎዳ፡- «ታኣኒ ዒሰራዔኤሌ ዴር ጫሪንጮ
ዡኦጋሢጉዲ ሚርገሻንዳኔ» ጌዒ ኬኤዜ ሃጊ ማዓንዳ ዋዘ
ቋኣሎጉዲ ካኣቲ፥ ዳውቲ ሌዓ ለማታሚ ማዔያና ዩካፓ ዴማ ማዔ
ዓሶ ፓይዳ ዋዶና ዋላ ፓይዲባኣሴ፤ 24 ጳሩያ ናኣዚ፥ ዒዮዓቤ
ዴር ፓይዲ ጋፒሱዋየ ጎይፃ ሃሼኔ፤ ያኦሲ ዩያ ፓይዲፆር ዳጋዲ
ዒሰራዔኤሌ ዴርይዳ ሃይቢ ሄሊሴሢር ዩይ ፓይዳ ካኣቲ ዳውቲ
ሃይሳ ፃኣፒንታ ማዘጋባ ፃኣፒንቲባኣሴ።

ካኣቲሞ ማኣራ ዓሳ ማሆ ዛጊ ወይሃ ዓሶ

25-31 ካኣቲሞ ማኣራይዳ ዓሳ ማሆ ዛጊ ወይሃያ ማዔ ዓሶኮ
ሱንፃ ዋሊ ገንፆ ሃካፓ ዴማ ዓሳ ጎይያኮ፡-
ካኣቲሞ ማኣራይዳ ማሆ ጌሃ ማኣራኮ ሱኡጋሢ ዒዲዔኤሌ ናኣዚ
ዓዘማዌቲኬ፤
ካታሞይዳ፥ ካታሞኮ ሱሎይዳ፥ ዲማ ዲማ ጉርዶይዳ፥ ዋርዲዮ
ቤዘይዳ ዓሳ ካኣቲኮ ማሆ ጌሃ ማኣራ ሱኡጋሢ፡- ዑዚያ
ናኣዚ ዮናታኣኔኬ፤

ጎዡ ጎሽካ ዓሶ ሱኡጋሢ፡- ካሉቤ ናኣዚ ዔዘሪኬ፤
ወይዮ ጎዡ ሱኡጋሢ፡- ራማይዳ ሾይንቲ፥ ሺምዒኬ፤
ወይዮ ዑዡ ጌሃ ማኣራ ሱኡጋሢ፡- ሹፓሜይዳ ሾይንቲ ዛብዲኬ፤
ደኣሎ ዛሎ ጌሜርይዳ ዓሳ ሪሚቶንታ ቦኦሶ ሚያንታ ሱኡጌ ማዒ
ዛጋሢ ጌዴሬይዳ ሾይንቲ ባዓልሃናኔኬ፤
ሪሚቶ ዛይቶ ጌሃ ማኣራ ሱኡጌ ማዒ ዛጋሢ፡- ዒዮዓሴኬ፤
ሳኣሮኦኔ ቦኦሎይዳ ዓሳ ባኣቶ ሱኡጌ ማዒ ዛጋሢ፡- ሳኣሮኦኔይዳ
ሾይንቲ ሺፅሪዩኬ፤
ደኣጮይዳ ዓሳ ባኣቶ ሱኡጌ ማዒ ዛጋሢ፡- ዓድላዬ ናኣዚ ሻፓፃኬ፤
ሱኡጌ ማዒ ጋኣላሢ ዛጋሢ፡- ዒሰማዔኤሌይዳ ሾይንቲ ያቢሌኬ፤
ሱኡጌ ማዒ ሃር ዛጋሢ፡- ሜርኖቲይዳ ሾይንቲ ዩህዲያኬ፤
ማራቶና ዋኣሮና ሱኡጌ ማዒ ዛጋሢ፡- ሃግራ ዓሢ ያዚዜኬ።

ዳውቲ ዞራ ዓሶ

32 ካኣቲ ዳውቲኮ ዓቤ፥ ዮናታኣኔ ዞርና ጨንጫ ሃሃ ዔራ ዓሲኬ፤
ዒዛና ሃኪሞኔ ናኣዚ ዪሂዔኤሌና ካኣቲኮ ናኣቶ ዔርዛዞንሢኬ፤

27:23 27:23 ማዢ. ማፃ 15:5፤ 22:17፤ 26:4። 27:24 27:24 2ሳሙ.
24:1-15፤ 1ያሕሲ. ዓሃኬ 21:1-14።

33 ዓኪያፔሌ ካኣቲ ዘራ ደንዛሢ ማዓዛ ዓርካይዳ ሾይንቴ፥ ሁሻዬ ካኣቲኩ ለጌኬ፤ 34 ዓኪያፔሌ ሃይቄሰካፓ ዓቢያታሬና ቤናያ ናኣዚ፥ ዪሆያዳዔና ካኣቲ ዘራዘንሢ ማዔኔ፤ ዒዮዓቤ ካኣቲኩ ያሎ ዓሶ ዓይሣ ሱኡጋሢ ማዔኔ።

28

ዳውቴ ጌኤዠ ማኣሮ ማዠኒ ማሌሢ

1 ካኣቲ ዳውቴ ዒሰራዔኤሌ ዓሶኮ ቢታ ዓቱዋዎ ዬሩሳላሜ ሙኪ ቡካንዳጉዲ ዔኤሊሢ ዳኤሢሮ ፔቴ ፔቴ ፃጸኮ ሱኡጋ፥ ዓጮይዳ ማደ ማደ ቢቶ ዓሳ፥ ዲማ ዲማ ቶኦኮኮ ሱኡጋ፥ ካኣቲንታ ዒዛኮ ዓቲንቆ ናኣቶንታኮ ዓኣ ባኮና ባኣቶዋ ሱኡጋ ማዒ ዘገ ዓሳ፤ ዬያጉዲ ሃሣ ካኣቱዋ ማኣሮኮ ደንዛ፥ ደዲ ማዒ ያሎና ዔርቴ ዓሳ ጉቤ ሙኪ ቡኬኔ።

2 ዓሳ ቢያ ቡኪንቴሰካፓ ዳውቴ ዔቃዎ፡- «ዒንሢ ሃይታ ዒጊኖንታ ታ ዓጮ ዓሳ! ሂንዳ ዋይዙዋቴ፤ ናንጊና ናንጋ ጎዳኮ ጫኣቁዋ ሳኣፃና ጌሦንዳ ቤሰንታ ኑ ያኦዛሢኮ ቶኪ ሄርቃንዳ ማኣሪያ ማዠኒ ማዠንዳ ጎይዎ ታኣኒ ገኢጊሺ ማሌኔ፤ 3 ጋዓንቴ ያልዚና ሚርጌ ሱጉሢ ታ ላኦሊሢሮ ታኣኒ ዒዛኮ ጌኤዠ ማኣሮ ማዠንዳጉዲ ያኦሲ ኮዒባኣሴ፤ 4 ናንጊና ናንጋ ጎዳ ማዔ ዒሰራዔኤሌኮ ያኦዛሢ ዪሁዳ ፃጸ፥ ዒሰራዔኤሌ ዓሶይዳ ሱኡጋ ማሢ ደኦሬኔ፤ ሃሣ ዪሁዳ ፃጸፓ ታ ማኣሮ ዓሶ፥ ታ ማኣሮ ዓሶይዳፓ ታና ዒሰራዔኤሌ ዓሶኮ ካኣቲ ማሢ ደኦራዎ ታ ዜርፃ ካኣቶ ማዒ ዋይሣንዳሢ ታኣም ዒ ጫኣቄኔ። 5 ዬያ ሌሊቱዋንቴ ዒ ታኣም ሚርጌ ዓቲንቄ ናይ ዒንጌኔ፤ ዔያቶ ባኣካፓ ካኣቱዋ ዓልጋ ዳዒ ዒሰራዔኤሌይዳ ካኣታዳንዳጉዲ ታ ናኣዚ፥ ሱሎዋኔ ደኦሬኔ።

6 «ቃሲ ሃሣ ናንጊና ናንጋ ጎዳ ታኣም ኬኤዛዎ፡- ታኣም ጌኤዠ ማኣሮ ማዠንዳሢ ኔ ናኣዚ ሱሎዋኔኬ፤ ታ ዒዛ ታኣኮ ናይ ማሃንዳኔ፤ ታኣ ዒዛኮ ዓደ ማዓንዳኔ፤ 7 ዒዚ ሃሢ ማዳ ጎይዎ ቢያ ዋዴ ታ ዋጎና ታኣኮ ዓይሢዎ ዛገ ማዲ ኩንሣያ ማዔቴ ዒዛኮ ካኣቱዋ ናንጊና ታ ዒዛም ደዲሻንዳኔ» ጌዔኔ።

8 «ሃሢያ ታ ዓሲዮቴ! ያኦሲ ዋይዛንቴ፤ ያኦሲ ደኦሬ ዒሰራዔኤሌ ዓሳኣ ዘጋንቴ ናንጊና ናንጋ ጎዳ ማዔ ኑ ያኦዛሢ ኑና ዓይሢ ባኮ ቢያ ዛገ ማዲ ዒንሢ ኩንሣንዳጉዲ ታ ዒንሢ ሺኢቃኔ፤ ዬያ ዒንሢ ማዕቴ ሃኖ ኩዠ ዓጮሎ ናንጊና ዒንሢ ዓጪ ማሃንዳኔ፤ ሃሣ ገንፃፓ ሙካ ሾይንቶማኣ ዒንሢ ዳካልሳኒ ዳንዳዓኔ» ጌዔኔ።

28:7 28:7 2ኛው. 7:1-6፤ 1ያሕሲ. ዓሃኬ 17:1-14።

9 ይካገ ደውቴ ሴሎሞን ኮራ፡- «ታ ናዓሢያ! ያሱሲ ዓሳ ከ ዓይኔ በያ ዛጋያ፡ ማሊያዋ በያ ዓራሢሮ ኔ ዓደ ያካሢሢ ዓራሬ፤ ዓዚ ኦኦኮ ማሊያና ኦ ኮዓ ባኮ በያ ዓራኔ፤ ዩያሮ ኔ ጉቤ ዓናገ ኮሺ ማሊሢና ዓዚሞ ማዳንዳጉዲ ታ ኔኤም ጋዓኔ፤ ዓዚ ኔ ኮዓያ ማዓቴ ኔ ዓዚ ዴንቃንዳኔ፤ ጋዓንቴ ዓዚ ኔ ሃሼቴ ዓዚያ ኔና ናንገና ሃሻንዳኔ።
 10 ዓዚሞ ኔ ጌኤኸ ማኣሮ ማኸንዳጉዲ ናንገና ናንጋ ጎዳ ኔና ደኦሪሢ ዋሊፖ፤ ደዲ ጫርቂ ዓናገ ማዳ» ጌዓኔ።

11 ሄሊሳያ ሃሢ ደውቴ ሴሎሞንም ጌኤኸ ማኣሮኮ ማሆ ጌሃ ማኣሮ፡ ዋሊ ዑፃ ዑፃ ማኸና ኩሶ ማኣሮና ጋሮ ቆልዖንታ፤ ዩያጉዲ ሃሢ ጎሞ ጌኤኸ፡ ዑሃ ዓኣዳ ጌኤኸ ማኣሮ ማኸንዳ ጎይያ ኬኤዚ ዒንጌኔ፤ 12 ዩያ ሌሊቱዋንቴ ጌኤኸ ማኣሮኮ ዓሳ ቡከንታንዳ ጸኦኮንታ ኮይሳ ዓኣ ቆልዖንታ ጌኤኸ ማኣሮ ማሆንታ ናንገና ናንጋ ጎዳም ዒንገንታ ባኮ ጌሃ ማኣሮ በያ ዓዚ ዋማይዲ ማኸን ማሌቲያ ዓኣ ማሊያዋ ኬኤዚ ዒንጌኔ። 13 ዩያጉዲ ሃሢ ደውቴ ቄኤሶና ሌዊ ዓሳና ማዳንዳ ባኮ፡ ጌኤኸ ማኣሮይዳ ዓይታ ማዳንዳ ማዳና ያሱሲ ካኣኸ ማዳም ማዓ ማሆ ኮሺ ዓርቆንደ ጎይያ ማሊያዋ ሴሎሞንም ኬኤዚኔ። 14 ደማ ደማ ማዳም ማዓ ማሆ ኮሺሢም ማዓንዳጉዲ ቢሮ ዓንጎንታ ዋርቆንታኮ ሚርጉማ ዴኤሡሞ ዔሮ ባኮና ዋማዲ ማዓኒ ኮይሳቴ ኬኤዚኔ፤ 15 ፔቴ ፔቴ ፖፖ ጌሃ ሻሮም ማዓ ዋርቆንታ ፖፖ ጌሃ ሻሮም ማዓ ቢሮ ዓንጎንታ ዴኤሡሞ ዔሮ ባኮና ዋማዲ ማዓኒ ኮይሳቴ ኬኤዚኔ። 16 ቢሮ ዓንጎና ኮሺንታ ሎኦኸ ያይቶም፡ ያሱሲም ዒንገንታ ደማዳ ካሃ ጌሃ ዋርቆ ጋባደንታ፤ 17 ሃይሃ ኬኤሎ ሲልጳሢንታ፡ ዔቶ ሳኣኖንታ ጉንጎላሢያኦ ኮሻኒ ዴኤሡሞ ዔሮ ባኮና ዋማ ጉዴያ ቢራ ዓንገና ዋርቄና ኮይሳቴያ ኬኤዚኔ፤ 18 ዩያጉዲ ዑንጃ ጩቢሻ ቤዘንታ ፔኦኮ ጋኣዞ ናንገና ናንጋ ጎዳ ጫኣቁሞ ሳኣፂኖኮ ዑፃ ፒሺ ከሩቤላ ዴዓ ሳርጌሎ ያይቶ ኮሺንታሢም ዋማጉዴ ጌኤሺ ዋርቄ ኮይሳቴያ ዓኣ ማሊያ ኬኤዚኔ፤ 19 ካኣቲ ደውቴ ቃሲ ኬኤዛዖ፡- «ዩይ በያ ናንገና ናንጋ ጎዳ ታ ዓዚኮ ጌኤኸ ማኣሮ ዋማይዲ ማኸንዳቴያ ዳዌ ባኮታንቴ ታኣኒ ያኣፔሢኤ» ጌዓኔ።

20 ጋፒንያይዳ ካኣቲ፡ ደውቴ ናኣዚ ሴሎሞንም፡- «ዓካሪ ዓይኔ ኩሙሢ ማዓ፤ ደዴ፤ ማዳዋ ዑኬና ዓርቄ፤ ዓይጎ ባኣዚያ ኔና ቃዘገ፤ ታኣኒ ዓዚሞ ማዳ፡ ናንገና ናንጋ ጎዳ ማዓ ታ ያካሢሢ ኔኤና ዋላከ፤ ጌኤኸ ማኣሮይዳ ኔ ማዳ ማዳ ማዳ ኔ ጋፒጎንዳያ ሄላንዳኣና ዒ ኔኤገ ደማዳዓከ፤ ሃሢ ሃሻዓከ፤ ፔቴታፖ ኔና ዒ ኬኤራዓከ፤ 21 ጌኤኸ ማኣሮ ጋሮይዳ ዓኣ ማዳ ማዳ ኩንሃንዳጉዲ ቄኤሶና ሌዊ ዓሳና ዓይሢንቴኔ፤ ሃሢ ደማ ደማ ማዳ ዳንዳዓ ዔራቶ

ዓኣ ዓሳኣ ኔና ማኣዳኒ ገኢጌኔ፤ ዳርና ዔያቶኮ ሱኡጋኣ ቢያ ኔኤም ዓይሢንታንዳኔ» ጌዔኔ።

29

ጌኤዠ ማኣሮ ማዠም ዲማ ዲማ ዒንገንጎቴ ባኮ

1 ዩካፓ ካኣቲ፥ ዳውቴ ቡኪንጎቴ ዳርም ጉቤ፡- «ያሕሲ ዶኦሬ ታኣኮ ናዓሢ ሴሎሞን ሃገ ዴጌ፤ ሃሣ ማዲያ ዛገባኣያኮ፤ ሃይ ማዠገንታ ማኣራ፥ ካኣቲሞ ማኣሪቴሞንጎቴ ናንገና ናንጋ ጎዳ ኑ ያኦዛሢ ካኣሽኪንታ ጌኤሽ ማኣሪኮ፤ ሃይ ማዲንታንዳ ባካ ኮሽ ዴኤፒኮ፤ 2 ታኣኒ ታ ዳንዳዔሢጉዳያ ጌኤዠ ማኣሮ ማዠም ኮይሳ ባኮ ቢያ ገኢገሽኔ፤ ዩይያ፡- ዋርቆና ማዠ ባኮም ዋርቁ፥ ቢሮ ዓንጎና ማዠ ባኮም ቢራ ዓንገ፥ ሞኦና ዓንጎና ማዲ ባኮም ሞኦና ዓንገ፥ ማሌ ዓንጎና ማዲ ባኮም ማሌ ዓንገ፥ ማያና ማዠንደሢም ማያ፤ ዩያጉዲ ሃሣ ማይሊ ኬልቆንዶ ማሪገዴ፥ ኬልቆደኔንታ ዲማ ዲማ ማዠጸ ሹጮንታ ማርጌ ዒብኔ ቤሬዴ ጌይንታ ሹጮዋታ ገኢገሽኔ።

3 ሃያ ታ ገኢገሽ ባኮይዳፓ ቢያ ዑሣ ያሕሲኮ ጌኤዠ ማኣሮም ታኣኮ ዓኣ ዴኤፖ ናሹሞፓ ዔቆያና ታ ባኮይዳፓ ማርጌ ቢራንታ ዋርቁንታ ታ ዒንገኔ፤ 4 ዩይያ፡- ጌኤታ ሺያ ኪሎ ማዓ ያፕሬ ዋርቁንታ ያይዲታሚ ሺያ ኪሎ ማዓ ጌኤሽ ቢራ፤ ጌኤዠ ማኣሮኮ ኮጮ ኬልቆ ማዠ ሹጮ ማዠጸሳ፤ 5 ሃኣማ ማዲ ማዲም ማዓ ባኣዚ ታ ዒንገኔ፤ ዓካሪ ሃንዳ ዒንሢዳፓ ማሊሢና ናሽኪ ናንገና ናንጋ ጎዳሢም ዒንጋይ ያናዳይ?» ጌዔኔ።

6 ዩካፓ ዲማ ዲማ ቶኦኮና ፃጶናኮ ሱኡጋ፥ ሺዮና ጌኤቶ ፖኦሊሶ ዓይሣ ዓሳ፥ ማዲ ማዲ ቢታንታ ዓኣ ዓሳ ናሹሞና ዒንጎ ባኣዚ ዒንገኔ። 7 ዩያ ዔያታ ዒንገሢሢ፡- ጌኤታና ላንካይታሚ ሺያ ኪሎፓ ባሻ ዋርቁ፥ ሃይሣ ጌኤታና ያይዲታሚ ሺያ ኪሎፓ ባሻ ቢራ ዓንገ፥ ላሆ ጌኤታና ላማታሚ ሺያ ኪሎ ማዓ ሞኦና ዓንገንታ ሃይሣ ማሎኔና ያይዶ ጌኤታ ሺያ ኪሎፓ ባሻ ዓንገ፤ 8 ማዠጸ ሹጮ ዓኣ ዓሳኣ ቢያ ጌኤዠ ማኣሮኮ ማሆ ጌሣ ማኣሮይዳ ጌልዚ ጌሣንዳጉዲ ለዋ ዓሢ ጌርሾኔ ቶኦኪ ማዔ ዩሃዔኤሌም ዒንገኔ። 9 ዳራ ፔ ቶኦኪና ናሽኪ ጉቤ ዒናፓ ናንገና ናንጋ ጎዳም ዒንገኔ፤ ማርጌ ባኣዚ ዒንገንጎቴሢ ዳራ ኮሽ ዋዛዴኔ፤ ካኣቲ ዳውቴያ ዑሣ ዓኣዴ ዋዛዴኔ።

ዳውቴ ናንገና ናንጋ ጎዳ ጋላቲ ሺኢቆ ሺኢጲዖ

29:2 29:2 1ያሕሲ. ዓሃኬ 22:5።

10 ዳውቴ ዒማና ዬያ ዓሶኮ ቤርታ፡- «ኑኡኮ ቤርታኣ ዓዳሢ ዒሰራዔኤሌኮ ያሱሲ ማዔ ናንገና ናንጋ ጎዳሢያ! ናኣናና ጋላቲጎቴያ ማዔ፤ 11 ያሱሲያ፤ ጨሪጎጮና ሳዖናይዳ ዓኣሢ ቢያ ኔኤሮኬ፤ ኔኤኒ ቢያገ ባሼ ዳኤፒ ዋልቆና ዓኣያኬ፤ ቦንቸና ሚዛጰሞና ዲቃሢ ሄርሺሲሢኣ ኔኤኒ ኩሚያኬ፤ ኔ ቢያገ ባሼ ዑሣ ዳግ ገዔያ፤ ሃሣ ቢያ ባኮ ዑፃ ኔኤኒ ቢታጎቶ ዓኣ ካኣቲኬ፤ 12 ዖርጎቹሞንታ ቦንቸንታ ቢያ ጴዳሢ ኔገዳገኬ፤ ኔኤኒ ኔ ዶዶሞና ዋልቆና ቢያ ባኣዚ ዋይሣኔ፤ ኔ ናሽኬ ዓሲ ዳኤፒ፤ ሃሣ ዶዶ ማሃኒ ዳንዳዓኔ። 13 ኑ ያኣዛሢያ! ኑ ኔና ጋላታኔ፤ ኔኡኮ ቦንቸንቲ ሱንፆዋ ኑ ሄርሻኔ።

14 «ታኣና ታ ዳሮና ኔኤም ኑ ዒንጋንዳ ባኣዚ ዓይጌያ ኑኡኮ ባኣሴ፤ ዓይጎሮ ገዔቴ ቢያ ባኮ ኔገዳገ ዔኬ ባኮኬ ኑ ዒንጋሢ፤ ዓካሪ ኔኤሲታጎቴ ማሄ ኑ ኔኤም ዒንጌኔ፤ 15 ኑ ያኣዛሢያ! ኑኡኒያ ኑኡኮ ቤርታኣ ዓዳንሢ፡- ኔ ቤርቶይዳ ዒፃ ዳከንቲያና ቤሲባኣ ሸኣቸኬ፤ ሳዖይዳ ናንጎ ዋዳ ኑኡኮ ሸቢጉዲኬ፤ ሃሣ ሃገ ማዓንዳ ዋዛኣ ባኣያኬ። 16 ናንገና ናንጋ ጎዳ ማዔ ኑ ያኣዛሢያ! ሃያ ቢያ ቆሎ ኑ ቡኩሴሢ ኔኤኮ ዲማጴ ሱንፆም ቦንቸንቲ ጌኤሺ ማኣሪ ማኣኒኬ፤ ያዲ ማዔቴያ ቢያሢ ጴዳሢ ኔገዳገኬ፤ ቢያ ባካ ኔኤሲኬ፤ 17 ኔኤኒ ዓሲኮ ቢያ ዒኔ ዛገ፡ ጉሙርቁንቲያ ማዓ ዳሪና ዋዛዳያ ማዔሢ ታ ዔራኔ፤ ዬያሮ ታኣኒ ሃያ ቢያ ታ ማላሢና ናሽኪ ኔኤም ዒንጌሢ ጉሙርቁንቲሢና ፒዙሞናኬ፤ ዬያጉዲ ሃሣ ሃካ ኔኡኮ ቡከንቲ ዳራ ኔኤም ዒንጌ ባኮና ኮሺ ዋዛዳሢ ታ ዳንቁኔ፤ 18 ኑኡኮ ቤርታኣ ዓዳንሢ ዓብራሃሚንታ ዩሳኣቁንታ ያይቆኦቤንታኮ ጎዳ ማዔ ያኣዛሢያ! ሃይ ዳኤግ ናሹማ ኔኡኮ ዳሮ ዒና ናንገና ዶዶ ናንጋንዳጉዲ ማሄ፤ ቢያ ዋዳ ኔኤም ዔያታ ጉሙርቁንታያ ማዓንዳጉዲ ማሄ፤ 19 ኔኤኒ ዓይሢ ባኮ ቢያ ማዲ ኩንሣንዳጉዲና ሃያ ቢያ ታ ዒዛም ጌኤኮ ማኣሮ ማኣንዳጉዲ ገኢገሺሢ ማዳንዳጉዲ ታ ናዓሢ ሴሎሞኔም ጉቤ ዒናገ ማዔ ዔኤዒሢ ዒንጌ» ገዔኔ።

20 ዬካገ ዳውቴ ዳሮም፡- «ናንገና ናንጋ ጎዳ ማዔ ዒንሢኮ ያኣዛሢ ጋላቲዋቲ!» ጋዓዛ፡ ቡኬ ዓሳ ጉቤ ዔያቶኮ ቤርታኣ ዓዳንሢኮ ጎዳ ማዔ ያኣዛሢ ጋላቲኔ፤ ሊካ ሳዖ ባንሢ ሄርኪ ጌዒ ያሱሲንታ ካኣቲንታም ዚገ ቦንቸኔ።

21 ዬኮኮ ዚሮ ጉቴሎ ሚርጌ ቆልሞ ሹኪ ያሱሲም ዒንጎ ባኣዚ ማሄ ዔያታ ሸኢሸኔ፤ ዬካገ ዳራ ሙዓንዳጉዲ ዒንጌኔ፤ ዒማና ፔቴ ሸያ ዚያ ጌማይ፤ ፔቴ ሸያ ዓዳ ማራይና ፔቴ ሸያ ማራይሪ ሚቸ ዒንጎ

ዲንገሢ ማሂ ሹካዖ ያኦሲም ዲንገይ ዲንጎ ቤዞ ዑፃ ጉቤ ሚቹኔ፤
ዎይናፓ ኮሾና ዑዠዎ ያኦሲም ዲንገሢ ማሂ ሺኢሹኔ፤ 22 ናንገና
ናንጋ ጎዳ ቤርታ ዬኖ ዓሶ ሙዒ ዑሽኪ ዑሽኪ ኮሺ ዎዛዲ ዔያታ
ፔኤቄኔ።

ዬኖ ዓሶዎ ሴሎሞኔ ካኣቲ ማዔህሂ ዔርዚህሂ ማዓ ባኣዚ ላምዓሲ
ማዕኔ፤ ናንገና ናንጋ ጎዳ ሱንዖናኣ ደኣሚ ዔያታ ዒዛ ካኣታህኔ፤
ሳደቁ ጎዎህያኣ ቄኤሴ ማሂ ዔያታ ደኣሬኔ። 23 ዬያይዲ ሴሎሞኔ
ዓደ ቤዛ ጌሊ ናንገና ናንጋ ጎዳ ዒዛም ደዲሹ ካኣቱም ዓልጋ
ዴዔኔ፤ ዬካፓ ቢያ ባኣዚ ዒዛም ጌኢጌ ካኣቲ ማዔኔ፤ ዒሰራዔኤሌ
ዴራኣ ጉቤ ዒዛም ዓይህንቴ። 24 ቢታንታ ዓኣ ዓሶንታ
ፖኦሊሶንታ ዳውቴ ናኣታታዖ ዓቱዎ ካኣቲ ሴሎሞኔም ጉሙርቁንታ
ዓሲ ማዓንዳህሂ ጫኣቄኔ። 25 ናንገና ናንጋ ጎዳ ዬኖ ዓጮ ዴር ቢያህሂ
ቤርታ ዴግ ዴጊዲ ሴሎሞኔ ቦንቹሴኔ፤ ዒዛኮ ቤርታ ዒሰራዔኤሌ
ዓሶ ዎይህ ካኣቶፓ ቢያ ዑህ ባሺ ዒዛ ቦንቹሴኔ።

ዳውቴኮ ካኣቱም ዎደ ሃይሶ ቃሚህና

26 ዒሴዬ ናኣዚ፥ ዳውቴ ዒሰራዔኤሌ ዓጮይዳ ካኣታዲ
ዎይህኔ፤ 27 ዒዚ ኬብርኦኔይዳ ዴዒ ላንካይ ሌዔ፥ ዬሩሳላሚይዳ
ናንገ ሃይህታሚ ሃይህ ሌዔ፥ ዎሊ ዑፃ ዖይዲታሚ ሌዔ ካኣታዳኔ፤

28 ዬካፓ ሚርጌ ቆሎንታ ቦንቹዎ ዴንቄሰካፓ ኮሺ ጋርቹ ሃይቄም፥
ዒዛ ቤዛ ናኣዚ ዒዛኮ ሴሎሞኔ ካኣታዳኔ፤ 29 ዓይፃፓ ዴንዲ
ጋፓ ሄላንዳኣና ካኣቲ ዳውቴኮ ዓኣ ሃይሳ ያኦሲ ማሊዖ ኬኤዛ
ሳሙዔኤሌ፥ ናኣታኣኔንታ ጋኣዴ ጌይንታ ሃይህ ዓሳ ፃኣፔ ሃይሶ
ማፃኣፓ ፃኣፒንቲ ዓኣኔ። 30 ዳውቴ ዎማይዲ ፔ ዓጮ ዎይህቴያ፥
ዎዚጉዴ ዎልቁ ዒዛኮ ዓኣቲያ፤ ዒዛንታ ዒሰራዔኤሌ ዓጮንታይዳ፥
ዬያጉዲ ሃህ ኮይሎይዳ ዓኣ ካኣቶይዳኣ ሄሌ ባኮ ዛላ ቢያ ዬንህሂ
ማፃኣፓንህሂዳ ፃኣፒንቲ ዓኣኔ።

29:23 29:23 1ካኣቶ. ማ 2:12። 29:27 29:27 2ሳሙ. 5:4-5፤ 1ያኦሲ. ዓሃኪ
3:4።

ጌሌዢ ማግኒት

**The Holy Bible in the Maale language of Ethiopia,
using Ethiopic script**

copyright © 2008 The Word for the World International and The Bible Society of Ethiopia

Language: Maale (Male)

Translation by: The Word for the World

Contributor: Bible Society of Ethiopia

ጌሌዢ ማግኒት

Maale Full Bible

The Word For The World International

Bible Society of Ethiopia

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2023-04-13

PDF generated using Haiola and XeLaTeX on 21 Feb 2024 from source files dated 14 Apr 2023

bbcfb90a-3ae3-5452-983d-6c4c02375929